




E. WESTON DKHAR

KI
KHANA
NONGTYMMEN
NA KI
TNUM SOPPRING
U 7 TREP

1985



Acc. No. 629, US II

Class No. _____ Book No. _____

Author D. Khar, E. Weston

Title Ki Khana nonglynnon naki trum
sopting u 7 frep.

Borrower's	Due Date	Borrower's	Due Date

Acc. No. 629, RR II

DISTRICT LIBRARY
GOVERNMENT OF MEGHALAYA
RI - BHOI


1. Books may be retained for a period not exceeding 15 days by members.
2. Books may be renewed on request at the discretion of the Librarian.
3. Dog-eared the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. Any such injury to a book is a serious offence; Unless a borrower points out the injury at the time of borrowing the book, he/she shall be required to replace the book or pay its price.

Help to keep this book fresh & clean

KI KHANA NONGTYMMEN NA KI TNUM SOPPRING U 7 TREP

(Folk Stories in Khasi)

*Hapoh ka kpoh jingstad u nguid,
Biang biang u jam um ur ne btuit ;
Ba jingstad blei hapoh ka shai,
Wat la kim tip u ei u shai.*



ALL RIGHTS RESERVED

KA LAMPHRANG

Ka litereshor ka dei ka it khmih bad ka turbir kaba phalang ia ka jabieng bad ia ka jingmut jingpyrkhat kaba hapoh bad habar jong ka jaitbynriew. Katba ka Kolshor pat ka dei u budlum bad u pynsnoh jong ki khyrwoh jong ka. Lyngba ki snem bad ki rta ka khun wandur bad king ia u boltha jong ka lieng ka jaitbynriew shano ba ka thmu ban jam. Ym don bor ha sla pyrtnei kaba lah ban nguud bad pynjah rngai ia kano kano ka jaitbynriew katba kata ka jaitbynriew ka dang bat skhem ia la ka kolshor bad litereshor, bad kano kano ka jaitbynriew kaba leh lyndet bad niewbein ia ka, ka long ka jaitbynriew ka ban juh rngai. Namar kata, ki nongtalam bad ki nongsynshar kiba burom bad niewkor ia la ka Kolshor bad litereshor bad kiba pynshlur ia ka thoh ka tar ki long da shisha kiba shai-khmat, kiba don ka dak ka shap jong ka jingiohi jngai bad ka jingieit ri.

La shisha nga la pyrkhun la u saisiej ka jingmut jingpyrkhat ha ki thwei matan myllung ka poetry, hynrei ym lah pat khlem da rkhe, raw-bei sha la ka tlong ka thymmei kaba ka kolshor bad ka litereshor ka speh ka thylleng; kaba bunsien ngi li leh klet ia ka. Bunsien kane ka jingkylli ka mih, kumno bad mynno ka litereshor ka sdang? Kiwei pa kawei ka jaitbynriew khamtam eh ki jaitbynriew riwlum kiba kum ma ngi; ki don la ki khanatang bad ki puriskam ban padiah siangsdiel balei ba kim don jingthoh jingtar; Katba ki dak ki shin pat kiba paw tyngkreli ki rathuh ba kim dei satia ki riwkhlaw ne kiba sahdiel ha ka buit ka akor. Ki long ki briew kiba ka kyntan jingpyrkhat bad jingsngewthuh ka long kaba maian bad ba taryngkat tyrpeng bad kiwei pat ki jaitbynriew, bad ia kata lah ban pynsabot shynna na ki dustur ki riti, ki rukom ki phukom, ka longuing ka longsem bad ka longbriew ka manbriew. Ia kine la ri kyndong bad

sheristar na u kpa sha u khun bad na u khun sha
u khun lyngba ki lngaid ki lwait ki por, tad ynda
ka poi ka por ba ka thoh ka tar ka ih bad paw-
penryngkew ha ka litereshor.

U Khasi u la seng la ka niam ka rukom, ryng-
kat ki dustur ki riti, ki dah ki dong bad ki rukom
ki phukom naduh ki sngi jong ka jingkieng ksiar
U Sohpetbneng bad u Diengiei bad la pynsah pateng
pakit ia ki lyngba ka bthah ka bujai hapoh ki tnum
soppring sawdong ka lyngwiar dpei ne sawdong ka
Pylli ka Jyrdom da ki saimuka ba syiang ka dui-
tara. Shimiet ia-shai u ud u saidud saisiyang bad u
kyriat u ryndang jong u nongkyndoi ban sneng pura-
mit bad ban saiñdur ia ka longbynriew manbynriew.
Kane ka dei ka skul pyrkhath kaba plied ba spiar
lyngba ki khanatang, ki puriskam bad ki purinam ban
tei ia ka pyrthei bah batar jong ka litereshor.

Ki khanatang ki saiñ ia ka hiam-dien bad ki
pynphngaiñ ia ka dum-lyoh jong ka pyrkhath haba
ngen ngen ka iatakhun bad ki. U Khasi u long u
riewshemphang, uba ieit ia ka jingitynnad jong ka
mariang bad uba lum jinghikai na ka. Ka thym-
mei jong u ka dei ka hok bad ka jingshisha bad lyng-
ba ki **"Khanatang na ki tnum Soppring U Hynniew
Trep"** u nongthoh u pynpaw ia ka jingiar ka khan ka
pyrkhath u Khasi, da kaba kyrmen skhem ba ki nong-
pule kin toh ban bam ban dih kyrhai ia ki um ba-
shngiam kiba long ka nongkynti.

Ngam lah ruh khlem da ai khublei ia u Rangbah
Dion Roy, uba la noh synñiang lem ha kane ka thup.

U Nongthoh.

KI KHUNG

KI Khananongtymmen Na Ki Tnum Soppring U Hynniew Trep

	Page
i) U Kohkarang	1— 2
ii) Ka Panshandi	3— 4
iii) U Kpa, U Khun bad U Kada	4— 5
iv) Ka Waitlam U Kui	6— 7
v) Ka Burom	7— 9
vi) Ka Kada bad U Sniang	10— 11
vii) U Nongbishar Bastad	11— 13
viii) U Bor Dorji Bad U Konga Singh	13— 14
ix) Ka Jingsuk Bad U Nongthohdieng	14— 17
x) U Ramhah Ba Banbein —	17— 18
xi) Ka Duitara	19— 22
xii) U Tymmen Bad Ka Lyer	22— 26
xiii) Ka Siangpanai	27— 30
xiv) Ki Tiensneng Tienkraw U Kpa	30— 34
xv) U Mushi Bad U Syiem	34— 36
xvi) U Myrsiang Bad U Klew	37— 39
xvii) Ka Rai Blei	39— 41
xviii) U Nongrep Baduk Bad La Ka Tnga	42— 44
xix) U Syiem Bad U Dorji	44— 45
xx) Ka Pung Weikyian	46— 48
xxi) Ka Jhap	49— 50
xxii) Ka Khnai ba Wad Pyrsa Kurim	50— 52
xxiii) Kaei Kaba Kortam ?	53— 57
xxiv) U Briew Ubaduk Bad Ka Tnga Kaba Duk	57— 60
xxv) U Khun Bymkohnguh	60— 61

xxvi)	U Khynnah Uba Shlur	61— 63
xxvii)	Ka Dngiem Bad U Myrsiang	63— 65
xxviii)	Ka Jingthoh U Kpa	65— 68
xxix)	Ka Jingkynshew Baphylla	68— 71
xxx)	Kumno U Peheda U Bamja Lang Bad U Wahadadar	71— 76
xxxd)	U Rynniaw Bad Ka Sohlyngngem	76— 77
xxxii)	U Simtyngwieng	78— 79
xxxiii)	U Shaikdar	79— 84
xxxiv)	U Tei U Blei I U Tei U Blei I	85— 88
xxxv)	Ka Nohkalikai	88— 91
xxxvi)	Ka Sunapani	91— 94
xxxvii)	Leh Pap Ka Kong I Leh Pap Ka Kong I	94— 96
xxxviii)	Ka Tiewlalyngngi—Pep—Shad	96— 98
xxxix)	Donkam Ban don Ki Myrsiang	98— 99
xl)	U Phansyiar	99— 101



U Kohkarang

Shisien, la dum tɔngngit ka pyrthei ka mariang ba ka phoi ka sngewsih ka sngi bad ka buhr̄ieh ia lade ha krem lamet ha Krem latang. Te, la kulmar u jingthaw baim bakh̄ih baroh ha snieh pyrthei. Sa tang ki khlur ka bneng ki ai jingshai byrngut byrnḡet. "Mei 'ngi ko Mei 'ngi," la pyrta ki jingthaw. "balei phim mih shuh phaliar tait-tait!" Hynrei ka Sngi ka kuman bad buhr̄ieh ia lade. "Ka pyrthei kan kylla-um-nep," la ud u bynriew, "bad ki mawbyrsiew kin sa kylla bseĩñ," ki la iam. Ka Sngi, la katta ruh kam patiauw ei ei namar ba ka dang at-khu ia kata ka jingrkhie beĩñ jongki jingthaw ha Lumpung-Ri-Lum.

Ki dieng ki siej ki la stem blait blait bad u briew u mrad u shyllang u kiuh ba u pjah u daitthah. Ka pyrthei baroh kawei ka tap tang da ka ngiew bad ka phieng. Te, u khun bynriew, u Syiem jongki jingthaw baroh um banse ban khot ia ka Durbar pyllun ban ialum ha Lumpung-Ri-Lum ban iapyrkhat pyrdaiñ kumno yn leh. Ynda la iathaiñ iathir ia ka duh ka dang baroh bad la lap ia ka daw balei ba ka Sngi ka buhr̄ieh ia lade, u khun bynriew u la buh kawei ka jingtyrwa. "Haba kumta, mano keiñ ban leit sha tyngkong ka Sngi ban khroh ban kjor bad ban khem umjem umjah, ba ka Mei 'ngi kan wan paw pyrthei biang?" Baroh ki jingthaw ki la sngap kynjah jar khlem nud ang khlem nud bob wat tang shikyntien ruh.

Hɔpdeng jong kata ka jingkyajah, u teng thuit u Kohkarang ryngkat ka leh sarong bad pynat shadem. "Ngan leit ma nga," u la ong, "shaniah ha nga ia kata baroh. Nga don ki thapniang kiba khlaiñ bad ka maiñ ka maian badap shynrang." U khun bynriew bad ki jingthaw baroh, wat la ki t̄ohi ia kata ka jing-leh sarong leh kyreit jong u ruh, hynrei namar ba ym don mano mano banud bashlan ban leit; kim banse ban phah da u.

U Kohkarang, ha ka jingkhyllew mynsiem jong u, u kyrthieh thiaw shaduh tyngkong u Ñi Luishai. "Ñi",

nga la leit. Ka Durbar kam lap iano iano ruh lait tang ia nga." u la kren khyllaw ryngkat ka kynthar sopi sopjat. U Ni Lurshai, kum u riewtymmen; uba la bishar bha naduh khlieh haduh khongdong, shi kyntien u la kren, "Kynmaw," u la sneng, "bat la ka akor ka burom." Hynrei u Kohkarang pat hala ka jingsngew sarong jong u um patiw satia. "Ia kata baroh yn nai da ia ong," u la kylliang ktien, "nga la sngewthuh nadong shadong. To, khublei mo Ni, nga la leit," bad thiaw u suh shaduh tyngkong ka Sngi.

Ka Sngi ka la pdiang burom ia u kum u rangkynih rangphawar uba dei ban ioh ia ka burom. Hynrei, ha ka jaka ba un kren un saiñ ia ka kam kaba la pynkhamti ha u, u sdang pynban ban ialuh samla. Nalor kata, u sdang ban leh kynteit niak-niak nak-nak bad ka pyndonkam artad ki 'tien kai 'tien pohdor kiba la pynbitar lep ia ka Sngi. Ynda kam lah tyngkan shuh ka kynthet bad jraiñ bad jraiñ, "Khun ka lyndet poh-rati, men mih ne em sha lait?" ka shim artad da ka lyngknot bad ka kawang phak na ka shyntur ryngkat ka tim artad. "Naduh mynta," ka ong, "men kit ka jyrhoh ka sahiaw junom kum kadak jong ka jingkhlem raiñ hakhmat u briew bad U Blei."

U Kohkarang u mih da kaba iam rem. Um nud shuh ban paw pyrtnei, u suh beiti thiaw shapoh lawbah lawsan. Ki jingthaw ki la iohsngew ia ka jingwan phai jong u ryngkat ka jyrhoh ka sahiaw, khruk-khruk khrek-khrek bad ki sngewthuh shai aiu ba la jia ha u. Naduh kata ka por u Kohkarang um sngew don rngiew don bshi shuh. Kumta, ban da la ka ijot ka lehrain, ka shah kynshi ka shah rkhe bein u her haduh mynta mynne tang tang mynmiet.

Ka Panshandi

Mynba dang hok ka pyrtnei bad bym put hap ki bniat masi, la ong ba ka Panshandi bad U Mangkara ki dei ki khun don burom surom bad khun ba don ba em ki briew. Naduh dang khynnah ki ia ieit ia sngew-bha iwei ia iwei pat. Suki suki ka jingiaieit samla ruh ka rung ha ki. Dei namar kata ka daw ba ki kmie ki kpa na baroh arliang ki sdang ban pynshad ki khmat halor ka taid ka teng jongki. Ka Panshandi, kaba kham tam sneng, liak ka tang shu suba ia kata ka la pyrkhat ban riam ia U Mangkara, namar ka tieng ioh ba ki kmie ki kpa ki pyniakhlad jubor ia ka jingiaieit ia thoiñ jongki.

Kumta, ha kawei ka sngi ka la khroh ia u Mangkara ban tur sha u pud u bym dei. "Balei ngin im ka jingim kaba kum kane," ka la ong, "to ngin tamih noh na ting bad phet noh jngai nangne," ka la pynkut. U Mangkarang u khun tipsngi ki briew, liak u tang shu iohsngew ia kane, u la thap bad kyrngah la ka khlieh. "Kumno ngi lah ban leh lyndet ia ki kmie ki kpa?" u la kylli, "nga te, horkit hordang ngam sngew-tahap jingmut satia." Hynrei ka Panshandi ka khroh bad ka iai khroh ia u hynrei um man ia mynjur satia.

Ka Panshandi ha ka jingbitar jong ka kala kren ki ktien kiba khor bad ba pynsngewsih ia u haduh katta katta. Ka nangpyrkhat ba da kaba kren kumta, kan pynlung mynsiem ia U Mangkara bad lor un liat ha ki buit jong ka. Hynrei u Mangkara, katba ka nangkren katta u nangdom bad nangskuiñ. U teng joit da kaba bitar bad ha ka jingdom u kum tim ia ka. Mar mar kumta ka Panshandi ka kylla dkar tympai. Ha kajuh ka por u Mangkara, namar ka jingburom jong u ia la ki kmie ki kpa u kylla u khlur uba phyrnai bad u kiew soit sha jrong, u da klet syndon jak ia ka Panshandi kaba shisien u la ieit. Katba ka Panshandi pat synia bad sngi ka iai kynmaw ia u bad ka iai khmih lynti lano shi lano ba un wan phai pat sha ka.

Dei namar kata ka daw, haduh mynta mynne ka Panshandi tang shu sdang dum ka kiew halor ki khah

bad ki dieng bad ka khmied beik la ki khmat sha u Lur Mangkara, ka da jaw ummat artad jrop shi jrop ba ka kynmaw ieit ia u. Ka da khmih lynti lano shi lano ba un wan phai pat sha ka, katba kam tip ba U Mangkara u la klet jynduh jyndam ia ka.

Kumta, ia ka briew kaba ap bad ia khmih lynti ba u tnga jong ka un wan phai pat sha ka, hynrei u bym don mon shuh ban wan phai ki sin "Ka Panshandi-dem-lor-khah.

U Kpa, U Khun bad u Kada

Shisien U Kpa bad u khun ki ia leit jingleit da u Kada. Te, namar ba kim kwah ba kin pynkit khia than ia u ki la pyrkhath kumne—"To ngin shu iaiaid noh da ka kjat bad ngin shu patom ia u, wei ba ngim lah ban iashong lang baroh arngut."

Katba ki nangiaid, ki la ia kynduh shi kynhun ki briew kiba dang wan na la ki jingtrei. "Eh, ki briew khleh bieit aiu kiba kum kine," ki la iakren para maki. "Ha ka jaka ba kin shong ha u mrad bad jah thait ki shu ia patom pynban ia u."

U Kpa u la sngewrem ia kane ka jingken bad mar kumta u la kyntiew joit ia u khun halor u Kada. Ynda ki la iaid katto katne por ki la ia kynduh sa shi kynhun ki briew kiba iaid na kata ka lynti. "Shish, ka khynnah khlem aiu kaba kum katai eh," ki la ong, "ia lade u shong shyeng shyeng halor u Kada katba ia u Kpa uba la tymmen pat u shu pyniaid da ka kjat."

Kane ka jingken ka la ktah jur ia u khun. Bran u hiar na u Kada bad u kyrpad ia u Kpa ban shong. Kumta, baroh arngut ki ia iaid la ka lynti haduh ba kin da poi ha kawei ka nongrit. Katba ki nangjam ia kata ka shneng, la mih ki khynnah bad ki rangbah kiba ia peitkai ia ki. "Phuit, ki ong," U tymmen aiu eh uba kum u tai. Ia lade u shong kynshyeng halor

u Kada, katba ia u khun uba dang rit pat u pyniaid da ka kjat. "Kane ka jingkren ka la ktah jur ia u Kpa."

Kumta, u kpa u la pyrkhath kumne—"Ban laith na kine ki jingshah kynnoh baroh, ka bha ba ngin iashong lang baroh arngut." Joit baroh arngut ki kiew bad prak ki jam la ka lynti. Hynrei hadien katto katne por pat ki ia kynduh sa shi kynhun kiwei pat ki briew. "Ki briew aiu kiba kum kine," ki la iakren hi para ma ki, "kumno ki sngewthuh ban shong arngut ha uwei u Kada?" "Shish, ka pap aiu," la ong u kpa, "leh kumwei ruh ym long, leh kumwei ruh ym long. Iano yn pynhun?"

Hadien ba u kpa u la pyrkhath shi iai pyrkhath, u la ong ia la u khun ban hiar noh na u Kada. Ki la shongthait shipor ban bam jasong harud kawei ka wah duit. "To ngin shu ia bah noh ia u kada mar shidong," la ong u Kpa ia u khun. Kumta ki teh bad kti bad kjat ia u kada, ki suh da u dieng na khlieh ha tdong bad ki bah padoi ia u baroh arngut.

Ki briew kiba iakynduh ia ki ha lynti bad kiba iohi ia kane ka jingleh jong ki ki la ia rkhe iapler iapang bad ka kynshi ka kynphuit artad, "Shish, ki briew bieit atu eh kiba kum kine, ha ka jaka ba kin shong halor u Kada ban aram la ka met, ki bah pynban ia u." Kine baroh arngut ki iohsngew ia kane ka jingkren jong kine ki briew. "Ko pa," la ong u khun, "mano ba lah ban pynhun ia ka jingkwah jong ka pyrthei. Wat U Blei hi u dang shah khium shah kynteit."

Mar mar kumta ki bynshet ia u Kada, ki loit ia ki ksai teh na ki kti ki kjat jong u; joit ki kiew baroh arngut halor u kada bad ki iaid da ka jingkmén baroh shi lynter lynti, ki briew kiba khamstad bad kham shemphang.

Ka Waitlam u Kui

Katba ka Shad ka Kmen ka nangraid shaid shaid ha Lumpung-Ri-Lum, hapdeng ka kmen ka sngewbha, ka biria ka birai, U Ktiar kum u riewtymmen u iaid talaiñ kam haneng haneng harum harum. Napdeng ki laiphew jingthaw U Kairiang Syiem n'u Shiah Seiñ iong u wiat rymmuiñ ia u Tiewmationg ba u thaiñ la ki kti ha ka Janailar: U Hurjakoid bad u Jamithiat ki shong bam kwai sadhai ha shiteng riat, katba U Tiewjapang spongjaiñkhor bad u Tiewsohtoit kynrem ki tmaiñ ki thaiñ halor ka Sohlarmau. U Tiewshira mithai u kheit Sohplinam ryngkat ka iaraiñ artad ia ka Nianglattham ba ka dem syaid sngi halor u mau. U Tiewlyngskaw u shong lyngngeh hapneh ka Temsynlar, katba u Tiewlyngksiar halor u mau u wiat ia ka Keilympied hapoh lawbniap. Ka Sim pienglyiur pat nalar u Sothombor ka rwai iapsaw ia u Sim Kaitor. Kumne ka shad ka kmen jong u laiphew jingthaw ha Lumpung-Ri-Lum ka khii ka tyllun.

Kumba ki paw ha la ki dur, kumta ruh ki paw ha la ki sur. Ka Tyut ka tem nakra katba U Sianglailad u nangkyrha, U Shrieh u tem ka 'Singpadiah katba u Dyngkhit bad u Brai ki tem kynshaw. U Ni Risang u tem kyrdoth padiah katba U Keirang pat u shad symphiah, U Shakhylia u tangkuri katba U Kui u shad mastieh shad wait; katba ka Dkhoh ka shad kynthai jylliep khapngaiñ u Dkhan pat u nangrkhie iapler iapang haduh ban da dam syndait ki khmat, namar ka sngi jingkmien dohnud ka dei ka sngi bam iam pangnud.

U Kui, hadien ka jingshad mastieh u wan ban shongkai noh bad u Dkhan halor u phlang uba dang khmih shaiñ ryngkat ka rkhie iapler iapang ba ka Dkhoh ka shad kynthai jylliep khapngaiñ.

U Pyrthat uba la swait ban shad tangba um don waitlam, u tang shu iohi liak ia ka Temsynlar ka pluh ir ka dohnud jong u. Mar kumta u pan kyliang ia ka waitlam na u Kui ba un shad khalek shad wait ban

la kompit bad u jumai. Tang shu loh ia ka u leh shongshit lamwir bad u pynkulmar ia baroh ki nongshad ha lypung.

U Ktiar kum u riewtymmen u la tur riaw riaw sha khmat ban sneng ban kraw, ban pynsuk pynsaiñ bad ban khem umjem umjah. U tang shu sdang ban kylli ia kaduh ia kadang tik khih bitar u Pyrthat. "Me uei eh," u la ong, "mano ba la thung nongbishar ia me?" U tied artad bad taiñ bad taiñ ia u Ktiar bad u kyllon kram ha khyndew bad u da thiah ltoiñ kumba iap. Ir ka kulmar ka madan shad bad her iap ka kynthei ka khynnah bad soit u kiew sha bneng ryngkat ka byrngem ka byrsit.

"Ani! nga la duh ei la ka waitlam!" la bynñiew u Kui, "haei pat ngan iashem ia u Pyrthat?" U Kui u sngewsih kthang ba u duh la ka waitlam hynrei kumno pat un kiew sha bneng? U Pyrthat ruh ba u tieng ia u Ktiar namar ba u la tamti bad leh palat, um nud shuh ban hiar khyndew. U Kui u la pyrkhat ba satang ban pun da ka jingkieng sha tyngkong u Pyrthat ban loh pat la ka waitlam. Kumta, u kut jingmut ban leit-rud ha kajuh ka jaka haduh ba kan da kot sha bneng.

Haduh mynta mynne ka sab ka jingiashun thlongmluh thlong-sying hapdeng u Ktiar bad u Pyrthat bad kat haba ki ia kynduh ki iakhun. U Kui ruh naduh kata ka por haduh mynta mynne u leit-rud tang ha kawei ka jaka u da mut ban tei jingkieng shaduh tyngkong u Pyrthat namar ba u bynnud la ka waitlam ba la knieh u Pyrthat.

Ka Burom

Slem bah mynshuwa la don uwei u tymmen ha kawei ka nongrit uba im suk parum pareh, bad la ki jong ki khun ki tnga. Baroh ki ia trei lang bad ia ieit markylliang. Kumta ba ka iing jongki ka dap da ka jingieit bad jingsuk.

Ha kawei ka step une u tymmen u la mih shabar shuwa mano mano ban khie thiah. U lap ba ka tlang ka la wan bad baroh sawdong la tap da ka lor bad u thah. Hapdeng jong ka jinglyngngoh jong ki jinglyngngoh baroh u la lap ia ki dienjat briew kiba paw shynna khrek halor u thah, i kumba la don mano re ba dang shu mih na ka iing jong u. Ka la pynlyngngoh lyngngaiñ shibun eh ia u namar ym shym la don satia mano mano ba la khie thiah shuwa jong u. Kumta u la kut jingmut ban bud dien ia ki.

Kita ki dienjat kiba mih na iing jong u ki laid halor ka lynti shnong shaduh rudnong bad lyngba kawei ka pyntha haduh ba kin da poi harud ka lawbniap bad jar ki jah noh hangta. U tymmen bapli u la dap da ka jinglyngngoh lyngngaiñ naba um lohi iano iano ruh hangta. Hynrei tang namar ba ki dienjat ki kut hangta u la kylli, "Phi dei i ei mo i ba lamih na iing jongnga ban wan rieh hangne?" Kumta kumta hi u la iohsngew ia ka sur sawa kum ka ktien briew kaba wan mih na kata ka bniap kaba ong, "Nga dei ka jingsuk keiñ kaba la kut jingmut ban mih noh na iing jongphi. Nga la khreh mynta ban leit shong leit sah noh ha ka tai tai ka iing harud nong. Te, namar ba phi wan bud ia nga, nga don tang kawei ka jingkylli ban buh hakhmat jongphi. Hato kaei sha mo kaba phi ñiewkor eh, ki jingi jingdup, ka khyndew ka shyiap, ka spah ka hajar ne ki jingkup jingphong ba kordor jongphi?" U tymmen bapli u la king ngir ka khlich shiphang. "Phi lah mo ban iai ap ia nga hangne shipor," la kyrpad u tymmen, "ba ngan leit jingjang sha iing ban kylli lem ia ki khun jongnga?" "Hooïd," la jubab ka jingsuk, "phi lah ban leit tangba, phi dei ban wan rah kloï ia ka jubab".

Uta u tymmen kumta kumta hi u la leit phai sha la iing ban iathuh ha la ki khun ba ka jingsuk ka la phet noh na ka iing jongki bad kumno u la bud dien thop ia ka haduh kata ka lawbniap bad nangta aïu ka kwah khatduh na u ban ai. Uta u tymmen ryngkat bad la ki khun ki la dem duriap ban pyrkhata. Ka tnga ka la ai jingmut kumne, "Nga tharai ngi dei ban

pan shuh shuh ka khyndew na ka ba ngin rep. Ynda ngi la pynmih pahuh pahai u kba u khaw ngin im suk im saiñ khlem jingklusai." "Em phi mei," la kem ktien u khun rangbah, "ngi dei ban pan kham bun ki kulai ki masi bad ki langbrot." "Ani!" la kren kyn-dit u khun uba ar, "hato kam jyn da la long kaei kaei kaba phylla eh lada ngin pan na ka ki riam ki beit kiba itynnad?"

Kine, shi kmie shi kpa shi khun; ki tatai nia haneng haneng harum harum ban pynbiang ia kata ka jingkwah jongki. Khatduh eh ka khun khatduh, ba kam lah shah shuh ban shu sngap ka la mih phngoic na kyndong bad ka la ong, "Mei, Pa, Bah Heh bad Bah Deng; nga te marwei ngam sngew lahap jingmut bad kita ki jingkwah jongphi baroh. Lada ka long kaba lah sngewbha pan na ka ia ka burom jongka iing." Uta u tymmen u la pyrkhat sani bha ia kata ka jingai jingmut jong ka khun khatduh bad u la ong, "Kata kaba dei bad kaba da shongnia shongkun eh, namar ka burom ka long kaba kortam." Kita ki khun jong u ruh baroh ki la sngewiahap jingmut lang bad kata ka jingai jingmut.

Ynda uta u tymmen u la wan phai sha kata ka 'Lawbniap ha kaba ka Jingsuk ka ap, ka la kylli ia u, "Kaei ka raikut jong ka iing jong phi?" "Shim lud khoit kat kaba ngi don," la jubab uta u tymmen, "hynrei ieh noh ha ngi tang ia kawei, bad kata ka long ka burom jong ka iing jong ngi," u la pynkut.

"Pleng, hangne nga tohi shai," la phai ktien ka jingsuk, "ba ngam lah satia ban mih lyndet na ka iing jong phi. Ha kaba ka burom ka ijot ka don hangta nga don ryngkat. Naduh mynta ngan tai shong tai sah ryngkat bad phi."

Ka jingsuk mar mar kumta hi, ka phai dien trai biang sha iing uta u tymmen; bad naduh kata hi ka khyllip mat, ka iing jong ki ka dap tang da ka jingsuk bad jingkmien suda.

U Kada bad u Sniang

Shisien u Kada u la iaid bam lyer pyngngad bapoh kawei ka kper kaba don bun jaid ki sohbang ki sohthiang kiba soh rynjaiñ rynjup halor ki tnad dieng. Marwei marwei u shu khmied jawdud sha ki tynhong kum u muid. La u pyrshang ban kot sha ki ruh um lah kot namar ba um lait kiew dieng. La u la pyrshah ban shu lymbub bad pynkhynñiuh ia ki ruh um lah, shu sakhrat ei la ka met. Ban pynklet ia ki u shu bam myllen noh da u 'langlung uba don hangta ha trai u Diengsohkpu. "Shish ka pyrthei aiu kaba kum kane." u la kren mynthi wei briew wei briew, "wat U Blei hi u don la ka jingduna," u la pynkut.

Harud jong kata ka kper u lap iohi kumno re liak ia uwei u sniang uba kyntur ia ki wang khlaw bad uba da bam artad khew shi khew ia ki shriew. "Are! I um du!" la kren kyndit u Kada, "ngam shym pyrkhatsatia ban iakynduh ia phi. Te, jait ba ia shongsngi kumne te, to ale seh ngin iashongkai noh hangne ha trai u Diengkpu tang ioh iathuh khana myllen ei ia kane ia katai," la kren khroh u Kada, U Sniang ruh mar kumta u kynther la ki Sali bad u bam pynlut ia kita ki shriew kiba sah. Nangta u ieng joit bad u wan shongkai noh bad u Kada hangta ha trai u Diengsohkpu.

Ynda ki la sdang iathuh khana bad lapur ia parom ia kane ia katai u Kada u la ong. "Shish phi um, ka pyrthei shiliang khmat aiu eh kaba kum kane. Imat wat ki blei hi ki bakla ban buh beit buh ryntih ia kiei kiei baroh," bad u da pynat de phaimong ka shyntur. "Kaei eh mo kaba haduh katta," la kren lyngngoh u Sniang u bym shym peiphang ei ei ia kaei kaba u Kada u kren. "Eh phi, tang ia kata ruh phim sngewthuh?" la ban ktien u Kada. "Peit hi seh, haduh katno ka jingshiliang khmat bad jingbakla jong ki blei," la ai nia u Kada, "phim iohi seh ba kiei kiei kiba thiang babang bad kiba rit ki soh sha jrong. Peit kum u sohpieng, u sohñiamtra, u sohmanir ki soh sha jrong, katba ki soh kiba buid, bym don jingmad bad

ba heh kum u klong, u pathaw, u sohkha pat ki soh ha khyndew. Ym dei kane ka jingbakla bad ka jingshiliang khmat ia ngi ki bym lait kiew dieng?" la kren kynnoh u Kada. Shi phrah u Sniang u sngew iahap jingmut bad kata ka jingpyni nia jong u Kada. "Ka dei phi um, kane te ka la dei ka jingleh shiliang khmat jong ki blei kumba phi ong ia ngi ki bym sneh kiew dieng," la shu pynbud maw sawa u Sniang.

Hangta hangta lei lei u kada u la sngewhieng haduh bym tipbriew tipmrad shuh. U pynjrang la ka khmut kum uba la ioh aiu re aiu kaba phylla. Hamar kata ka por ka lyer ka la pynkhih ia ki tnad jong u diengsohkpu bad uwei u sohkpu ba dangim u la hap trait halor ka khmut u Kada bad kram u la kyllon ha khyndew. "La jia aiu um?" la kylli lyngngoh u Sniang, u da beh artad ban iarah khyllie ia u, "Ade, ka ban iap phi sa khyndiat. Phim shym tohi seh ba hap kato ka sohkpu namar khmut jong nga. De, kato te ka ban rew sa khyndiat," la ong u Kada.

"Tang u sohkpu ruh haduh katto u pynshitom ia phi um!" la kren lyngngoh u Sniang, "ban da dei u pathaw te ym la dep hi soit?"

Baroh arngut ki sngewthuh ia la ki jingbakla. Ki leit wan noh sha la iing la iing kiba kham stad bad kham shemphang ban ia kaba ki la ju long.

U Nongbishar bastad

Uwei u nongkhati ula leit sha iew bad la u Kada ban thied jingthied ban wan kit sha shnong. Ynda ula dep thied dep pet bad pynkit ha u Kada, u la nangphah noh ia u sha khmat katba u pat u dang donkam sa katto-katne por ha iew. Hynrei namar ba u kham slem u Kada u la nang jam sha khmat bad la ka jingkit. Ynda u la buddien, um lap syrngiew syrngiet shuh ia u. U la kylli u la pyrthew na kat uba u iakynduh hynrei ym don mano mano ruh ba la iohi ia uta u kada. Kumta u la pyrkhat phlan ba la don mano re ba la ring tuh ia u.

Khatduh khatwai u la takynduh ia uwei u brieve uba riam jot sakthai uba laid na kata ka lynti. U la sahngheh khek bad u la kylli ia uta u brieve, "Phi tohi ia u Kada jongnga uba laid na kane ka lynti?" Uta u brieve i kumba u pyrkhat jylliew bad nangta u la kylli kylla ia uta u nongkhaii, "U ba dkoh shiliang ka kjat?" "Hooiid," la jubab pynkloi u nongkhaii; "ba matlah de shiliang ka khmat?" U la pynbud, "bad uba la lop de ki bniat na khmat? Uba kit ha kawei ka liang ka shini bad ha kawei pat ka liang ka mithai?" "Hooiid, hooiid," la jubab pynkloi u nongkhaii, "nga ngeit phi la tohi ia u bad phi tip hangno u don," la kylli u nongkhaii. Uta u brieve u shu peit lyngngoh sha u bad u jubab, "Em phi ma, ngam shym tohi ia u," bad u da laid noh artad bran bran la ka lynti. U nongkhaii, uba u la tharai skhem ba une u brieve u la tuh ia u Kada jong u, shisyndon u la nishan bad pharep ia u hakhmat u nongbishar.

U nongbishar u la tohkit bniah ia uta u brieve hakhmat ka jingbishar. "Lada phim shym tip ne tohi ia u kada; kumno pat phi tip ba u kada u long uba dkoh shiliang ka kjat, uba matlah shiliang ka khmat, uba la lop ki bniat bad uba kit ha kawei ka liang ka shini bad ha kawei pat ka liang ka mithai?" la kylli u nongbishar. "Nongbishar, shisha shisha, ngam shym tip ne tohi ia une u kada; hynrei nga tip pat uba kumno une u mrad. Katba nga nangiaid ha lynti nga lap ba don tang lai dien kjat, kane ka pynsgewthuh ba u Kada u dkoh shiliang ka kjat". "Te, kumno pat phi tip ba une u mrad u matlah shiliang ka khmat?" la kylli biang u nongbishar. "Namar," la jubab une u brieve, "ba une u Kada u bam phlang tang na kawei ka liang jong ka surok." "Kumno pat phi tip ba u lop bniat bad shiliang u kit ka shini bad shiliang u kit ka mithai?" la ban biang u nongbishar. "Namar, haba une u mrad u bam ia u phlang, u phlang uba napdeng um dkut satia," u la jubab. "Nalor nangta, nga lap ha kawei ka liang jong ka lynti ki boi ki dkhiew bad ha kawei pat ka liang ki boi ki skaiñ. Da kumta, nongbishar, nga tip au une u mrad u kit ha ka met jong u," u la pynkut,

Ynda u nongbishar u la iohsngew ia kata ka jubab, u la sngewtynnad shibun eh bad u la pynmih ka rai kumne—"Katkum ka jinglap jongnga, une u brieve u long uba hok bad uba stad; bad kane ka jingpharep ka long kaba khlem nongrim." Nangta u shaii kuna ia uta u nongkhati 50 tyngka bad u hukum ia u ban leit wad bha ia la u Kada bad ia kata ka 50 tyngka u ai buskit ha uta u brieve.

Une u nongkhati u leit wad la u kada bad u lap ia u ha kata hi ka lynti khlem don mano mano ba la ktah kti ia u.

U Bor Dorji bad U Konga Singh

Mynba u Konga Singh, u syiem thied mraw ki Shella; ia uba la thied 23 pen u sbai, u synshar kum u Syiem ka Shella; Ka Pahari Bazar ne ka Hat Phali kaba ki Khasi ki khot, ka long ym tang ka Hat shalan sohñiamtra kaba heh tam, hynrei ka long ruh ka pdeng jong ki barki bad ki dorji ha ka ri.

U la pynbna paitbah ban ai ka buskit kaba heh haduh 23 pen u sbai ia uno uno u dorji uba lah ban suh rajai rui kaba itynnad eh bad ba biang slait ha u. Hynrei uno uno pat u Dorji uba la rung ha kane ka jingathong u bym lah ban pynbiang katkum ki kyndon ba la buh un shah sympat Shrong Synrem 9 sien 9 wat ryngkat ka phyrnep arah 9 sien 9 wat ha pung Phali ha kata ka tlang.

La shongshit ki dorji ha Hat Phali. Hynrei kat uba ia shim bynta u shah rem ryngkat ka shah sympat shrong Synrem bad shah phyrnep arah ha pung Phali.

Khatduh la wan mih u Bor uba la nud ban ia ai-reng ha kane ka jingathong. Hadien ba u la pyrkhatsani, u la sdang ban suh ia kata ka rajai rui kaba itynnad haduh katta katta. Baroh kiba tohi ia ka kim lah khlem da pyrto bad tathuh khana. Hynrei baroh pat ki artatien la un jop ma ia kane ka jingathong namar ba u Konga Singh u long uba buittuh haduh katta katta.

U Bor, ba u ju suh jaiñ barabor ia u Konga Singh; u tip thik ia ka rynieng jong u. U la shua ia kata ka rajai ha kata ka rukom ba kan duna khyndiat ia ka rymeng u Konga Singh bad u don jingmut balei ba u leh kumta. Ynda la poi kata ka sngi ba la tabuh, u Bor u song khop ia ka bad u tyngkhap ia u diengkot riphin ha pohtit khnang ba yn nym don mano mano ba suba ei ei.

Tang shu poi ha ring Kashari, u Konga Singh da ka khmat kaba puh samrkhie u thiah ban thew ia ka. U lap ba ka duna khyndiat bad u mut ban pynjong ki kjat. Hamar kata ka por u Bor u kawut kysan slait na ki pohjat bad rut u Konga Singh u kynran bad khyrdut ki kjat. Sa shisien u pyrshang biang, hynrei u Bor u kawut kham tynggeh haduh ba u da shri hi laiñ, bad u hap ban buh la ki kjat hapoh jong ka rajai." "Biang ne em," la kylli u Bor. U Konga Singh u pyrshang ban ksaid hynrei u Bor um aili. u kawut haduh ba la at bylliang ki pohjat. Khatduh um banse ban kohnguh ba ka rajai ka biang. Shaw risa u paitbah. "La jop ka buit u Bor, la jop ka buit u Bor," ki la iapyrta. U Konga Singh u pyndem tuiñ ki ñiuhmat bad u hap ban sei lor 23 pen u sbai. Da ka khmat kaba kmen u la ong, "Ko Konga Singh, ko Syiem bakhraw kynmaw naduh mynta ban pynbiang la ki kjat katkum ka rajai." Shaw risa biang u paitbah ryngkat ka shad ryngkat ka kmen. Haduh mynta, kane ka kren syllok pharshi, "Khyrdut la ki kjat kat ban biang ka rajai," ka dang sah.

Ka Jingsuk bad u Nongthohdieng

Ha ki sngi jong u Biang, u Weiñ bad u Ramhah; la don uwei u briew uba duk bad ba shempap uba la im ha kawei ka shnong kaba ha jngai bah. Ka tnga jong u ka la lap noh bad u la hap ban ri khunrei lai ngut ki khun kynthei. Kumta u shu im kyndoi jakpoh da kaba leit thoh dienglap bad wan die sha shnong. Wat la ka jingim jong u ka long kaba tmang bad ba marwei, pynban ka dohnud jong u ka hun ka



tingen haba u iohi ba ki khun jong. Diakoit ki khiah
krad, ki san ki plung bad ki bhabriew. Nymphuii kum
ki 'naikhatsaw syñia.

Man ka sngi u hap ban leit sha khlaw ban thoh
diengiap. "Ka pap aiu kaba kat kane!" u ju kien
thnium wei briew wei briew katba u dangiaid ha lynti.
"Balei ki jingjynjar ki wan hap halor jong nga kum ki
'nambrap?" u kylli ha la mynsiem. Hynrei mano ban
jubab ia kita ki jingkylli bakthang jong ka dohnud
jong u!

"Ah, naei ngan ioh ia ka jingsuk! Mano keiñ
ban iarap lem ia nga?" U jaw ki ummat wei briew
wei briew hapneh ka miet badum. Hynrei, wat la
katta ki tyndung ia ka dohnud jong u, pynbin u ioh-
thiah suk mynsiem hapneh ki jingphoh sniew kaba pyn-
kmen suda ia ka mynsiem jong u.

Ha kawci ka sngi pyrem ba shit lhez u shongthait
ha trai jong ka dieng sohtait, bad tang shipor u ioh-
thiah ngai lngai. Ani! sangsot u bapli! Ynda u kyn-
dit na bathiah u lap ba ka sngi ka la ngop sha lyndet
ki lum. "La shoh ka pap," u la thnum rangbah,
"ngan leh kumno shuh! Ki khun jongnga kin sa
iapthngan." Katba u dang pisa jingmut marwei mar-
wei bad um tip shuh kumno ban leh, u la iohi pynban
laingut ki kynthei samla ba bhabriew haduh katta
katta ba ki leng hakhmat jong u. "Phi dei kiei?" u
la kylli. "Ngi dei ka jingsuk," ki la jubab, "bad ngi
wan khnang hangne ban iarap ia phi. Ngi dei lai ngut
shipara," ki pynkut. "Aiu phi lah ban iarap ia nga,"
u la kylli. "Namar phi kwah ia ka jingsuk, kawei
kawei na ngi ka lah ban ai kawei ka jingsuk shisien
ai. Pan bad kan sa long ha phi," ki la jubab. "To
ai ha nga ia ka spah bad ka ting kaba itynnad ba nga
bad ki khun jongnga kin shong," u la ong. "Khie
leit," ki la pynbud, "bad kumba phi pan kan long ha
phi." Ki jah noh artad jar.

U Nongthohdieng u wanphai sha la ting bad ha
ka jingphylla ka bakhrav u iohi pynban ia ka ting du-
paki ha ka jaka ka tingtrep tingtraw kaba myn-

shuwa. Na phyllaw ki khun jong u ki la wan tan ia u bad ki ialam sha ka miej-bam kaba itynnad ha kaba la buh ki jingbam kiba bang bathiang suda. "Pa, mynta ka sngi phi la wan dangshai," ki la ong, "ngi la thngan to ngin ia bam noh." U Nongthohdieng um tip shuh la u don harngai ne ha jingphohsniew. Hynrei ynda u khie mynstep u sngewthuh ba ka jingkren jong kito laingut shipara ka la urlong. Kumta, u im suk im saiū ryngkat ki shakri ki shakor ha ka jingsuk jingkmén suda. Hynrei ka don tang kawei kaba la pynsngewsih ia u bad kata ka long ba man ka step ki nongkhrong ki wan pyndik ha ka jingkhang jong u bad ki lok ki jor jong u kiba mynshuwa ki sdang ban bi-shni ia u. "Ngan leit biang bad wad ia ka jingsuk na kito ki laingut shipara," u la ong. Kumta, thiaw thiaw u leit sha trai jong kata ka diengsohtait bad u nam ia kita ki laingut shipara. Ha ka shikhyllip mat kine thuit kyntluit ki wan paw hakmat jong u. "Aiu shuh phi kwah?" ki la kylli. "Phim shym suk satia bad ka spah kaba ngi ai?" U Nongthohdieng bapli u la pyrshang ban batai bin-pa-bin ia kiei kiei baroh kiba u iashem "To koit kam lei lei," la ong kaba ar, "Pan, aiu pat mynta phi kwah?" U Nongthohdieng u khmied la ki khmat sha ki bad u ong. "To ai ha nga ia ka jingstad." "Khie leit sha la iing, baroh kan long kumba phi kwah," bad ki jah noh jar.

U Nongthohdieng mynta u long uba riewspah bad bastad. Ia ka nam jong u la bna kylleng. Hynrei u lap ba kane lei lei ka nangpynjynjar shuh shuh ia u. Baroh kiba sawdong jong u kim sngewthuh ia ki ktien stad jong u namar ki long kiba bieit bad ba duna. Ki jingkren baroh ki shu long kumba bret ha ka lyer. Kumta, u la kut jingmut biang ban leit ha kaba laisien ban wad ia ka jingsuk. "Lada, ha kane ka kynti ngam loh ia ka jingsuk, ngan pynkut noh syndon la ka jingim." U dem bad lai dem pyrkhath kaei ba un pan khatduh ka ban ai jingsuk ia u. Ha kaba khatduh u la lap, bad bak bak u leit sha kita ki laingut shipara. "Nga la shem ba ka spah bad ka jingstad ki nangpynjynjar shuh shuh ia nga," u la phla, "bad lada

kane ka jingpan kaba lai jongnga kam ai jingsuk satia ia nga, ngan pynkut noh la ka jingim." "Pan" la ong ka balai, "bad da puson bha aiu ba phin pan." "Ai ba kito baroh kiba sawdong jongnga kin long kiba riewspah bad ba stad kum ma nga," u la ong. Mar kumta ka jingsuk ka bym don thylliet ban batai ka la hap halor jong u. "Phi la pan la kaba dei eh," la ong ka puri, "suk uta u brierw uba kwah ba kiwei kin roh lem a ka jingsuk jong u."

Naduh kata ka por uta u Nongthohdieng u im-suk im-saiñ bad baroh ki brierw najngai bad najan ki ieit bad burom i u.

U Ramhah ba Banbein

Ha Sawthyndaw, u Tangrai bad ka Peiñ ki pynkha ia uwei u khun uba kyiteng u Synrangujrem. U long u khynnah uba heh, bajrong bad bakhlaiñ. "Une te un long u kynja Ramhah," la ong u kpa ha ka kmie, "peit tang ba u bam u dih bad u sa u plung. U palat liam na ki para khynnah baroh." Hynrei kawei kaba pynkhuslai ia ki ka long ba u long tohmet bad hunum tang ha lade. "Ngam tip shuh ynda u san u rangbah la shai la shisngi un long kumno!" u la ong.

U Synrangujrem, ynda u la sngewthuh la ka bor bad ba u rohi ba baroh ki tieng ki ma syrngiew ia u ka jingsarong ka la kiew ha ka shyarong khlieh jong u. U la sdang ban shoh ban dat bad lehbeiñ ia kat ki bymngait bymkohnguh ia u. Nangta u la sdang ban knieh bad leh jubor kat kat bamon. U Tangrai bad ka Peiñ kila pyrshang ban sneng ban kraw hynrei um salia brierw ia ki ruh. U byrngem u byrsit ia ki bad u leh kat kat kaba u mon. "Kane te ka ban poi sha khlaw," la ong u Tangrai. Ynda u rohi lei lei ba u sdang ban tamti tamjat ia kiwei u la sngewsih kthang. Hynrei u bapli um lah leh ei ei. Kumta u Synrangujrem u im katba mon bad u leh katba mon.

Da ki snem ki brierw ki im da kaba syier bad rit mynsiem, hynrei kim nud kim shlan pat ban ang tang shikyntien ruh. Tang la bakla wiak u shoh naphang u

dat naphang. Tang ban lait na u ki marjan marpa bad u shnong u thaw kim banse ban shu khroh bad pyndem ha u. Hynrei katba nangkhroh bad nangpyndem katta ka nang pynkronng ia u bad katta u nang lehsat. U hukum ia ki briew kum ia ki shakri bad uno uno uba nud pynteng ka khlieh u sympat u khyr-wit haduh ba un da jem hi jai.

Ynda ki sngew bym lah shah shuh ki khot ia ka durbar pyllun. La lum u tymmen u san bad u paitbah paitkar ban iapyrkhat kumno yn lch bad u Synrangujrem? Don kiba ai jingmut ban laleh da ka bor bad ieng lang da ka wait da ka stieh. Don pat kiba ong ba dei ban shu beh shnong noh ia u. Hynrei uba bun u sngewthuh ba kano kano na kita kan wanrah k' jingjot. Khatduh la ieng uwei u riewtymmen bad u la ai jingmut kumne—"Lada baroh ngi ieng tylli kawei, ngi lah ban pyndem ia u; lym kumta, kan wanhap ka tyrut ka smer ka byrsieh ka byrsang ha ka shnong ha ka thaw. Lada ngin aili kumne ruh, un iuhroit ia ngi na khlieh. Hynrei ka don kawei ka lad bad kata ka long—ba ngin kiar syndon bak na u; ngin nym iakren shuh lymne iajan iasham bad u ha kiei kiei baroh. Ngin sa peitkhai ai u kan jia ia u."

Baroh kiba ia don hangta ki sngewiahap bad kata ka jingai jingmut jong une u tymmen. Ki rai da ka durbar pyllun ba naduh kata ka sngi ym bit shuh ban iajan iasham bad U Synrangujrem.

Ha ka jinglyngngoh kaba khraw u Synrangujrem u lap ba ym don mano mano ruh ba kwah tang ban iakren ne iajan bad u. U Sah marwei lngung bad baroh kim phai tang ka khmat ruh. Kane kala pynjynjar sat ia u. U shem ba ym pat ju don jingtnog jingtmang lait na kaba baroh ki kiar bad ki isih lut. Kane ka jingsah marwei kala pynkordit sat ia u haduh ba ha kawei ka sngi ula mut ban pyniap noh ia lade. Dei hangta ba u kpa u sa kren ia u—"Sngewthuh la ki jingbakla ban leit panmap na uwei pa uwei u shnong u thaw; lym kumta men sah marwei shi junom" U Synrangujrem u sngewthuh la ki jingbakla bad u hap leit pan map.

Ka Duitara

Ha kawei ka hima, la synshar slem slem bah mynshuwa uwei u syiem uba runar shyrkhei haduh katta katta. Ki khun ki hajar baroh ki makhlieng masyrngiew tang shu bna ia ka kyrteng jong u. Haba u taid ha surok ki briew ki phet rieh kumba iohi ia u khla u thlen ioh ki sniewbok ei bad shah pynshitom kha-ma-kha.

Ia ka jingrunar jong u la bna kylleng. Wei la bakla um ju map iano iano ruh. U syllat na phang wat ia ki shakri kiba iaieit iajan eh ruh. Kumta, u im marwei kum u diengdyngkhong khlem lok khlem jor. Ki bakhaw batri ha ka hima ki isih ia u tang ba kim nud pynpaw. Wat ki para syiem para kmie ruh ki kiar bad ki isih tap ban ia-lang lok bad u. Ka tnga jong u ka tap swai da ki jingsngewsih namar ki kam runar kam kynsha jong u. U don tang uwei u lok uba u ieit bad jan eh ha ka pyrthei bad uta u long u khun marwei jong u hi uba dang samla lud uba kyrteng U Sngi. U long uba bhabriew, bastad, ba jemnud bad basbun. Ki khun ki hajar wat la ki isih ia u kpa hynrei kim lah pat khlem da ieit ia u Sngi.

Une u samla u don bun ki lok ki jor. U long u nongshong kulai uba snah bad u nongsiat khnem uba tbit. Kumta, u ieit ban shang ia ki khlaw ki btap bad ki lum ki wah ban tyor ban shikar. Bunsien, u la pynkyllon ia ki sier, ki skei, ki bthong, ki 'niangbri bad ki dngiem. Hynrei kaba u kham sngewtynnad eh ka long ban tyor dngiem namar ba u da ioh ban pynshad bad ia-khun ha ban da hun hi jut Bun tylli ki 'ngiem kait, ki 'ngiem-bah bad ki 'ngiem-sawreng ula pynkyllon bad u wan bah ia ki sha shong ryngkat ki lok ki jor ha ka phawar ka risa halor rynsan halor panat.

Ynda u syiem ula iohi ba u khun jong u ula hamer bad shlur than, ula khuslai bad wit jingmut eh. Um sngewshngaiñ ba u un ngam ia ki khlaw

ki btap, ki raieh ki raidam. Barabor u ju khroh ia u—"Kan myntoi aiu ia phi khun ba phin leh shlur haduh katne. Ngi lah ban phah da ki briew namar, ka khlaw barabor kam ju long kaba shngaiñ". Hynrei U Sngi um man pynshah shkor satia.

Ki sngi ki snem ki iaid bad ym shym la jia ei ei kaba sniew. U syiem ruh u la shu myllen. Ha kawei ka sngi pyrem bakhuid bad bapyngngad bha ka bneng u la mih marwei ban leit shikar sha khlaw. U sei-kulai tymmen ula maham ia u—"Peit Sngi, da sumar bha. Ban shikar dngiem marwei ka long kaba ma." U Sngi u rkhie sadheh bad ryngkat ka march u kren artad, "Wat khuslai, nga la sngewthuh."

Sniew khasiah sniewbok, U Sngi um shym wan phai ting ha kata ka miet. Ka jingdum ka sdang ban tap ia ki lum bad ki lhuh bad ki khlur ki sdang ban tyngshaiñ ha sahit bneng. U Syiem ula khuslai jingmut haduh katta katta. U la khot ia ki shakri shakor baroh bad u la kylli, "Hangno U Sngi," hynrei ym don mano mano ba nud ban jubab. "Khie mynta, wad ia ki lum ki wah, ki khlaw ki btap bad kynmaw uno uno uba wan rah ka khubor ba sniew shaphang jong u, ngan tyndung da u 'nar-saw na ka shyntur."

Madien ba kila ia wad katto katne por ki lap ia ka met iap jong U Sngi ba la tar lyngkhot lyngkhot da ka dngiem. Baroh ki la ia iam paid dohnud bad ker sawdong iaka met iap. Hynrei kumno pat kin iathuh ia kane ka khubor ha u Syiem? Dci hapdeng kata ka dumlyoh ngaiñ, ba u Sei-kulai tymmen u kynmaw ia u Shan rakhar masi. "Baroh phi tip ia ka nam jong U Shan," u la ong, "u shong hangtai ha shiliang jong kane ka wah bad u long u briew uba stad bad ba shemphang haduh katta katta. To mynta ngin ia leit baroh ban pan jingmut na u."

U Shan, ynda u la shah shkor bha ia ki jingia-thuh jong ki baroh, u dem ngun la ka khlieh bad u khapbrip tiaw la ki khmat. "To wat khuslai ei ei," u la ong, "ngan leh ia kaba nga lah baroh ban

tarap ia phi. Ka miet ka dangjlan bad ka step ka dangjngai. Thiah pynjahthait hangne harud dpei bad ieh ha nga ia ka kam."

Ki shakri syiem bapli kiba la thait na ka jing-taid lynti ki iohthih kum ki maw ki dieng harud dpei. U Shan u sei ia ki saisnieh bajwat bad u sdang ban khud ksai baroh shimiet khlem thiah wat tang shi khlip khmat ruh.

Dangstep phyrngap ki shakri syiem ki la kyn-dit na bathiah bad ki la lyngngoh lyngngaiñ ban iohsngew ia ka sur kaba ngiew kaba sawa ha ki shkor jong ki. Hangta ki iohi a u Shan ba u shong harud dpei bad ki thymprong halor ki ksai jong ka jingtem u da pynmih ki har rukom ki sur thik kum ka jingthaw kaba im. "Ia mynta ngin ia leit sha u syiem," u la ong. Kumta, ryngkat ki shakri syiem kiba kiah nakhlieh ha kjat ki rung ha kamra jong u syiem. "Ka khubor aiu phi wan rah," la byrthen u syiem. "Hoid paim kynrad," la jubab U Shan. Nangta u sdang bar tem ia kata ka jingtem dieng kaba u syiem um pat ju iohi mynno mynno. Ki ksai jongka ki shad ki kynther ha ki kti jong U Shan bad pynmih ia ka sur kaba ngiew jong ka khlaw hi, i kumba ka da lade hi ka wan ban iathuh aiu bala jia bad U Sngi. Nangta ka wan kajingsawa kum ka jingpah jong ka dngiem bad u khla : bad kumta hi ki ksai ki patied kum ka sur ngiew jong ka jingpyrta jong u briew "rap . raprap !" bad ka jah noh jar. Nangta ka bud sa ka jingkyrhuh bad jingkhynwin jong ka khlaw kaba sngewngiew ban sngap. Baroh kiba iohsngew ia ka sur jong ka ki khynñih da ka jing-tieng bad jingsngewshyrkhei—kumba ka iathuh ia kaei kaba da jia shisha bad U Sngi. U Syiem ula bitar lep, "Me wanrah ka khubor kaba sniew, ka khubor jong ka jingiap u khun jongnga?" U la kynhet. "Me tip em kaei ka bainong ia kum uta u nongrah khubor?" Hynrei U Shan da kaba jem u la jubab, "Ko Paim kynrad, ngam shym iathuh ei ei kaba sniew naka shyntur jong nga. Lada phi bat ia ka kular to ai ba ka jingbitar jongphi kan hap halor kane ka jingtem kaba nga ai kyrteng

“Ka Duitara”; dei ma ka kaba iathuh ia kane ka khubor basniew.”

Ha ka jingbitar u syiem ula hukum ban sam narsaw ia ka duitara haduh ba ka pliang jong ka kan da pei thliew. Lymda dei ka jingstad bad jingshemphang jong U Shan Rakhar Masi, baroh ki shakri syiem kin jin da la shah tynruh narsaw na shyntur. La ong ba u khun Khasi Khara naduh kata ka por u pynlong ia ka ‘Duitara’ ka jingtem jongki. Lyngba jong ka, ki Rangkyndoi ki ud ki iom lyngba ki rta ia ki khana myllung khana tym-pang ha ki tnum-ba-soppring sawdong ki lyngwiar dpei ka ri shara iashai, bad dei ha ki tymprong ki ksai ka duitara, ka hyndai, ka mynta bad ka lashai ki iakynduh lang.

U Tymmen bad ka Lyer

Slem bah mynshuwa la don uwei u tymmen nongrep bad la ka tnga. Ki la long kiba duk haduh katta katta. Kim don ei ei shuh ha iing lait tang shi shang u riew hadem. Ka tnga jongu kala ai ha u ia kata ka shang ban leit sha u nongtylliat riew hadem ban tylliat skam ia u khnang ba ki lah ban shet ja. Ynda uta u tymmen ula wan phai na ka jaka tylliat, kynsan kynsan ka lyer kaba jur kala beh ha lynti. Ka la kit lut ia uta u riewhadem bala dung skam haduh ban da lut hi phoiñ. Ula wan phai sha ting da kaba sngewsih bad ula iathuh hala ka tnga ia kaei kaba la jia baroh. “Ka apot sep sngi aiu sha ia nga” ula trud khlieh wei-briew wei-briew, “Ngin dangleh aiu shuh mynta haba ka lyer kala rong lut ia ki skam riew-hadem? Mynta ngim don eiei shuh ban bam bad ngi la dei ban shah thngan.”

“Khie leit shisyndon ban pan noh iaka na ka lyer,” la byrthen ka tnga, “lym kumta men nym ioh ja shuh na ki kti jongnga lano lano ruh.” U tymmen bapli, da kaba sngewsih ula mih nala ting ban leit ia kynduh ia ka lyer. Thop shi thop ula taid lyngba ki madan bad ki lum, ki law bniap

bad ki rashing lum bad ynda ula thait hi ian ula poi harud kawei ka lawbah lawsan. Ynda ula khmih syntiat shane shane shatai shatai shapoh jong kata ka lawbah, uba lap iohi kumno re kumno ia kawei ka iing trep. Bran bran u la leit shata bad ula rung hapoh jongka. Hangta ula iohi ia kawei ka tymmen kaba shong halor mula. Ynda kala iohi, kala kylli ia u da ka jinglynengoh, "Balei parad phi wan poi shane?" "Oh! nga wan wad ia ka lyer", la jubab u tymmen. "Ba pnin leh aiu ka ban ia kynduh bad ka?" la ban ktien biang kata ka tymmen. U tymmen bapli ula iathuh ia kaba la jia baroh bad kumno ka tnga jong u kala byrngem ia u ba um dei satia ban wan phai sha iing tad ynda ula loh biang ia u skam riewhadem uba la rong noh ka lyer. "Koit koit, kam pher ei ei", la jubab pyntngen kata ka tymmen, "Phi la wan poi sha ka jaka kaba dei eh. Kane ka dei ka iing jong ka bad ma nga pat, nga dei ka kmie".

Nangta kata ka tymmen kala ai jaka shong ia u katba ka nang khreh bam khreh dih. Ynda kumba ar kyntien kwai ne, ka lyer kala wan phai nala ka jingleit jong ka. Da ki ktien kiba jem jali jam, ka tymmen kala kylli iala ka jong ka khun, "Te, balei keiñ khun phi la rong noh ia u skam riewhadem jong une u tymmen bapli bad mynta ula dei ban shah jingit?" Ka lyer kala kyndit thret bad kala ong, "Parad, wat leit sngewsih ho ia kaba la jia baroh. Ngan ai ia phi kawei ka jingai sngewbha bad phin nym babe shuh lano lano ruh". Kumta ka lyer kala sei lor kawei ka jaiñ siang miej ka da ong, "phi tang shu ong ia ka—siang khuid bad itynnad ryngkat ka bam ka dih namar jongngi baroh, kumne kumne kan pynbiang ia ki jingdonkam jongphi".

U tymmen u la shim ia kata ka jaiñ siang miej da ka jingsngewnguh bad bran bran ula khreh ban leit phai noh sha la iing. Ha lynti une u tymmen ula kren wei briew wei briew. "Tip ei, ka long ne kam long kaba shisha? To ngan shong thait

noh hangne bad ngan pyrshang", ula shim ia ka jaiñ siang miej bad ula ong, "siang itynnad bad khuid bad wan rah ka bam ka dih namar jongnga". Kumne kumne ka jaiñsiang miej kala siang ialade bad ha khmih ka bam ka dih kaba bang ba thiang kane ha khmat jong u. Da ka jingkmén kaba khraw ula bam ha ban da pyrkhing triang. U khylliap biang ia ka bad u sdang la ka jingleit. Ha lynti ula hip sah miet ha ka ting jong kawei ka tymmen. Kane ka tymmen ka long kaba riewspah bad kaba buit tuh bad ba shait leh klop Da ka jingsianti kala kylli ia uta u tymmen, "Ko parad nangno phi wan bad shano phin leit?" Oh! la jubab u tymmen, "Ka lyer kala ai ia nga kawei ka jaiñ siang miej kaba phi tang shu ong ia ka, 'jañ siang miej, siang khuid bad itynnad bad pynbiang ka bam ka dih ia nga, kumne kumne kan pyndap ia ka jingkwah jongphi baroh".

Ka tymmen kala leh lyngngoh lyngngaiñ. Ha la ka mynsiem kala kwah ban ioh ia ka. Katba u tymmen bapli u dang toh thiah lyngngai na ka jingthait jong ka jingleit, kane ka tymmen shukor kala khie joit shiteng miet bad kala bujli noh ia ka. Dang step phyrnga u tymmen ula khie joit na ba thiah. Ynda ula ai khublei ia ki ba ha ting baroh, u la shim la ka jaiñ siang miej bad ula leit hala ka lynti sha la ting. Tang shu poi tiap ha jingkhang, da ka jingkmén ula khot ta!a ka tnga, "Nga la ioh ka buskit kaba kat ka buskit na ka lyer," u la ong. U la shim ia ka jaiñ siang miej bad u la hukum ia ka, "siang khuid bad itynnad bad wanrah ka bam ka dih namar jongngi". Da ka jinglyngngoh kaba khraw ka jaiñ siang miej kam shym la kohnguh satia ia u. Ka tnga jong u kala tim kala tla bad kala beh ia u na ing ka da ong, "Khie leit bak bak sha ka lyer bad ong ia ka ba kan ai noh ia u skam riew hadem. Mem bit satia ban wan phai sha ting tad ynda me la toh ei ei naka."

Da ka jingsngewsih ula leit paw biang ha ka

lyer bad ula bathuh ha ka la kiei kiei baroh kiba la jia ha u. "Wat nym dukha ei ei parad," la ong ka lyer, "shim kane ka khun langbrot, phi tang shu ong ia ka, 'Langsohmoh, 'Langsohmoh, kynther kynther, kumne kumne kan kha ki tyngka ksiar tyngka rupa katba phi donkam."

Da ka jingkmén kaba khraw une u tymmen u la khreh ban wan phai pat sha la ting. Ha lynti, namar ba lap miet u la leit sah miet biang ha kata hi ka juh ka ting jong kata ka men riwspah. Ynda kane ka tymmen ka la tip ia ka dor jong kata ka Langbrot, kala kyliang noh ia kata ka Langbrot kumba ka la leh mynshuwa bad ka jai siangmiej.

Dang step phyrngap une u tymmen da ka jingkmén ula leit beit beit sha la ting kumba mynshuwa. "Ai u shylliah," ula ong ala ka tnga, "Ka lyer kala ai ia nga mynta ka kynti da kane ka khun langbrot kaba kha tyngka. Nga tang shu ong ia ka" "langsohmoh langsohmoh, kynther kynther, kan kha ki tyngka ksiar tyngka rupa kumne kumne katba ngi donkam." Myrrei, ynda u la pyrshang; ka kha pynban phrait-rai-rai da ki eit iong suda shi shylliah. "Khun ka pohait," la byrngem ka tnga joig u, "Men leit bak bak sha ka lyer mynta mynta hi, bad da lei lei ruh mem dei ban wan phai sha ting tad ynda me la loh ei ei kaba thikna na ka, me iohsngew ia kane?" kala dumok.

Da ka jingsngewsh bym lah ong u tymmen ula leit phai pat sha ka lyer. Ha kane ka kynti ka lyer kala ai ia u kawei ka reng muid kaba ityn nad. "Phi tang shu, ong ia ka, 'reng reng; na ka reng baroh ki seng' phin loh pat ia baroh kiba, phi la duh mynshuwa." Ha lynti, u tymmen ula pyrshang ia kata ka reng bad ula ong, "Reng, reng na ka reng baroh ki seng." Kumne kumne la mih arngut ki Rambah bad kila pduh la tangen ia u da ki diengduh haduh ba un da jem jai,

tad haduh ba u lap kloi lan ban ong, "Reng reng, hapoh to seng," ba kita ki ramhah ki sa rung biang hapoh.

"Mynta te ngan sa hikai la katai ka tymmen shukor," ula kren wei briew. Kumba mynshuwa, ula leit sah miet ha ting jong kata ka men riewspah, "Phi loh aiu mynta ka kynti pat?" kala kylli. "Oh" ong u tymmen, "Mynta ka kynti te nga la loh kaei kaei kaba da phylla shisha" "Kaei kata mo?" la ban ktien ka tymmen. "Ka reng keiñ, kaba na ka ki kha lut kiei kiei baroh ha ka pyrthei. Phi tang shu ong, 'Reng, reng; naka reng baroh ki seng, phin loh lut ia kiei kiei baroh ha ka pyrthei. Te, namar bala miet bad bala thait ngan shu leit thiah noh". U da buh ia kata ka reng hangta bad u leh mynleh leit thiah noh hapoh ka kamra. Tang shipor u tohsngew ia ka jingiam jinglynñiar "Rap nga la lap, rap nga la lap" ka sawa na ka kamra jong kata ka men riewspah. Ka khun jongka ka la mareh ban khot la uta u tymmen bad ban larap ia ka kmie jongka. Ynda ula poi ngong hangta ula iohi ba kita ki ramhah kila tied kila tangon ia ka khlem jingisynei. "Khun ka shukor" ula byrthen, "phan pynphai ne em ia ka jaiñ siang miej bad ka khun langbrot jongnga, lym kumta ngan pynduh mynsiem soit ia pha." Kata ka tymmen kam banse shuh ban bthah iala ka khun ban pynphai noh ia kiba la tuh baroh na uta u tymmen. Ynda uta u tymmen ula sngewthuh ba ula loh pat ia kiba ula duh u sa ong, "Reng, reng; hapoh to seng," ba kita ki ramhah ki sa rung bad shong khop hapoh, ka reng.

Da ka jingkmien kaba ym don thylliej - ban batai, u tymmen ula wan phai pat sha la ting. Bad da ka jingkmien ka tnga jongu kala pdiang sngewbha ia u. Naduh kata, ka por kine ki arngut ki tymmen ki im suk im saiñ haduh ba kin da khlad noh na kane ka pyrthei.

Ka Siangpanai

Slem bah ha kawei ka hima la don u Syiem bad ka Mahadei. Wat la ki la don shibun ka spah ka bazar bad ki shakri ki shakor, ryngkat ka iing paki iing dulan pynban kim long kiba kmen. Kane ka long narnar ba kim don khun. Baroh arngut ki ju tapasiaw ieit iwei ia iwei pat ha ki ummat—"Ah! ba ngin jin da la loh tang iwei i khun!" Hyarei ia kata ka jingkwah bad jingangnud jongki, ki blei kim shym la jubab satia.

Ha kawei ka sngi bakhuid phyrnai bha ka bneng ka Mahadei kala leit sum wei briew ha Wah Soh-pairah. Katba ka dang shong harud ka shyngiar kaba noh phum phum harud jong ka pung, kynsan kynsan ka jingsngewsih aiu re kala wan tap halor jongka. Ki ummat ki la jaw kum ka um ba jreia na shyngkup mawsiang. Kumta kumta hi, kawei ka hynroh kaba heh kala wan mih na krem jong kata ka pung—"Mahadei, wat tam wat sngewsih," ka la pyntngen, "ha khmih phin sa kha kawei ka khun khynthei bad phin khot kyrteng ia ka Ka Siangpanai," bad tang shu kut kita ki kyntien ka noh de plom hapoh um.

Ki ktien jong ka hynroh ki pyntyndit thret ia ka mahadei. Ka wan phai sha la iing da ka jing-kmen bad kam shym la iathuh briew hano hano ruh.

Thik kumba la iathuh lypa ka hynroh, ka mahadei ka kha iwei ikhun kynthei iba bhabriew baduh katta katta bad la pyndap shoiia ia ka iing syiem da ka jingkmen. U Syiem ruh kum ka dak jongka jingkmep ula pynbna ban pynlong ka jingkhawai kaba khraw bad ula khot lut ia kiba bakhraw batri, ki khun-shnad khun-long bad ki lok ki jon baroh. U la mut ban khot kyrpang ruh ia ki khatlai ngut ki puri kiba don haka hima jong u ba kin wan kyrkhu kyrdoh ia ita i khunlung. Hyarei sniewbok sniew khasiah, namar ba u don tang khatar tyli ki piang ksiar u la khot tang khatar ngut na ki.

Ka jingkhawai kaba kat ka jingkhawai, kaba ym pat ju don mynno mynno ha ka parom jong ka hima. Baroh ki dap da ka jingkmén jingsngew-bha bad ki kyrkhu kyrdoth ta i khunlung. Ki puri ruh, ynda ka la poi ka pali jong ki ki la ta ai mar mar ka kyrkhu sharyngkuid. Kaba nyingkong ka la kyrkhu ba in long iba bhabriew, kaba ar kala kyrkhu ba in long iba jemnud, kaba lai kala kyrkhu ba in long iba stad bad kumta ter ter haduh khatwei ngut. Hynrei hamar kata ka por wan poi ka puri kaba khatlai kaba ym shym la khot satia sha kata ka jingkhawai. Da ka jingbitar ka la tim ta ita ikhunlung—“Ha ka snem kaba khatsan ka khun u syiem kan thar shiah sohmren bad kan tap hashen.” Kumta kumta hi ka jah noh jar. Ka jingtieng kala par kum u niangkhiat ha baroh kiba tadon ha kata ka por bad ki shu ta peitseh iwei ta iwei pat. Hamar kata ka khyllipmat ka puri ka ba khatar ka bym shym la ai la ka kyrkhu kyrdoth ka la jam sha khmat bad ka la ong, “Ym ka jingtap, hynrei ka jingtoh thiah shispah snem.”

Ka jingkren jong kane ka puri kala pyntngen khyndiat ta u syiem bad ka Mahadei, hynrei u lyoh jong ka jingtieng pat u sdien hi ldui kum u lyoh tong halor jong ki. U la hukum ba dei ban pynduh dyngkhong khait ta baroh ki dieng sohmren ha ka hima.

Katba ki sngi ki snem ki nangtaid Ka Siangpanai ka nangsán nangplung kumba la kyrkhu ta ka da kita ki puri. Baroh kat kiba tohi ta ka kim lah khlem da sngewieit bad tapbieit ta ka jingbhabriew jongka.

Ha ka sngi ba ka Siangpanai ka dap khatsan snem pura thik, jia ryngkhat ba u syiem bad ka mahadei ki dei ban leit jingleit. Kumta, ka Siangpanai ka toh lad ban khih ban shang katba ka mon hapoh ka ting syiem. Khatduh kala plie ta kawei ka jingkhang rim kaba lam sha ka bynta jong ka kut kaba rim. Hangta ka la tohi ta uwei u dieng Soh-

mreh phyrngop uba teng hangta ryngkat ki soh ba la ih jngum stem bha. Ka la jawdud bad kala kner la ka kti bad kheit ra ki. Ha kata ka por uwei na kita ki shiah ula dung ia ka kti jongka bad kala kyllon samthiah hangta hangta hi. Kumjuh ruh kata ka jingsamthiah ka la par ha ka ting syiem baroh kawei.

U Syiem bad ka Mahadei ki wan phai na la ka jingleit ryngkat bad ki nongbud nongrap, ki kulai ki hati, ki lohthiah lynngai hapoh jong ka ting syiem. Hoid, wat ki skai, ki pyrjong, ki siangkaw, ki sim bad ki syiar ki lohthiah lang baroh. Naduh kata ka por ym don banud bishlan ban leit sha kata ka ting syiem bad da ki snem snem ka sah hangta. Baroh sawdong jongka la tap da ki shiah semiong shiah maileh kiba btiap haduh katta katta bad haman la uwei pa uwei pat u dieng uba teng haka kut jong ka ting syiem ki sdien ki tiewkhmatparo kum ki soh ksiar soh rupa kiba itynnad bad iphuh iphieng haduh katta katta.

Hadien phew phew snem, ki tymmen ki ju la tuh khana shaphang ka Siangpanai, ka khun syiem ba lohthiah hapoh jong kata ka ting syiem; hynrei kat kiba nud ba shlan ban jam sha ta, ki shiah semiong shiah maileh ki teh ki khum ia ki bad ki tap ha ka shitom ka kordit namar ym don ba lah satia ban pyllait ia ki.

Slem slem bah la kha ta uwei pat u khun syiem ha kata ka hima. Ynda ula samla ula lohngew ia ka khana shaphang ka Siangpanai na uwei u tymmen. Shisyndon u la kut jingmut triang ban leit wad ia ka. La une u tymmen ula pynkiuh pyntieng ia u katno katno ruh um lah. Hynrei bhabok ba kata ka shispah snem, ka la dei ban kut noh bad ba kata ka jingtim jong ka puri kan dkut noh.

Katba u nanglaid sha ka phang jong kata ka ting syiem u la pyniaw triang ia lade. U lohi ia ki tiewkhmatparo kumba la tathuh ba ki sdien ha.

man la u dieng. U la prong lynti bad maít la kita ki shiah da ka waitlam jong u hynrei kim teh kim kyllaiñ satia ia u. Khatduh ula rung ha ki khyrdop jongka bad u la iohi ba ka iing syiem baroh kawei ka dap da ka jingkynjah bad jingjar-jar. Baroh ki iohthiah lyngngai kumba la iathuh. U rung na kawei ka kamra sha kawei pat bad khatduh u poi ha kata ka jingkhang rim bad ynda ula plie bad rung hapoh u shem ba ka Siangpanai ka dang iohthiah lyngngai ha ki syrngiew jong ki tnad diengsohmren. Ka jingbhabriew jongka kala pynpluh u ka dohnud jong u bad mar mar kumta hi u la kem jingieit. U la tur shajan ban kner la ka kti bad doh ia ki rymmian shyntur jong ka, hamar kata ka por ka Siangpanai ka kyndit thret bad ka khyllie ki khmit. Hangta hangta lei lei ka jingieit jong u ka nangjur nangjur. "Hangno kumne nga don," ka Siangpanai ka la ong, "nga ruma ne nga don ha ngai?" ka la kylli, "bad slem katno nga la thiah?"

Mar kumta, ka jingim kala wan 'biang haka iing syiem baroh kawei bad ki shakri shakor ki sdang bunkam biang kumba mynshuwa. U Syiem bad ka Mahadei ruh ki kyndit na kata ka sharyngkuid jingiohthiah bad mar kumta hi ki kynmaw ia la ka khun. Hamar kata ka khyllipmat ki iohi ia ka ba ka wan s'ia ki, ka da snoh kti ha uwei u samla uba bhabriew haduh katta katta. Kane kala pyndap miar da ka jingkmén ia ka dohnud jongki. Ynda uta u samla ula iathuh ia kiei kiei baroh, u Syiem bad ka Mahadei kumta kumta hi ki la hukum ban pynkbreh ia ka jingpynhiar synjat hapdeng ka jingkmén ka bym don thylliet ban batai.

Ki 'Tiensneng Tienkhrav U Kpa

Slem bah mynshuwa la im ha kawei ka nongbah uwei u tymmen bad lai ngut ki khun shynrang. U la long uba riewspah eh bad u don shibun ki bri ki bsah bad ki lyngkha ki risai kiba u la ioh da ka jingtrei shitóm.

Shuwa ba un iap, kata, katba u dangthiah ha ka jingthiah pang u la khot kyrpang ia baroh lai-ngut ki khun. Ha uba nyngkong u la ong, "Ko khun nga kwah eh ban ai ei ei ia phi shuwa ba ngan leit noh. Kano phin jied na kine, Ka spah ne ki 'tiensneng 'tienkraw jong nga," Mar kumta kumta hi u Khun nyngkong u la jubab, "Pa, ai ha nga ia ka spah bad ki lyngkha ki risa khnang ba nga lah ban im suk im saiñ ynda phim don snuh. Ki 'tiensneng 'tienkraw jong phi, hoid, ki long kiba donkam, hynrei ngam lah ban im tang da ki," u la pynkut. U kpa u la ai ha u mar-shiteng ti ka spah jong u baroh ryngkat ki lyngkha ki risai; bad une u khun nyngkong u la leit noh da kaba kmen. U kpa u la buh ki juh ki jingkylli ha u khun uba ar bad u ruh u la pan kumba u hyamen jong u ula pan, bad u kpa u la ai ia kaba sah shiteng baroh ha u.

Khatduh eh u wan uba lai. Da ka khmat kaba puh samrkhie u la kylli ia u, "Ko khun, kano phin jied na kine ar - Ka spah ne ki 'tiensneng 'tienkraw jongnga? Nga sngewthuh ba satang shipor ng n sa leit noh." U khun uba khatduh u jaw ki ummat haba u lohngew ia kine ki kyntien u kpa. Da kaba paitdohnud bad sngewbynnud ia la u kpa u la ong, "Ko Pa, ngan leh aiu ka spah ka hajar haba phim don shuh. To ai ha nga ia ki tiensneng 'tienkraw jongphi ki ban lai im lynter wat hadien bala khlait ka khmat jongphi."

Ka dohnud u kpa ka la shad kmen da ka jingieit bad u la piam khak ia u slem s'em. "Ko khun," u ong, "tang ma phi phi long u khun uba pynkmen iaka dohnud jongnga. Peit shane... kynmaw ba ynda nga iap, wan sha ka jingtep jongnga ha ki lai miet shuwa ban kyndit lai-ia. To khie leit da kaba suk, U Blei un don lem bad phi."

Shen hadien kane une u tymmen ula ap noh bad la tep ia u ha kawei na ki kper jong u hapoh syrngiew jong ki diengsoh. U khun uba

khatduh ula leit sha ka jingtep u kpa kumba la btbah Hangta, ula sdang ban lam namar ba u kynmaw ieit la u. Hamar kata ka por ula loh-sngew ia ka jingpah u kulai hajan jong u. U pynphai ia la ki jorg ki khmat bad u iohi ia u kulai tong bala pynriam kynshreng. Mar kumta kumta hi u kulai u la kren, "Wan hajan jongnga bad ong shano ba ka mynsiem jongphi ka kwah ngan kit ia phi". Hynnei u khyannah bapli ula jubab, "Ngam lah ban leit bad phi namar nga don shibun ki jingri jingdup ban sumar." Katba u dang spud ieit ia ka khlich jong u, u kulai u la ong, "Lehse phin donkam ia nga ha kawei ka por. Phut katto katne ki shñiuh na u syntai jongnga bad ha kano kano por bapli donkam thang uwei na ki bad ha ka shikhyllip mat ngan wan paw." Mar kumta kumta hi u jah noh jar, Une u khyannah u song bha ia kita ki shñiuh bad u wanphai noh sha la iing. Ha ka miet kaba ar katba u dang am pangnud ia la u kpa, u la lohsgew biang ia ka jingpah kulai. U phai la ki jong ki khmat bad ha kane ka kynti u iohi da u kulai sawbthuh, kynshreng bala pynriam kham itynnad ban ia u kulai tong. "Kiew halor ka met jong nga," u la ong "ngan kit ia phi kat haba ka mynsiem jongphi ka kwah." Ha kajuh ka rukom une u khyannah ula jubab, "Ngam lah ban leh kumta namar nga don shibun ki jingri jingdup ban sumar." "Lada ka long kumta, phut katto, katne tylli ki shñiuh na u syntai jongnga. Ha kano kano ka por ba phi donkam ia nga, thang uwei na ki bad ha kata hi ka khyllip mat ngan paw hakmat jongphi." "Une u khyannah ula song bha ia kita ki shñiuh bad ula wanphai noh sha la iing. Ha ka miet kaba lai ula leit biang bad katba u danglam namar la u kpa u la lohsgew biang ia ka jingpah u kulai. Ha kane ka por ula iohi sa ia u kulai lieh uba la pynriam bha bad itynnad haduh katta katta. "Kiew halor jongnga," u la ong, "ong, shano ba ka mynsiem jongphi ka kwah ban leit ngan ia lam ia phi." U khyannah bapli ula shu jubab, kum

ba mynshuwa, "Nga don shibun ki jingri jingdup ban peit kumta ngam lah ban leit." "Lada kumta, ong u kulai lieh, "phut katto katne ki shñiuh na u syntai jongnga bad ha kano kano ka por ba phi donkam ia nga, thang uwei u shñiuh bad ha ka shikhyllipmat ngan wan paw hakhmat jongphi," bad u jah noh artad jar. Une u khynnah u song bha ia kita ki shñiuh bad u wanphai noh sha la iing.

Te, ha kawei ka sngi katba u dangialam bamphlang ia la ki jingri jingdup harud ka jingtep jong u kpa, u la kum tohsngew ia ka jingpynbna jong u syiem ba uno uno u nongshong kulai uba lah ban pynher bad kiew ia ki sawphew kyndon jong ka jingkieng khlem sahgeh, un long u Kaptan jong ka kynhun shipai bad un shongkurim ruh ia ka khun marwei jong u Syiem, bad la buh miat lai-sngi ban pyndep ia kane ka kam. Ki nongshong kulai bad ki khun syiem khun patsha na sawlyer jong ka pyrthei kila wan ialum ha ka lypung hakhmat ka iing syiem. Hynrei baroh kiba la ia pyrshang kim lah ban pynmareh wat tang shiteng ruh. Khatduh eh la wan poi une u samla ha u Kulai tong bad ula pynmareh thiaw thiaw haduh 20 kyndon bad u sangeh khek. Ha ka sngi kaba ar ruh ym don mano mano na ki nongshong kulai kiba lah ban pynmareh la ki kulai wat tang 15 kyndon ruh. Ha kane ka sngi une u khynnah u la shong da u kulai Sawbthuh bad ula mareh bait bait haduh ba la jan poi hynrei u sangeh noh thek. Baroh baroh, da kaba kynjiak kynjak ki takren satang ia uta u nongshong kulai, hynrei ym don batip pat u dei uei. Ha ka sngi kaba lai, une u samla u la shong da u kulai lieh. U la mareh bait bait khlem don jingwit ei ei baroh 40 kyndon bad u sahngah thek ha ka jaka bala buh. Shaw risa u paidbah bad jraiñ ki riew ki bom ki nakra; hynrei mar mar kumta kim lohi shuh ia uta u nongshong kulai. Kane kala pyn-lyngngoh lyngngaiñ ia baroh.

Ha ka sngi kaba saw u Syiem ula pynbna ban don ka jingialum lang jong ki shipai, ryngkat ki ba khraw batri bad ki khun shnat khun long baroh. Ynda baroh kila ia poi une u samla ula mareh kum ko lyer ha u kulai lieh bad ula sahnggeh thek ha khmat u syiem. La don ka jingleh kmen kaba khraw ha kata ka sngi bad ha kata hi ka sngi la pyndep taka jingpynbiar synjat bad ka khun u syiem.

Ki hynmen, ynda ki la tohi ia la u para ki sa sngewthuh; "Pleng, ki jingsneng jingkraw i pa ki long kham kordor ban ia ki spah baroh ha ka jingim."

U Mushi bad u Syiem

Na kano ma ka daw ym don ba tip bad nga ruh ngam tip, shisien u Syiem ula bitar tynggeh tynggeh ia uwei u mushi. U la ai ka hukum ba dei ban khang khyrdep shisyndon taka dukan jong u. "Ngan leh kumno?" ong U Mushi u bym bna ei ei kaei bala jia, "nga hap ban kohnguh ia ka hukum jong u". Kumta, u la sdang noh da kaba leit thoh dieng-lap bad wan die ia ka ha shnong. Namar ba u long uba phikir bad u bym ju bam ju dih, u loh ka peisa kaba biang ban pyndep ia ki jingdonkam jong ka ting baroh kawei.

Ha kawei ka miet u Syiem u la kwah ban tip ka jia alu bad une u Mushi. U la riam ia lade ha ki jaiñ kiba pher bad ula leit wad jaka sahmiat ha ting jong u. U Mushi ruh ula khot sngewbha ia u bad u la ai ka bam ka dih kaba pura. Hapdeng ka jinglathuh khana, u Mushi u la kren khium pyrshah ia u Syiem. "Phi i lok," u la ong (namar ba um tip ba uta u lok uba wan sahmiat u dei hi u Syiem) "u syiem atu uba kum une. U phah khang khyrdep ia ka dukan jongnga khlem daw. Hato u thmu ban pynlap thngan pynlap-jingit mo ia ki khun jongnga? Hynrei nga don ki kti ki kjat bad mynta nga shu

leit thoh diengap. Kumta nga shu dap bam hi u la pynkut. Hadien bala dep bam ki leit thiah noh la la ki jingthiah.

Dangstep phyrngap u Syiem ula mih noh na ting u Mushi. U la ai hukum ba u Mushi u dei ban wan iakynduh ia u. "Ka pap aiu kaba kum kane, "u la thnum wei-briew wei-briew," "hynnin u la phah khang khyrdep ia ka dukan. Mynta pat un leh atu ba u phah ia nga." Ynda u la poi ha khmat u Syiem ula hukum ia u ban long u nongap jingkhong. U la ai kawei ka talwar bad shiriam ki jingriam shipai. U Mushi uba ju mlien ka trei ka ktah, u la shu sngewbtai kaba shu shong baroh shisngi. U la sei la ka tari bad u la shna talwar da u dieng kaba kum ka jong u syiem hi thik. Ha ka por janmiet u syiem ula phah noh ia u sha ting khlem siew ei ei ruh em. "Kumno ngan leit sha ting," la pyrkhat u Mushi, "ngan bam da ei mynta ka miet?" Hadien ba ula pyrkhat kala shoh ha ka jingmut jong u ba un thep da ka talwar dieng hapoh ka sop bad ba un die noh ia ka talwar u syiem ha lew khnang ba un loh ban thied jingbam ia lade bad ia ki khun.

Ha kata ka miet, u Syiem kum u riewphylla ula wan pan ting basa biang ha ting u Mushi, namar u kwah ban tip aru u Mushi u leh bad kumno u sngew ia kata ka jinglong nongap jingkhong jong u. U Mushi ruh u khot sngewbha ia u bad u ai ka bam ka dih kaba biang Ynda kila iathuh khana kai ia kane ia katei, khatduh u Mushi u ong, "U Syiem bieit aru uba kum une. Nalor ba ula phah khangkhyrdep iaka dukan jongnga, u pynlong pat ia nga u nongap jingkhong uba khlem siew baisngi. U pyrkhat kumno ngan im. Hynrei phi tip kumno nga leh? Nga shna da ka talwar dieng bad thep hapoh ka sop katba ia ka talwar u syiem nga die ha lew, bad da kata ka peisa nga thied ia kane ka bam ka dih baroh. U Syiem thalngeng um bna ei ei ia kata. Ngan

leh atu bad kato ka talwar, ngam donkam ban khrai khlieh 'ano 'ano ruh?" u la pynkut da kaba rkhe sngewbha sadhai.

Kumba u la leh mynshuwa, U Syiem ha kata ka step ruh u mih dangstep phyrngap ban leit phai noh sha la ting syiem. Haden katto katne por U Syiem ula tohi ia u Mushi ba u wan ap jingkhong. U la phuh samrkhe weibriew weibriew ha lade. "Mynta ka sngi ngan hikai ia u...ngan hikai ia u" ia ong u Syiem. Mar iarung ha ting bishar, U Syiem ula phah khot ia uwei u shakri bad tang mar shu rung ula kynhet ia u bad jraiñ bad jraiñ, u da sympat khlem isynei. "Khun ka shukor, khun ka men-die-ri"; ula byrthen. "Khot ia u nongap jingkhong kumne kumne," u la hukum ia uwei pat u shakri. "Nongap jingkhong, khrai ia ka khlieh jong une u men-die-ri shisyndon." U Nongap jingkhong bapli u la kyrpad ia u Syiem, "Syiem kynrad, sngewbha map ia u. Nga ngeit um shym mut ei ei kaba sniew ia phi : lehse u shu bakla." "Khrai shisyndon, lym kumta ka khlieh jong me kan hap la madan," u la byrthen laren. U Nongap jingkhong bapli un leh kumno! U la shu pynhiar mynsiem jlan bad u la ong, "Lada u shakri jong ki syiem um shym leh kano kano kaba bakla, to ai ba kane ka talwar kan kylla talwar dieng." U sei artad ia ka talwar bad u mait iaka ryndang, hynrei kata ka talwar ka kdiah pynban arlyngkhot. Baroh kiba xndon hangta ki la dap da ka lyngngoh lyngngaiñ bad kim nangkren briew shuh. U Syiem ruh u sah haka dum ka lyngngoh kumno yn leh bad une u Mushi ba sianti. U la dem bad lai dem pyrkhath, hynrei um loh jubab ei ei. "Ko Mushi," la ong u Syiem, "to khe leit noh bad plie la ka dukan kumba mynshuwa : Uno uno uba pynthud ia me nadien nangne, un shem ka saja haka pyrthei." U Mushi u dem arti ngon bad u leit phai noh sha la ting u briew uba kmen. U tar la ki snieh bad u suh la ki juti bad u imsuk imsañ pahuh pahai.

U Myrsiang bad U Klew

Myn dang kynthong ka pyrthei, ki sim ki doh ki dang iakren kawei ka ktien. U Myrsiang u long u mrad uba sian bad shalak tam bad u klew u long u kynja sim uba itynnad tam.

Ha kawei ka sngi u Myrsiang u shong thadsngi lyngngai ha trai jong u stap. Ka la wanshoh ka jingpyrkhat ha u kumne—"Katno kan long kaba itynnad bad phuhmat lada lah ban ialong paralok bad u Klew. U long u kynja sim uba bhabriew tam bad ma nga pat u mrad uba sian tam. Baroh ki jingthaw kin mane syiem ia ngi." U dem bad iai dem pyrkhat halor kane ka phang. Ha kaba khatduh u kut jingmut slait, ban leit iakynduh ia u klew bad kner la ka kti jong ka jingialong lok bad u. Da kaba leh khia thew bad leh bun jingmut jingpyrkhat, u la leit sha tyngkong jong u Klew. U Klew pat, uba dangsat dangkhroin ha ki tnad u diengsohkwit, u la iohi ia u na jngai. "Wa, i Um Siang du! Shano kumne phi iaid kaweh thula dangstep?" u la kylli. "Phi i jaid ba ikhuid ipyngngad ka bneng kumne, nga shu mih iaid. Kai bam lyer pyngngad noh tang laitmet laitphad, laitkti laitkjat. Nga la mut ban wan shongkai noh bad phi ban iakren kai ia kane ia katai. Bunsien bunsien nga la mut ban wan hynrei shu lapmiet kaei shu lapshai kaei." "Tip te phi Um Siang, ka pyrthei ari kaba kum kane," la kem ktien U Klew, "ym laitkti ym laitkjat kawei ka kam ka bud hadien kawei pat."

Te, ynda la kham slem ka khana ka khadeh, U Myrsiang u la plie wo ia ka khyrdop jong ka phang kaba u mut ban khlei. "Shish phi um," la ong u Myrsiang, "lada ma ngi arngut ngin ialong kawei kabuit kawei kabor, te la win hi jling ka pyrthei. Phi uba bhabriew eh bad nga pat uba sian tam; hato baroh kawei ka khlaw kim la thung syiem ia ngi?" u la pynkut. U Klew ruh ynda ula pynshong nia bha ia ka lup ia ka liem baroh

ula sngewi^{ahap} jingmut bad U Myrsiang. "Ym tang ba ki nongshun jongnga kum u Kui, u La-thasim, U Ksar bad u Bsong kin tieng kin khaweit hynrei ngau ioh ruh pahuh pahai ka bam ka dih. Kat kaba sah na ki saphret saphrong ba u bam ngan bam shngiam rai ci ma nga," u la pyrkhath jylliew ha lade. Kumta, da kaba sian u la jubab, "Um Siang, kata ka jingai jingmut jongphi kaba da dei da dei eh. Ka jingialang lok ym tang ka long ka bor hynrei ka pyntar ruh ia ka buit."

Kane ka jingialong lok jongki ka la neh slem slem khlem don kano ka pher ka phar. Ka jing-iaieit jongki ka long haduh katta ba kim ju iakhlad satia shano shano ba ki leit. Kumta u Klew um don kano kano ka jingsuba sniew ia u Myrsiang.

Ha kawei ka tlang la jia ka nemsniew kaba jur. U Klew u shu im thohmut thohmat da kaba puh da ki kruiñ, ki dkhiew bad ki symbai ki rnai; katba u Myrsiang pat u shu tyrkhong raw-raw namar um ioh doh shuh. Katba nangwan ki sngi ki snier jong u ki nangthylli bad ka kpoh ka shu syndait ha lynkdong. U la kut jingmut ban bam noh ia u Klew bad ha kaba ym poi pyrkhath u la kynrup kynsan thrait na u pdot. "Ngan pjiar ia me," u la byrngem. "Na ka daw aiu mo, ba phi kum u paralok phi nud ban leh ia nga kumne?" la kylli u Klew da kaba jem. "Ba me don shibun ki pap kiba ngam lah shuh ban niewtang," la kyn-teit u Myrsiang. "Nga lah mo ban tip, kie! kita ki pap ba nga la leh kiba phim lah shuh ban map," la khroh u Klew. "Wei", la kren khor u Myrsiang, "Ka jingpah syiang jong me mynstep janmiet, ka la pyunkiuh pyntieng ia ki jingthaw baroh ha khlaw. Ar, me leh ia ka sang ka ma. Me Sieh haduh khyndai lama, kaba wat u khun bynriew hi niar uba shlan ban leh haduh katta. Kine ar halor kim da long eh kiba da sniew palat haduh katta, bad dang lah ban map, hynrei kaba lai ka ka dei pap kaba da shyrkhei bad kaba ym lah shuh ban map. Kata ka long

kumne—Baroh ki jingthaw ki deng ia ki khor ki khriam bad ka burom ha ka khlieh bad shaden katba ma me pat me buh ia ki ha ka jingshong. Kane keiñ ka la biang ban rai iap ia me.”

U Klew, ba u sngewthuh ba kita baroh ki daw kiba u ai ki long ki bym shisha bad bymdon nongrim ei ei, u shu kren noh da kaba jem, bad ap ia ka kabu. “Um Siang, mynta nga sngewthuh la ki jong ki jingbakla bad ngam sngewsih ei ei lada nga dei ban iap. Hynrei tang kawei nga kyrpad ia phi kum u lok; sngewbha da pynleit ia nga ha ka niam ka rukom khnang ba ka mynsiem jongnga kan leit beit sha dwar U Blei”

Lor u liat u Myrsiang ha ki ktien kbroh jali jaum jong u Klew. U shim shi klong ka iad-Um bad u leit sha wah ban kñia. U theh khyndiat ka sapoh bad u sdang ban tim kñia artad artad ka kyrngah khlieh. Hamar kata ka por, kawei ka tham kaba sma jyndem kala wanpar bad kala dait kynsan tdam na ka lbong u Myrsiang. Ha ka jingkyndit u Klew ula khih bad ula lait bluit na ki kti jong u bad thiaw u hei hajrong dieng. “Mynta nga sngewthuh,” ong u Klew, “wat ju shaniah ia u lok uba stad bad uba khwan myntoi; namar haka shipa u kloi ban pjiar snam wat ia la u paralok hi. Khublei, leit suk bad shut bha ki bniat”. U Myrsiang u pyndem ñiuhmat tuiñ bad u leit wan tipsrgi sha la krem.

Ka Rai Blei

Mynba dang lied ka bneng bad dangkynthong ka pyrthei; ka sla ramew ka tap da ki khlaw ki btap ha kaba ki laiphew jingthaw ki im ki sah. Baroh baroh ki kwah ia ka longheh longrangbah bad kim ia kheiñ snep iwei ia iwei pat. Ka la don ka jingtaleh bad jingtaumsnam haman la ki khep haduh bala kulmar thlim ka shongsuk ka shongsaiñ. Te, ki mrad kiba rit bad tlot bor ki

la leit ban ud ban nam ha U Blei Trai Kynrad ban wan pynbeit pynbiang bad buh beit buh ryntieh. U Blei Trai Kynrad U la shah shkor iaka jingnam jingud jong ki. U syrpaï u syrpuð bad u pyntngen ia ki kumne—"Ngan khot ka Durbar pyllun jong ki jingthaw baroh ha Lympung-ri-lum bad Ngan sa bujai sujai mano ban long u Syiem u kynrad halor ki jingthaw baroh ba yn nym don ka banbeiñ ka bankhoh ia uba rit uba ria." Baroh ki jingthaw kila shah-shkor bad kila leit wanphai noh sha la ting la ting da kaba kmen.

U Blei Trai Kynrad u la phah ia u Kaiñjong ban pyrta ban shula ia kata ka rai-blei ha ki kynja baher mynsngi. Ia ka Labadur ha ki kynja baher mynmiet baroh bad ha u Myrsiang pat ban kyrha ha ki kynja mrad ba par baroh.

Ka sngi ban pynlong ia ka Durbar blei kala poi. La ialum lymbung u jingthaw baroh naduh uba rit haduh u bakhrav. U Trai Kynrad, ynda ula sneng ula kraw bad ula khem umjem umjah; U la batai bniah bin-pa-bin ia kawei pa kawei ka phang. Nangta u la ong, "To mynta jied ma phi mano ban long u Syiem u Kynrad jongphi u ban bishar hok bad ban peit ia ka iap ia ka im baroh". Te, ki mrad kiba heh bad kiba khlaiñ bor, baroh baroh kila tatur shakhmat ban tyrwa ia lade lade. Ynda U Blei Trai Kynrad ula tohi ia kane, U la ieng joit ban kren, "Mynta, ngan buh kawei ka jingtynjuh. U ta uba jop un long U Syiem bad u Kynrad". Ki jingthaw baroh kila ia mynjur. U shim ia u Syiar Ryngkuh bad u wah ia u ha haw haw U da pynbna artad: "Uno uno u jingthaw uba lah ban pynhap ia u ha tbian, na ki jingthaw baroh kiba par ha sla khyndew, u un long u Syiem bad u Kynrad". Baroh ki tamynjur bad shaid ki ia risa.

Baroh ki la ia pyrshang hynfei ym don-bakot bad ba lah ban pynhap ia u Syiar. U Khun bynriew ynda ula tohi ia kane u la leit sha U

Trai Nongthaw ban pan bor na U ba un shna ia ka ryntih na u siej u skong bad u tmar u spar ba u lah ban tada ia lade. U Blei Trai kynrad u la shah sngewbha ia u bynriew bad ula wanphai da kaba kmen sha la ing.

Ha ka sngi kaba ar, sa sbisien pat ka jingta-tynjuh bor ka la sdang. Hynrei ym don mano mano ruh ba lah ban pynhap ia u Syiar Rynghuh. Hynrei ha ka sngi kaba lai la wan paw u bynriew ha lympung-ri-lum. Ynda ula toh i ba ym don mano mano ba lah ban kynjoh ha u syiar, u la jam ha lympung ryngkat ka ryntih ha ka kui bad ki khnam haka ryngkap. Nangta, u la phai sha ki jingthaw baroh bad u la ong, "Ma nga ngan pynhap ia u Syiar ha madan". U sei ka ryntih bad u khnam bad u siat artad pduk na ka shadem. U Syiar u hap iar ly-iar ha madan, bad shaw risa u paidbah. "La jop u bynriew...la jop u bynriew" ki ia risa bad tashad ia kyrdem haduh ba la lyngud hi pum ka madan.

U Blei Trai Kynrad, ynda u la tohi ia kane u la kren ha u laiphew jingthaw baroh. "Naduh mynta ka sngi, phi ki jingthaw baroh to tip, ba kumba phi la tohi taka bor jong u briew; nga pynbna ba u un long u Syiem bad u Kynrad halor ki jingthaw baroh: kiba par ha khyndew, kiba her ha suiñ bad kiba jngi ha duraw. Kino kino kiba palat hukum kin toh la ka binong na ka kti u khunbynriew." Kumta, ka durbar kala wai noh.

Dei naduh kata ka rai blei ba u khunbynriew u kylla long u syiem bad u kynrad halor ki jingthaw baroh. Kino kino ki jingthaw kiba tamsneng bad leh lyndet ia u, u ai jingsneng katkum kata ka hukum blei bala pykhamti ha u naduh mynnyngkong.

U Nongrep baduk bad laka Tnga

Slem slem bah mynshuwa la shong ha kawei ka nongrit uwei u tymmen nongrep baduk bad la ka tnga. La kim don khun don kti, bad la ki duk raitoi, pynban ki im suk im saiñ bad ki ia ieit mar kyliang iwei ia iwei pat. Ha kawei ka miet une u tymmen nongrep ula ong kumne hala ka tnga, "peit shane Bih beh, nga la sngewthait ban shu shong set-slung kumne, nga la kwah ban pyllait met pyllait phad bad pynbeit ki thied ki jaw kiba la tlot la sakhrail, lashai dang step ngan leit sha wah ban leit khwai noh. Sngewbha pynkhreh ka bam ka dih, ka shrip ka paron na ka bynta jongnga". "Balei mo?" la kem ktien ka tnga, "hato phi kwah ba phin shah lynthaw lyngkhot lyngkhai ha ki rakot ki ramhah kiba taid pawang ha kitei ki khlaw harud jong katai ka wah?" "Ladon ki Ramhah ne kim don ki Ramhah, wei ia kaba nga la kut jingmut ban leit ngan leit, pynkhreh bad taiar mynta ka miet ia ki jingdonkam jongnga baroh," ula pynbor iaka.

Phyrngap dang riew ka tyngab une u tymmen ula kit kyndung la ka jasong bad u da tawah la ka shrip ka paron halor tyrpeng, bad um shah shkor satia la ka tnga jong u ka khang katno katno ruh. Thiaw thiaw u ngam shapoh kata ka khlaw haduh ba um da poi tiap harud jong kata ka wah ynda la noh phai sngi. Ka khlaw ka long kaba bniap bad ingiew. Hangta khek u poi kynmaw ia ki ktien jong ka tnga kaba la maham lypa ia u shaphang kita ki Ramhah bad ki Rakot. Ula babe kylla ba um shym la sah ha iing bad la ka tnga. Kynsan kynsan ka jingtieng kala wan kem ia u, ki ñiuhkhlieh ñiuhkijat ki la ieng kum ki speh bad ka syep khriat ka tuid na ka shyllangmat jong u. Wat la ki kijat ki khlai kep kep; pynban u nang jam thiaw shi thiaw ha ka lynti jougu.

Harud jong kata ka wah ka don ka ting trep kaba i sah ting jah. Hangta ka jingkyrmen khyn-diat ka wan ha u bad suki suki ka jingtieng ka sdang ban iehnoh, u pyrkhat ba la kumno kumno un ioh ban rieh talade hangta. Katba u dang pyrkhat bad ka jam artad sha pyrshah kata ka ting u tohi ia ka idem dieng poi-shi-poi kaba mih nangta. U bapli u nang pyrkhat ba lehse kila don ki nongkawai ne ki nongbehmrud kiba la wan ha shuwa jong u, hynrei shuwa ba un rung hapoh kata ka ting trep ula khongngoid shuwa na kawei ka thliaw sylliah ban tip la don brieu ne em hangta. Da ka jinglyngngoh lyngnguñ kaba khraw ula iohi pynban ia ki arngut ki Ramhah saw-treit ba ki ia shong ha madan bad ia ñiew ia ki peisa bad ki ksiar kiba kila ioh tuh. Da ka jingtieng kaba khraw uta u tymmen ula kynriah da dien bad ula kum iuh iaka tnad rap. Ka jingsawa jong ka jingkdiah jong kane ka tnad kala pynkyndit thred ia kita ki Ramhah. "Oh, imat la don mano re mano ba la wan wad ia ngi," la ong uwei u Ramhah da ka jingtieng. "Imat ka lah ban long", la jubab uwei pat. Une u tymmen u nang pynshah shkor kyadiang aiu ba kita ki Ramhah ki rakren. U tohi na kata ka thliaw shylliah iaka khmat ba tieng jong kita ki Ramhah. "Ngin tieng iano?" la ong uwei u Ramhah; katba ka met jong u pat ka khynñiuh baroh shirynieng da ka jingtieng. "Ngam tip satia ka dei kai" la ong uwei pat. "Ym don mano mano ha pyrthei kiba kham khlaiñ bad kham heh ban ia ngi." Hynrei la katta ruh ka met jong u ka khynñiuh kir kir bad mih ñiangkhriat rem-rem baroh shirynieng. "Ka jingsawa aiu kata mo?" la kylli uwei u Ramhah, "Ka dei ka jingkdiah jong ka tnad dieng" la jubab uwei pat, "bad wat kren shuh shaphang kata namar ka jingkeir jong ka tnad dieng ka dei ban don daw".

U tymmen ula sngewphylla shikatdei eh ban tohi ba kat ki Ramhah ruh ki suhjer rem, ula

pyrkhat shiphang bad ka jingtieng kumta kumta ka her noh na u. "Kine ki Ramhah pleng kiba tieng pud du kum ma nga, myata ka kynti te ngan hikai ia ki." Nansta une u tymmen ula shim da ka tyndong bad ula put phum-u n-phum bad ka kren artad, "mynta te ngan ai jingsneng "ia phi" Kita ki Ramhah nalo ba kila tieng lypa bad kila pyrkhat ba dei u kynja suid tyngjing aiure, ki ieng kynsan joit bad lymbuh naphang katha don, ki da ieh noh bad tyngka bad peisa, bad ksiar bad rupa bad ki her iap ika khlaw ka btap khlem i syrngiew i syrngiet shuh. U tymmen, ynda ula kyndit bynriew na kata ka jingleh ruma rutit kita ki Ramhah, ula par sor shapoh iing bad ula khur ei ia kata ka spah ka hajar, ka ksiar ka rupa bad ula wan kit ia ki sha iing. Ynda ula poi hala iing, ula ai ia ki ha la ka jong ka tnga ryngkat ka khmat kaba phuh samrkhie u da ong, "Kane te dei ka nusib ksiar jongnga ba nga la leit khwai ha katai ka wah". Kine ki tymmen naduh kata ka sngi ki im suk im saiñ baroh shi'rtā.

U Syiem bad U Dorji

Slem slem bah mynshuwa la don uwei u Syiem uba sniew haduh katta katta uba synshar ha kawei ka ri ba jngai. Une u Syiem ula phah khubor sha ki shnat baroh jong ka hima jong u ba uno uno u Dorji uba lah ban suh ka nep kaba iadei dor bad ka kyrdan syiem bad kaba biang slait ha u khlem tam ne duna wat tang shi saphit ruh, un ioh ka buskit Syiem kaba khraw. Hynrei uno uno pat uba shna duna ne tam khyndiat iaka rynteng u Syiem un shah khrai la ka khlieh.

Bun ki Dorji na kylleng ka hima ki la pyrsang la ka bok ka rwiang hynrei baroh kila duh ei la ki khlieh. Kiwei pat ki dorji kiba dang im kila pynlong ka jingtalang jar jar ba kumno yn leh bad kane. Baroh kila ia kylla dur kylla dar bad kim nud satia ban ia khalai nusib bad la ka

jingim. La don uwei napdeng jong ki uba la kut jingmut triang ban pyrshang katba sep ba man. Ula leit beit beit sha u Syiem, u da ong, "Syiem kynrad, nga la rohsngew ia ka jingpynbna jong phi, nga la wan khnang mynta ha khmut jongphi ban pan bor ba phin shah ia nga ban suh ia kane ka nep. Nga kular skhem ba kane ka nep kaba ngan suh kan biang slait ia phi kum ka muja kjat."

"Niuma", la jawab u Syiem, "tangka wat klet ia ki kyrdon jong ka jingpynbna jongnga ia kiba la saphriang kylleng" "Ia kata, ngan kit khlich hi manga nadong shadong," la phai ktien u dorji. Ynda la dep ka jingipynbeit baroh uta u Dorji ula sdang la ka kam. Ula mang khnang ba kata la nep kan lyngkot khyndiat, ia kane u leh da ka jingthmu. Ynda la dep nadong shadong ula wan rah ia ka ha khmat u Syiem da kaba u buhrieh ia u thri sympat hapoh ka sopti jongu. "To un im slem u Syiem," la ong u Dorji, ynda ula wan paw ha khmat u Syiem. "Nga la wan-rah kane ka nep kaba nga la i kut bad phi, to pyrshang noh ia ka mynta shisyndon, la kan biang ne em ia ki Syiem."

Da kaba kmen bad sngew sarong u Syiem ula thiah ha madan bad shim ia kata ka nep ban thew, hynrei u lap ba ki kjat jong u ki mih shabar namar bym kot. U Dorji ynda ula ioh ia kane ula sei ia u thri bad ula kawang kynsan sliak na ki slajat u Syiem. Shisyndon u Syiem ula pynran la ki kjat hapoh ka nep; bad man ka ten; ba u Syiem u pyrshang ban pynjrone ia ki u kawut khlem aili. Khatduh u syiem u hap ban pynran la ki kjat hapoh ka nep. "Kumito kei," la ong u dorji, "wat ju pynjrone la ki kjat palat ia ka nep, hynrei tang kat ban biang". U Syiem mynta ula sngewthuh bad ula hap ban kohnguh ba kata ka nep ka long kaba biang slait ia u. U Dorji ula ioh ka buskit ka bym lah ong shuh bad ula leit wan noh sha la ting da ka jingkmen kaba khraw.

Ka Pung Wei Kiang

Slem slem bah mynshuwa la don ha ka shnong Umñiuh kawei ka Riew kynthei kaba don tang uwei u khun shynrang, uba kyrteng u Ren. Kala ieit ia u haduh katta katta bad kam ju sngew-tynnad satia ban iohi ia ka khmat kaba diaw bad ba sngewsih jong u.

U Ren, ynda ula samla bha ula long uba smat uba sting. U thung la ki bri kwai bri soh bad baroh arngut ki im suk im saiñ. Ki bri ki bsah jong u Ren ki don harud kawei ka thwei kaba jylliew bha kaba kyrteng ka pung Wei kiang. Man ka teng ba u sngewthait sngew jem u ju leit ban khwai na kane ka thwei bad barabor u ju ngat bun tylli ki dolikha bad u wan rah sha ting sha la ka kmie ban shet jyntah ne sher kharang ia ki.

Ha kawei ka sngi ba shit kyang bha u Ren ula sngew thait ban trei bri. Kumta ula shim la u ryngwiang bad u sai khwai ban leit khwai na pung wei-kiang. Sngewphylla, ba ha kata ka sngi khlem dait dohkha tdot la u pashat bad pynap kumno kumno ruh. Kumno re kumno ka khmat jong u ka leit shat sha shiliang thwei bad da ka jingsngew phylla kaba khraw, ula iohi pynban ia kawei ka thei samla kaba bhabriew haduh katta katta ba ka sum ka sleh bad ka shong kai thad-sngi lyngngai halor uwei u maw. U Ren ula dum buit tlip namar ba katta snem ba ula wan khwai hangta um shym la ju ia kynduh koit ia kano kano ka briew hangta. Mar kumta ula leit bran bran ban ia kynduh ia ka hangta halor mawsiang. "Phi dei iei kong, naei phi wan bad shano phin leit?" ula kylli ia ka. "Nga dei ka khun jong ka pung Wei-kiang bad ka iing ka sem jongnga ka don hangthie ha trai ka thwei," kala jubab. Kane kala pynlyngngoh jur ia u Ren bad um lah pyrkhat satia ba kata ka dei ka puri. Ynda kila ia shong kai bad lathuh khana ia kane katai, kumba

ju long lem ka pyrthei, U Ren ula kem jingieit ia ka bad ka ruh kumjuh ia u Ren. "Te, lada phi da ieit shisha ia nga bad phi da don ka jingmut hok ban shong ban sah ryngkat bad nga," ka la ong "to mynta ngin ia ialeit kai sha iing jong nga hangthie ha trai ka pung Wei-kiang". Ynda u Ren ula kohnguh, kane ka samla kala kad ia ka um da ki sla kti jong ka bad hamar hangta hangta hi kala paw ka lynti bah kaba lam shaduh ka iing jong ka. U Ren ula iaid na kat ka lynti bad kata ka puri tad haduh ba kila poi top hapoh iing jongka. Hangta kila pynlong ki tien sai-iong saisaw, ki jubab ksiar jubab rupa ba kin iashong iasah ryngkat noh kum shi tnga. Ynda U Ren ula sah hangta ha ramew lai sngi lai miet bad kata ka puri, ula sngew kynmaw ia la ka kmie sha pyrthei. Ka ruh kala mynjur mon sngewbha, bad u Ren u wan poi ban iakynduh biang bad la ka jong ka kmie. Ka kmie ryngkat u shnong u thaw kila ia sngewphylla eh ia kane namar hapoh kita ki lai sngi lai miet kila ia wad shnong paitbah ia u Ren hynrei kim shym lap syrngiew syrngiet satia ia u. Ynda ula iathuh ia kiei kiei baroh kiba la jia ha u, u shnong u thaw, u sa sngewthuh shynna ba u Ren ula ia poikha bad ka puri.

Ka kmie U Ren kala dap da ka jingkmien ban iakynduh biang bad la u jong u khun. Ula phla bad iathuh hala ka kmie ia ki jingshisha baroh kumba kila long. Khatduh eh ula ong kumne ha ka, "Mci, kane ka briew kaba nga la ia shong iasah ryngkat; ka pyrsa kurim jongphi, ka kwah ban wan kai te phi ban iakynduh bad phi? Te lada phi khuid phi sngewbha to pynkhreh pynkhium ba kan wan peit kiawkurim. Sar ia ka phyllaw ka dwar bad pynkhuid iaka iing ka sem kum ka burom ba kan wan jngoh wan peit ia phi". Ka kmie ruh da ka jingkmien ka la kohnguh bad wer de ia la ki lek ki jor, ki marjan ki marpa ban iarap iaka ban pynkhuid iaka iing ka sem ka

phyllaw ka dwar kumba la bthah u khun. Kumta, ha kata ka sngi bad ka ia bala ia buh ka lok u Ren kala wan paw pyrthei ban iakynduh bad la ka Kiaw Kurim, hakhmat u kha u man, u lok u jor bad u marjan marpa. Ka jingbha b'riew jong kata ka briew naduh ka dur haduh ka rynieng ryniot, naduh u shñiuh khlieh uba jrong haduh khongdongjat kaba khlem don jingduna ei ei shuh. Baroh u lok u jor kila shu a peit seh, peit lyngngoh lyngngaiñ. Ka kmie u Ren da ka jingkmien ba khraw kala pdiang sngewbha iala ka pyrsakurim. Hynrei shuwa ba kan rung hapoh iing ka leit tohi kumno re kumno a u synsar bala buhrich ha kyndong jingkhah. Mar kumta da ka jingsngewsih kala phai dien noh bad kala ong "Ko Ren uei une uba phi pynieng ha tyngkhap jingkhah? Naduh mynta ka sngi ngan nym lah shuh ban wan kiew ha iing jongphi. Kumne nga la leit noh la phin bud ia nga ne phin sah hangne, nga te ngan leit noh".

U Ren, da ka khmat kaba sngewsih ula phai sha la ka jong ka kmie bad ula ong. "Kumba nga la pynlong ka soksular jubanlak, bad kum u rang bah uba dei ban mih nala ka jong ka iing, nga ruh ngan leit lang noh; bad da lei lei ruh ngan ym wan phai shuh. Hynrei, mei baieit ba phin tip ba nga dang im bad ba nga suk nga saiñ phin dang iohsngew ia nga ba nga saham na pung Wei-kiang". U Ren u khublei khatduh iala ka jong ka kmie bad baroh arngut, ma u bad ka lok puri jongu jar ki ngam ha pung Wei-kiang bad haduh mynta mynne kim ju wan paw pyrthei shuh.

Hynrei haduh mynta mynne; haba kane ka kshaid pung Wei-kiang ka heh bha, ki briew jong kine ki thain hateng hateng ki ju iohsngew ia ka jingsawa kum ka jingsaham na pung Wei-kiang bad ki ngeit ba kane ka dei ka jingsaham ban iathuh ba u Ren u dang im bad u suk u saiñ.

Ka Jhap

Hyndai, mynba dang rasong ka hima Jaiſtia pur, la synſhar uwei u Syiem Hindu uba khrāw uba don kawei ka khun samla bhabriew kaba kyrteng ka Jhap. Te, namar ba bun na ki Syiem Dkhar kiba kwah ban shongkurim iaka; katba u pat um mon satia ban pyntabia iaka, ula phet noh bad leit thaw iing Syiem sha kjat ki Lum Khasi ha Hima Nongjri mar pyrshah ka nongbah Chuttack.

Da ki bun bun snem ula shong suk shong saiñ hangta ha ka iing paki maw ba ula tei phylla eh halor jong uwei u Mawlong uba jrong u bym don mano mano ba lah ban kiew, bad ia kata ka iing paki la shu tynrong halor jong u. Hangne u buh ka bam ka diñ kaba biang da ki snem snem bad ka spah ka hajar, ka ksiar ka rupa ka bym lah ban ong. Une u Syiem man ka teng u leit sha ri Dkhar ban pyndep la ka bishar ka khadar, ka lum khrong lum khajna na ki khun ki raiot lyngba ki Rangbah Syiem kiba ula thung. Man ka teng ba u leit u ju khang la ka khun hapoh jong kata ka dulan paki bad um ju shah iano iano ruh ban wan hapoh kata ka iing paki jong u. Da ki bñai bad ki snem kane ka Jhap ka ju shong wei briew wei briew tad haduh ba u kpa jōngka ula wan phai na ri Dkhar. Une u Syiem ula mut ban shra ka lynti bah naduh Chuttack haduh kata ka iing paki Dulan jong u. Ula shniah bad stah ia ki maw bad ula lum thup ha bun jaka baroh shi lynter lynti. Hyarei um shym lah satia ban pyndep ia kane namar ka jing-bun kami eh bad ka jingtymmen.

Ha kawei ka sngi ula ong ia ka Jhap ba un leit sha ri Dkhar ban ia pyndepit khatduh bad ki khun ki raiot jong u shaphang ki kami hima sima bad ba un nym leit shuh iano iano ruh. Kumta ula ong kumne ia ka, "Ko khun

lashai dang step phyrngap ngan leit sha ri dkhar bad ngan jah kham slem. Phi, ap ia nga haduh ba ngan da wan phai bad wat nym mih satia da lei lei ruh napoh ting lada jia kumno kumno ruh. Ha kane ka kynti jongka jingleit jongnga lada ka um thah ka sam ha ki kjat jongnga kumta kumta hi ngan iap bad ngan nym wan phai shu, hynrei lada ka um thah kam lah satia ban sam ha ki kjat jongnga, to tip ba tang shen shen nga la wan phai pat sha phi" Kumta hadien ba ula khublei khatduh lala ka khun ula mih bak ban leit la ka jingleit sha ri Dkhar. Sniewbok, ba kumba la ia-pen, ka um thah kumno re kumno kala ngam ha ki kjat jong u wat haba ula sop rben ia ki bad ula kyllon iap hangta hangta hi.

Ka Jhap hapoh ting paki dulan ka ap bad iai-ap khmih lynti lano shi lano ba u kpa jongka un wanphai. Da ki taiew bad ki snem kala shu iai ap hynrei u kpa jongka um man wan phai shuh. Ynda la slem slem ka sngewthuh ba u kpa jongka ula iap bad un nym lah shuh ban warphai sha ka, kala khang kut talade hapoh kata ka ting paki maw bad kala kylla maw syndon hangta. Haduh mynta mynne dang lah kyndiang ban tohi ia kane ka ting paki dulan ba la kylla maw kaba dang tynrong halor une u mawlong mawteh bad haduh mynta mynne ia kane ka jaka ki khot ia ka "Ka Jhap".

Ka Khnai ba wad Pyrsa Kurim

Mynba dang kynthong ka pyrthei bad ba ki sim ki doh ki dang takren kawei ka ktien, la don kawei ka khnai kaba don uwei u khun shynrang. U long uba bhabriew bad ba plung met plung phad haduh katta katta. Ha ki khmat jong ka hi, ym don shuh uwei pat ha pyrthei uba kham bhabriew ban ia u.

Kumta, kala ri kala sumar bha ia u bad kala bsa la btiah ia u da ki jingbam kiba bha tam kiba ka lah ban shem. Kala hikai ruh ia u ban long uba tipsngi bad uba donakor. Kumno ban mareh, kumno ban bam bad kumno ban pah. Te baroh baroh ki khnai kiba la tohi ia u ki jawdud bad ilup pyrsa kurim namar kim pat ju lap satia u khnai u ban bhabriew kat ma u. Nalor ba u long uba bhabriew u long ruh uba sian bad uba jemud, kumta ym don kawei ruh ka shyntur kaba khlem da taroh ia u. Ynda ula heh bad la samla bha; une kynshreng jyllum lymphui kum u 'nai khat-saw-synia. Kumta da ka jingsngew sarong ka kmfe kam mon satia ban pyniapoikha ia u bad kano kano ka kynja khnai. Kala kwah ban pynsabria ia u bad kano kano ka jingthaw kaba khlai bor tam. Kumta kala kut jingmut ban pynshong kurim ia u bad ka khun jong ka sngi bad ban wan rah ia ka shapoh 'liew khnai.

Kane ka khnai shisyndon kala khrech ban leit sha tyngkong ka Sngi. Ynda kala poi hangta kala kren kumne ia ka sngi. "Ko Mei ngi, nga tip phi loug kaba khlai bor tam. Nga la wan khnang shane ban pyniateh ktien ia u khun bhabriew jongnga bad ka khun bhabriew jongphi" "Ah, Mei 'nai kynrad" la phai ktien ka sngi, "Nga ngam long satia kaba khlai bor tam. U lyoh dum u long uba kham khlai bor ban ia nga bad u kah dum ia nga kat kat ba u mon. Kumta, sngewbha ba phin ia teh lok bad u."

Da ka dohnud kaba khia ka Mei 'Nai kala leit beit beit ban ia kynduh bad u lyoh, "Ko Pa lyoh, la tathuh ia nga da ka Mei sngi ba phi phi long kham khlai bor ban ia ka. Te, nga la wan khnang sha phi ban iateh lok da kaba pyniateh ktien ia u khun jong nga bad ka khun jong phi" "Wow, mei nai la nga kham khlai shisha ban ia ka sngi hynrei pat u lyer u kham khlai ban ia nga. U Kynting ia nga kat kat shaba u mon. Te, to leit sha u kei bad

buh ia kane ka jingtyrwa". Da ka jingsngew diaw kaba kham jur shuh shuh ka la leit sha u lyer bad buh iaka juh ka jingtyrwa. Hynrei u lyer u la kren sngewsih u da ong, "Mei 'nai kynrad, dang don uba khamkhelaiñ bor ban ia nga bad uta u dei u Masi Dap. La nga beh kyrthep katno katno ruh, um ju patiw satia ia nga. Kumta, sngewbha leit sha u". Ka khnai da ka jingsngewsih kaba khraw kala leit sha u Masi Dap, bad buh ia u ka juh ka jingtyrwa. U Masi Dap ula kyntait da kaba ong ba ka lyngkor ka long kham khelaiñ ban ia u. Khlem pynsepei ia ka por, ka khnai kala mareh bak bak sha ka lyngkor kaba don ha lyngkha bad kala kyrpad iaka ban pyniateh ktien ia u khun jong ka bad ka khun jong u. "Wow, mei 'nai kynrad, dang don kiba kham khelaiñ ban ia nga u la ong. "Man ba ki masi dap ki lur ha lyngkha nga ju sahkut ha ki thied dieng bad kine ki khum ia nga haduh ba ngam lah shuh ban khih. Te, to sngewbha ban leit sha u keiñ". Ynda ka khnai kala iohsngew ia kine ki ktien kala leit bran bran bad kala kren kumne wei briew wei briew ha lynti. "Kaba dei sha kaba ong ki riewtymmen, lynda phi ia kynduh da lade bad kiba khelaiñ bor, koit phin ym sngewthuh ia la ka bor' nga la pyrkhat ba ka sngi ka long kaba khelaiñ bor tam pynban u lyoh u dang kham khelaiñ ban ia ka; bad ka lyer ka kham khelaiñ pat ban ia u lyoh, bad u masi dap u kham khelaiñ ban ia u lyer, bad ka lyngkor ka kham khelaiñ ban ia u masi dap, bad u thied dieng pat u kham khelaiñ ban ia ka lyngkor! Katba ha nga pat u thied dieng um long ei ei ruh em bad tang da ki bniat jong nga, nga dait ia u lyngkhot lyngkhai.

Mynta ka khnai kala sngewthuh ia kiei kiel baroh. Kala wanphai beit beit shala ka 'liew khnai bad kala pynshong kurim iala u khun bad ka para khnai kaba bhabriew bad kaba koit ba khiah krad kum ma u.

Kaei kaba Kordortam ?

Slem bah mynshuwa la don ha kawei ka shnong arngut ki samla kiba taieit paralok haduh katta katta. Barabor ki ju ta kren ta khana shaphang la ki jong ki jong ki jingkwah. "Oh!" la ong uwei, "lada ngan jin da la don shispah tylli ki kulai ngan jin da la long u briew uba bha bok tam ta baroh." Hynrei u paralok jong u um ia hap jingmut bad kaei kaba u ong. "Men leh aiu shispah tylli ki kulai? Nga hi ha lade nga pyrkhata ba ngan jin da la long uba bhabok tam lada nga don shispah ngut ki paralok."

"Em phi, balei phi kren bieit haduh katta?" la ai nia kylliang u paralok jong u. "Khamlah 100 tylli keiñ ki kulai ban ta 100 ngut ki paralok." U ta u paralok jong u u la ong, "Nga te, hok ngam tahap jingmut satia bad phi. Ym don kaba khamkor ha nga ban ta ki lok kiba shisha." Kumne barabor kine arngut ki paralok ki ju takren para maki. Namar ba kim tahap jingmut uwei bad uwei pat ki la tarai noh kumne. "Baroh arngut ngin taraid pyrthei noh bad ngin taleh ta kaei kaba ngi kwah Uto uba kwah kulai un wad kulai bad uto uba kwah paralok un wad paralok," bad kila takhlad sha la ka jong ka jong ka lynti.

Hadien katto katne snem kine arngut ki paralok ki la ta wanphai sha la ka jong ka shnong bad sa shisien pat ki la takynduh. Ki la ta sdang ban ta kylli ban ta pyathew la ka jingshem jingshem ha ka jingtaid pyrthei jong ki, "kumnu phi long bad aiu phi ta shem," la kylli uwei pat. "Oh! la jubab u lok jong u, mynta, nga long u briew uba donbok tam, nga la loh 99 tylli ki kulai kiba kat ki kulai. Phi pat?" u la kylli. "Nga ruh kumjuh lok, nga la loh 99 ngut ki paralok kiba shisha, bad nga long u briew uba bha bok bha nusib sat," la jubab uta uwei pat u paralok. "Lada kumta,

phi duna tang uwei u kulai ban dap 100 tylli. To koit kam lei lei ngan ai noh u kulai jongrga ha phi." U ta u paralok jong u ruh u la kohnguh da kaba kmen. "Phi ruh kumjuh," u la ong, "phi duna tang uwei u paralok ban lang 100 ngut bad nga tyrwa ba ngan long ma nga u paralok ba shisha jongphi. "Lada ka long kumta" la ong u paralok jong u, "hato ngam dei ma nga u briew uba bhabok tam namar ba nga la don mynta 100 ngut ki paralok?" U ta u paralok jong u ruh u la pynbud, "Ym kumta, nga ruh mynta nga la don 100 tylli ki kulai bad nga long da shisha uba bha bok tam."

U ta u samla uba don 100 tylli ki kulai u la ong ia la ka kmie, "Ko mei, iathuh ia nga; mynta nga don 100 tylli ki kulai, hato ym dei nga long ma nga u briew uba bha bok tam na baroh? Peit seh haduh katno ki long kiba khlaif bad ba itynnad. La shai la shisngi kin kha bun ki kulai bad ngan long u briew uba riewspah haduh katta katta, ym dei mei?" u la kyli. Ka kmie ruh ka bym ju tohi katne katne ki kulai kam lah khlem da rakmen lem bad u bad ka la jubab da kaba puh samrkhie, "Hoid khun, phi long da shisha uba da bha bok eh ia baroh."

Ha kajuha ka por uta u paralok jong u ruh uba don 100 ngut ki paralok kiba u la toh ha ka jingiaid pyrthei jong u u la kyli da kaba kmen tala ka jong ka kmie, "Ko mei, iathuh seh ia nga; mynta nga don shispah ngut ki paralok ba-shisha; hato ym dei ma nga; u briew uba bha bok tam na baroh?" Ka kmie ka la peit sha la u khun da ka khmat kaba tlod bad ka kyrngah artad ka khlieh ka ong, "Baroh ka-ba phi iathuh khun, ka long kaba sngew tynnad. Hynrei nga donkam ban ai ia phi kawei ka jinghikai. Ban tip la u lok jong phi u long ne em u ba shisha phi donkam ban da tynjuh ia

u. Hato ki lah ban teng bad phi ha ka eh ka kher, ka jynjar ka shipa. Dei tang haduh hangta keifi khun phin tip thikna: bad lada phi la toh 100 ngut ki paralok ba shisha, ngam artatien ei ei ba phi dei shisha, u briew uba bha bok tam na baroh," ka la pynkut.

U ne u samla u la dem bad dem tai pyrkhata kata ka jingong jong ka kmie jong u. Nangta u la kylli, "Hynrei kumno pat mei ngan tynjuh ban shem la ki long ne em ki lok kiba shisha?" u la pan jingmut. "Khun, ka la ong, shim une u kulai bad leit mynta mynta hi sha kito ki paralok jongphi baroh kiba phi la iakynduh ha ki shnong ki shnong bad iathuh sngewsynei ha ki, ba mynta phi don ha ka lanot ka jynjar khop. Peit-thuh kumno kine ki paralok ki leh ia phi," ka la pynkut.

Ka jingai jingmut jong ka kmie ka la shoh jur ia ka jingmut jong u. U khreh u khrum bad bran bran u leit ban iathuh ia kane ka khubor shempap jong u ha kita ki paralok jong u baroh.

Kumba da iapan, sniewbok ba ha kata hi ka juh ka miet, uta u paralok jong u uba don 100 tylli ki kulai, u la shah tuh lut khoit ha ki nongtuh. Shimiet shimiet u kylla duk bad u jia long kumba u la ju long. U bapli u laid ruma na kawei ka shnong sha kawei pat ka shnong ban iakylli iapyrthew ha u nongleit u nongwan la ki iohi ne em ia ki kulai jongu bad ia ki nongtuh kiba tuh ia ki. Hynrei, sangsot kat shaba u leit bad kat ha uba u iakynduh u toh tang ka jubab kaba sngewdlaw, "ngim tip ne iohi iano iano ruh kiba rah 100 tylli ki kulai". Ha kaba khatduh u phai thylli sha la ting u briew uba sngewsih bad bapaitdohnud. U shong marwel ha kyndong bad u trud arti la ka khlieh, "Ka apot sepsngi aiu kaba kum kane ia nga, u la bynñiaw wei briew wei brlew."

Ha kajuh ka por uta u paralok jong u uba la leit rah ia ka khubor shempap sha ki paralok bad u la wan phai sha la ting. Da ka khmat kaba kmen u la ong ha la ka kmie, "Ko mei baroh ki paralok jongnga ki long kiba shisha. Baroh ki tam bad sngewsih haba ki iohsngew ba nga hap ha ka lanot ka shempap bad ki tyrwa ban ai jingtarap ia nga katba ki lah. Wat la nga la ong ia ki ba ngam donkam satia ia ka jingtarap jongki, hynrei pynban kim shah shkor satia ia nga. Plie ia ka jingkhong bad peit shabar, phi iohi aiu? Ka kmie ka la plie ia ka jingkhong iit bad ka la iohi ia u paidbah ba u ia tuid sha ka ting jongka ryngkat ki jingai jongki na ki dong baroh haduh ba la ikulmar hi thlim. "Sngewbha wat kyntait ia kine ki jingai jongngi bad wat pynsngewsih ia ngi," ki la ong lang. Ka kmie ka la pyrshang ban batai balei ba ka phah ia la u khun ban tynjuh ia ki, hynrei kim shah shkor satia. Ki buh la ki jong ki jingai bad ki leit wan phai noh sha la ki shnong ki shnong.

"Kane te shisha khun," la ong ka kmie, ka pynshisha ba ki long ki lok kiba bha bad ba shisha. Namar, ia ka jinglong paralok ba shisha lah ban tip hapdeng ka shipa ym hapdeng ka jingsngewbha. Nga ngeit skhem, phi long u briew uba bha bok tam ha ka pyrthei." Nangta ka iathuh ia u ia ka jingshem pap shem lanot jong uta u paralok jong u uba don 100 tylli ki kulai. Kumta kumta hi u la shim ia kita ki jingai sngewbha baroh jong ki paralok jongu bad pynkit ha ki 10 tylli ki kada sha ting jong u. "Ko lok," u ong, "nga la iohsngew ia ka jingshem lanot jongphi baroh. Koit wat khuslai ei ei. Shim kine ki jingai sngewbha; namar katba u briew u dang don uwei u lok uba bha, u long kham kor ban ia ki 100 tylli ki kulai."

"Kata ka long kaba shisha," la pynbud u paralok jong u, "mynta nga sngewthuh shai, ba

u lok uba shisha, ym ka spah ka hajar, ka long kaba kortam. Suk uta u briew uba shem ki lok kiba shisha ha ka jingim jong u.

U Briew uba Duk bad ka Tnga kaba Duk

La don shikmie shikpa kiba don tang uwei u khun shynrang. Kata ka kmie ka shu leit bylla ha ki briew, katba ki ta ai kam ei. Kim biang satia ka bam ka diñ, teng teng ki hap bam tang shiteng kpoh. Ha kawei ka sngi ka kmie ka la ong ia u kpa, "Peit kpa, ban kumne te ngim lah ban lait na kane ka jingduk. Balei phim leit noh sha kiwei kiwei pat ki ri bad pyrshang ban wad kam wad jam ban dup kham im suk kham im saiñ?" "Hoid kmie, ngan pyrshang." Kumta u la leit bad wad kam. U donbok shibun ba u roh da ka kam ap bri soh apple ha kawei ka shnong, ha kawei ka ting riwspah. Ula shna la ka ting trep kaba malu mala bad u shong hangta. Kaba phylla ka long ba kawei ka miaw kaba laid wir kala wan sah bad u. U leit ia ka, u kdup, u thiah bad ka, bad kata ka miaw ruh ka leit ia u. Baroh shi lyur u shong hangta bad ym don mano mano ba wan kai. Ynda la poi ka por synrai, ki trai jong kata ka bri kila siew bainong ia u da ki soh apple.

Ha kawei ka sngi, uwei u nongkhai uba na kajuh ka shnong bad une u nongap bri uba u ithuh bha ia u, u wan laid lynti nangta. Uta u nongap ula khublei bad khot sngewbha ia uta u nongkhai. Ula ong, "Peit shane, nga la kamai shi byrni ki soh apple, nalar kata nga don ruh kane ka miaw. Sngewbha seh pynrah ia kine bad ai ha ka kmie ki khun". "Ngan pynrah", ong uta u nongkhai: Kumta u Nongkhai u la shum ia kata ka miaw bad ia kita ki soh apple. "Peit shane", ong uta u nongkhai, "ngan leit die shuwa ia kine ki mar la jong bad ngan sa leit sha shnong." Bad kumta kumta hi u la leit. Maba ala poi ha kawei ka shnong ula shem ka mar ka

mata ka bym nang batai shuh, hynrei soh apple pat ym don. Kumta kita ki briew ha kata ka shnong kila kyrpad ia u ba un die ia kita ki soh apple. Ha kaba nyrkong u kyrngah, hynrei hadien ula kohnguh bad ula loh da ki tyngka ksiar. Haba ula poi sa ha kawei pat ka jaka ula leit tyrwa ia ki mar jong u ha iing syiem. Tang shu poi hangta ula iohi ia ki khnai bym lah nrew shuh. Khlem sheptieng ki tamareh na kawei ka jaka sha kawei pat ka jaka, ki rah ki rong kat kaba ki loh, kim khaweit iano iano ruh. "Phin ai aiu ia nga", ong u nongkhati, "lada ngan pynduh pyniap ia kine ki khnai". "Ngan ai shi byrni ka ksiar", ia ong u Syiem. Markumta hi u nongkhati ula pyllait ia ka miaw na ka byrni. Tang shu pyllait, ka miaw kala kynrup ia ki khnai bad kala pyniap haduh la ijli ban peit ia ki khnai iap, tang shipor ym don khnai shuh. U Syiem kumba ula kular, u la siew ia uta u nongkhati da ka ksiar. Uta u Nongkhati ula leit noh. Tang shu poi ha shnong u la leit ai bak bak ia kata ka ksiar ha ka tnga uta u lok jong u. "Hih kane ka ksiar ba u phah ai u lok jongphi". Kata ka kynthoi ka la kylli, "U ong yn leh kumno?" U nongkhati ula rkhiu namar ba u kynmaw ia kata ka miaw bad ki soh apple ba u phah u lok. "Ngam tip phi um shym ong ei ei, leh katba phi sngewthuh kei". Kata ka briew tang shu loh ia kata ka ksiar nyngkong eh kala shna ka iing ka sem kaba bha bad kaba itynnad, nalar kata ka la phah skul ia la u khun. Khadsan snem kila iaid. Ha kine ki khadsan snem une u Nongrep uba duk ula kamai lai tylli ki tyngka ksiar. U la kut jingmut ban leit noh sha la shnong. Kumta ula leit. Ha kawei ka miet ula sah miet ha ka iing uwei u nongrep. Ha kata ka miet uta u nongrep ula pynlong ka jingkhawai sngewbha ha iing jong u la ki lok ki jor kiba u da khot sngewbha. Ki labam iadih ki lathuh khana, ki tarkhie ki takmen. Hynrei don tang uwei nardeng jong ki uba shu sngap bad shu peit jylliew jingmut. Uta u bah Duk ula kylli, "Balci i tai I Bah pat i shu sngap, im kren, im khana"? Uta u trai iing ula lathuh bad ula ong. "Kawei ka kynthoi kaba mi"

na ka shyntur jong u ka shong dor kawei ka mohor ksiar". Mar kumta uta u Bah Duk ula sei kawei ka mohor ksiar, "Hih, kane ia phi, bad iathuh ei ei shaphang jong nga." Uta u briew ula shim bad ula ong, "Men ym iap, haduh ba ka jingtap hi kan wan shaw ia me, wat khaweit". U Bah Duk ula sei sa kawei pat ka mohor ksiar bad ula ong, "Iathuh shuh ia nga atu kan jia"? Uta u briew ula shim bad ula ong, "Ka kynthei kaba bha tam, dei kata kaba me ieit naduh ka dohnud bad ka mynsiem." "Nga sngewbha shibun ia ka jingbatai bad jingiathuh jong me. Hih sa kane kawei bad iathuh ia nga, atu me iohi"? "Haba me synriah, sangeh bad pyrkhathuwa ban leh ei ei," ong uta u briew. Lashai mynstep u Bah Duk ula mih ban leit sha la shnong. Haba ula poi ha kawei ka shnong u iohi kitai ki briew ki ia teng sawdong ka pung. Ula leit bad ula kylii, "Balei, balei"? Kila jubab bad ki ong, "Kaba sngewsih bad ka-ba shyrkhei, kane ka pung ka don um tang shi jug bad uno uno uba hiar ban tong um um lait kiew shuh bad u sahkut hangto ha trai pung. Kumta ngin iap baroh na ka jingsliang um. Phi lah Ma ban pynioh um ia ngi? Lada phi lah ngin ai da ka ksiar ia phi iwei pa iwei." U Bah Duk ula kynmaw ia ki ktien uto u lok ba un nym iap katba ka jingiap kam pat wan shaw ia u. Kumta ula kut jingmut ban hiar. Ula hiar, ula pynkhuid ia kata ka pung ba kan mih um. Haba ula dep ula mut ban kiew noh sha jrong, hynrei don mano re mano ba la bat ia u na ka sopti bad ong artad, "Ale shane". Ula phai wak, bad u iohi pynban da ka miej. Halor kata ka miej ka don ka Tyngab bad ka Jakoid. "Namar ba me wan hiar hangne, jubab ia ka jingkylli jong nga. Lada mem jubab kaba dei, ngan pynpait ia ka khlich jong me". "Kylli ong u Bah Duk," "Me iohi kane ka jakoid. Ka don hok ma ban shong kurim?" U Bah Duk u kynmaw ia ki ktien uto u lok, bad u ong. "Ka kynthei kaba bha tam ka dei kata kaba phi ieit naduh ka dohnud bad ka mynsiem." Mar iadep ong ia kine ki ktien, ka Tyngab bad uta u Jakoid kila sdang ban kylla dur.

Kila nangheh nangheh. Kynan kynan ka mieh jong ki ka la bthei, bad kila kylla u Samla bad ka Samla kiba bhabriew. "Phi la pyllat ia ngi na kane ka jing-shah jadu kaba la ngat ha ngi, bad kaba ngi la im-jynjar. Hih kine ki tyngka kum ka dak ka jing-sngewnguh jong ngi ia phi". Abah Duk (um long shuh mynta uba duk) ula kiew ia kata ka pung ban mih noh ryngkat bad kata ka um shi jug. Kita ki trai shnong ruh kum ka jingsngewnguh ia u, ba kila loh um pat, ki la ai sngewbha shibun ka ksiar, namar kata ka pung ka la dap shoñ da ka um. Ha kaba knaduh u la poi sha la shnong. U tang shu poi ula khmih pyngkong la ka ring. "Ani! ka Bangla bah, kaba la itynnad sat, Ani! ka kper ka phrah ruh kaba la iphuh iphieng haduh katta katta. U khohngoid na jingkhang bad ula iohi iala ka tnga ba ka iakren bad uwei u samla. "Oh! kumne pleng", ula pyrkhathalade: "Kala shongkurim bad u khun riewspah ki briew haba ngam don. To, ngan pynpait khlieh baroh arngut". Hamar ba u thew la ka suloi ban siat ula synriah, mar kumta u kynmaw ia kito ki ktien ba u ong uto u lok. U sangeh noh bad u iohsngew ba uta u samla u ong "Nani jan, kumno phi ngim loh khubor ei ei ruh na i Pa? Nga la duh ia i la slem". Kata ka kmie kala jubab. "Ah! Balajan, nga la iam, nga la lynñiar, nga la kwah ia u ba un wannoh, ban iohi ia u khun uba la san la rangbah, uba la nang la stad". Mar kumta u Bah Duk ula rung kluk hapoh ring, ula kdup bad ula doh bad kmie bad khun. "Kala bha ba nga la phah lam ia kito ki soh apple bad ka miaw ha uto u lok."

Kumta, kine kum ka ring kila im suk.

Ki Khun Bym Kohnguh

La don kawei ka briew kaba don saw ngut ki khun ki bymkohnguh. Ki im tang ban ialehkai naduh dang step haduh ban da miet. Ki pynjakhia ia ki sopi sopat da ka ktien da ka sbur, ma ka pat ka

sait ka pynkhuid ia ki. Ki pynjakhlia ia ka sing ia sem maka pat ka sar ka pynkhuid ia ka. Ka kmie ka leit kamai ban loh ka bam ka diñ katba ma ki pat la ka talehkai baroh baroh shi sngi. Ka trei khlem sangeh katba ma ki pat ki shu khmih bad kim ia tarap iaka. Ha kawei ka sngi, ka la pan um na ki hynrei ym don ba ai. La ka kyrpad ia ki katno katno ruh ym don ba sngap bad ym don ba ai. Ha kawei ka sngi u khun nyngkong ula singew thngan bad ula wan wad jingbam. U tang shu rung hapoh iing u iohi ia ka kmie baka thiah ha jingthiah bad ka kup laka jaiñkup kaba ka ju kup kaba dei da ka snieh skei. Kyndit kyndit kata ka jaiñkup ka kylla sner, mar kumta hi mih sa u tdong, ki thapniang, ka shyntur sim, ka khlieh sim bad ki khmat sim. Kata ka kmie ka kylla sim bad ka her bak.

“Ko hep, ko hep”, la pyrta uta u hynmen, “I Mei ila kylla sim bad ila her noh.” Markumta kita ki khun kila ia beh ki da pyrta, “Mei, Mei, ngi la wallam um ale noh seh mei”. “Kuku, kuku, kuku”, ka la pah, “Kala dier khun, kala dier, ngam wan phai shuh”. Man ka sngi kita ki khun ki beh sa beh ia ka kmie lyngba ki khlaw ki btap, ki riat ki ram, kila mynsaw-mynsnam ilade ba ki ur ba ki hap, ha ka maw ka dieng, ha krem ha kroh, hynrei kim lap shuh ia ka.

Burom bad kohnguh iala ki kmie ki kpa.

U Khynnah uba Shlur

Shisien ha kawei ka por la don uwei u khynnah uba leit iaid kai sha khlaw. Da kaba u iaid kumta shane shane shatai shatai, ula bakla lynti, um lap shuh ia ka lynti ba kan pynpoi sha shnong. Kumta, u la kdiah uwei u dieng uba jrong, ban long u diengduh bad u iaid sa iaid kadiang kadiang, kamon kamon hynrei um lap satia ia ka lynti. Ba ula thait eh ula shong bad thiah kai hapoh bniap. Mar kumta ula iohi ia uwei u bseiñ uba heh bha, ba u kyllaiñ ha uwei u dieng bad ka par artat artet arsut. Ha ki tnat uta u

dieng, don ka skum sim, bad hangta ki don ki khun sim. Kita ki khun sim ki tang shu iohi ia uta u bseiñ, ki la pah bad lynñiar khlem sangeh bad ki wad jingta-rap. Hynrei ym don satia ki ban iarap. Uta u bseiñ u la ang la ka shyntur ula sei la ka sni bad ula pyrsad sia sia.

Uta u khynnah ha kaba nyngkong ula khaweit ia uta u bseiñ, hynrei ka jinglynñiar bad ka jingpah kita ki khun sim kala ktah jur ia u. Ula shim ia uta u dieng, bad bunsien ula tied bad tied da uta u dieng. Uta u bseiñ ula pyllait war ia uta u dieng ba u kyllaiñ. U kynrup ia u khynnah bad u kyllaiñ ia u. U Khynnah pat u tied sa tied ia u bseiñ. Ha kaba khadduh dei na ka khlieh, bad uta u bseiñ u pra noh na kaba kyllaiñ ia u khynnah bad u iap. Kumta u khynnah ba la thait bad tlot u la thiah kai noh hangta hi hajuh. Ka sngi ka la jan sep, ki khlur, u bnai kila sdang shai, shano uba pli u khynnah un leit pat. U thiah la ka thiah hangta. Mar kumta ka lyer kaba jur kala beh ha kata ka khlaw. Ki mrad ki mreng kiba iaid mynmiet mynmiet ki rieh hapoh thliew hapoh syar hapoh krem hapoh kroh. Ka jingbeh jong kane ka lyer bad ka jingjur jongka, ka long ba ka her kata ka sim judu ban poi noh ha kata ka skum ki khun. Tang shu poi ka iohi ia uta u khynnah bad ka byrthen la sngew shyrkhei rem. "Hu! hu! u briew, ngan tar lyngkhot lyngkhai". "Mei, mei", ong kita ki khunsim na skum, "une u khynnah ula pynim ia ngi." Kumta ki la iathuh hala ka kmie aiu ba la jia ia ki, bad kumno uta u khynnah ula pynim. Ka kmie sim ka tang shu iohsngew ia kane, kala hiar ha khyndew, kala tap ia uta u khynnah da la ki thapniang ba u slap ne ka lyer ne ka jingkhriat kin nym pynthut ia u. Ynda la shai mynstep, haba u khynnah ula kyndit naba thiah ula iohi da ki thapniang sim halor jong u; bad ula iam. "Wat khawiet," ong kata ka sim, "phi la pynim ia ki khun jong nga, mynta ngan leh katba phi kwah." "Pynpoi ia nga sha ling," ong u khynnah. "Kiew halor ka met, jong nga, da ki kti bat iaka ryndang jongnga,

wat khiih, bad wat khawiet" Kumta uta u khynnah ula kiew bad shong kulai halor ka met jong kata ka sim. Ka sim kala kynting sha jrong bad kala her, haduh ban da poi sha ka shnong jong u. Tang shu poi kala pynhiar ia u haka tnum ka ting jong u hi.

Kumta uta u khynnah ula poi suk sha ia ting.

"Long kiba shlur."

Ka Dngiem bad u Myrsiang

Ha kawei ka por la don u Myrsiang bad ka Dngiem. Ki iaieit iajuh bha. Ka Dngiem ka don shipliang ka ngap, kaba ka buh tyngkai na ka bynta ka por tlang. U Myrsiang uba la tip ia kata ka ngap, bad u la sngewphylla naei ka toh, bad kumno ka toh. U Myrsiang ula leit bak bak sha ting jong ka Dngiem, u ieng ha khmat jingkhang iit. "Ko Kong phi lah ban iatrap ia nga ha ka jingshitom? "Ba phi lei? Phi shitom kumno bah Siang"? Ong ka Dngiem. "Ka ting jong nga ka la rim ka la jot, ka kyllon kynsan kynsan krum. Yn thiah yn dem, yn sliew ding sliew theh ruh ym long shuh. Sngewbha seh khot sah noh ia ting jong phi tang shi miet," la ong u Myrsiang. "Ale, ale", ong ka Dngiem kaba sbun bha ka mynsiem. Ki iashong bad iathuh khana sadhai bad ynda la dei ka por thiah, ki iathiah hajan rud ding mar shiliang dpei." U Myrsiang um tohthiah, u pyrkhathang ia kata ka ngap kumno ban toh bam. U tied la u tdong pdik shi pdik. Ka Dngiem kaba pli ka la kyndit da kata ka jingtied tdong u Myrsiang "Mano ba tied ting kumta bah Myrsiang"? ong ka Dngiem. "Mano re mano kiba toh khyllung, ki wan khot ia nga," la ong u Myrsiang. "Te phi dei ban leit", ong ka Dngiem. U Myrsiang u la khie joit bad ula mih shabar kum ban leit, ym ban khmih khyllung ba dang kha hynrei beit beit u kiew sha jrong ting na ka jingkieng ba buh nabar. U bam ia kata ka ngap ha ban da ngiah shoih. Ynda ula ngiah, u hiar bad u leit thiah biang harud dpei

"Bah Siang" ong ka Dngiem. "ki khot kyrteng kumno ia uta u khyllung" "U Wanphrang phi". "Ka kyrteng kaba sngewtynrad," ong ka Dngiem.

Ha kawei ka miet u Myrsiang u leh kumjuh. u tied pdik shi pdik la u tdong ha madan. "Kong Dngiem ki wan khot pat ia nga ban peit u khyllung ba dang kha". "Te khie leit bah Siang", ong ka Dngiem. Ha kane ka kynti u Myrsiang u la bam palat ia ka marshiteng. U tang shu wan rung, ka Dngiem kala kylli ia ka kyrteng. "Ki khot kyrteng u i"? Ong ka Dngiem. "U Shiteng, ong u Myrsiang. Kaba dei bad sngewtynnad ka kyrteng", ong ka Dngiem.

Ha ka miet kaba lai ruh u Myrsiang u leh kumjuh. "Oh! ki wan khot biang ia nga". "Te, to", ong ka Dngiem, "leit klo! bad iawan bak bak ho, ngan nang shet kpu ban iabam lashai mynstep." "Ngam slem", la ong u Myrsiang. Nangta u leit kiew beit beit bad bam lut khoit, uda jliah hi phoiñ ia uta u khiew. Haba u Myrsiang u la wan pai bad rung hapoh iang; ka Dngiem ka lakylli. "Kaei ka kyrteng uta u khyllung?" u Myrsiang u la jubab, "U nongshet kpu." "Ka kyrteng kaba sngewtynnad," la ong ka Dngiem. "To mynta ngin ia shet kpu noh." Kaiba ka Dngiem ka dang bun kam ha ka shet kpu. u Myrsiang u nang kylli ia ka. "Hangne ka ngap na ka bynta kine ki kpu?" Shajrong iang," ong ka Dngiem, ka kiew artad bad bak bad bak ban leit shim; ka lap pynban u khiew thylli. "Mano ba bam ia ka ngap? Ym don mano mano ban bam, dei tang ma phi bah Siang." "Balei? Ngam shym tohi ia kata ka ngap, bad ngam tip hangno phi buh ia ka," ong u Myrsiang. "Phi bam hi, phi kynnoh pynban ia nga." Ka Dngiem ka pyrkhat sa pyrkhat mano ba bam bad yn leh kumno ban lap ia kane. Khadduh ka la ong, "ban tip ia kane, mano ba bam ia kane ka ngap, to ngin iathiah haba dei sngi bha; ngin pynphai la ka iengdong shaba dei sngi, lada dei maphi ne manga kaba bam. Ka sngi haba ka shat ha ka met jong nga, ne jong phi, kan

pynum ia kata ka ngap bad kata ka ngap kaba la um kan mih na ka snieh doh jong ngi." Kumta ki la radem haba shit sngi. Ka dngiem tang shi por ka la rohthiah, katba u Myrsiang pat u sheptieng ban thiah. U Myrsiang u shu peit hi shlip ia lade, u rohi shisha ba kata ka um ngap ka mih na ka snep kpoh la jong. Kumta u myrsiang u la niad na lade bad u kyllan ha ka kpoh ka Dngiem. "Kong Ngiem, kong Ngiem," ong u Myrsiang, "Mano ba bam ngap?" "Manga ne maphi?." Ka Dngiem kaba pli ka la shu sngap jar, kam nang ong ei ei shuh.

U Briew uba sniew u thaw ki buit kumta ban lait salade bad ban pyangit ha kiwei da ki kam sniew jong u.

Ka Jingthoh U Kpa

La don uwei u nongrey uba riewspah shibun. U don laingut ki khun shynrang bad arngut ki khun kyrthei. Ula pynshongkurim ia ki khun kynthai bad kumjuh ruh ia ki khun shynrang. Haba u la tymmen bad tlot bor ba um lah trei lah ktah shuh, ula ai noh ia ka lyngkha ha u khun rangbah. U shong u sah, u bam u dih bad une u khun rangbah. Ynda katto katne por, une u khun rangbah ula sngewshitom, ula sngew ngiah ban bsa ban btiah ia u kpa. Kumta ha kawei ka sngi ula ong, "Ko Pa, ki pata kim shym rohi shuh ia phi mynta la katto katne por, balei phim leit peit noh ia ki de?" U Kpa ula mynjur ban leit. Kumta ula leit sah bad u khun uba ar. Ula shong, ula sah bad u katto katne por. Ka pyrsakurim kala isaitmet ia u. Kala kren ki ktien sih ki ktien tla ia u. Kala mai kala tim ia u wat la shisnem ruh ym pat don. Uta u khun uba ar ula ong, "Ko Pa, leit sah noh sa bad i Hep seh." Kumta u kpa ula leit ban sah noh bad uta u khun uba lai. Dang tang shibnai ba u sah hangta ha iing u khun uba lai, ula rohi ba ka tnga jong u kam sngewbha ia u. Ka mai ka tim, ka kynphuut

ka kynshi ia u, kam ju kbum la ka shyntur, hynrei ka shu kren shyit, kren dait ia u laiphew jait. Ha kawei ka sngi ka la halla kala pyrtā, “Balei phim shong phim sah bad u khun rangbah ia uba phi la ai ia ka iing ka sem, ka kper ka phrah, ka lyngkha ka risai?” U Tymmen bapli ula sngewsih bad pang mynsiem. Kumta ula mih noh bad leit sah bad ki khun kynthei. Ula shong katto katne taiew bad kawei, hadien pat katto katne taiew bad kawei pat. U Tymmen bapli u sngew ba kane ka long ka jingkit kaba khia. Kumta u shong katto katne bad uwei, katto katne bad uwei pat. Ka jingim jong u kaba la jynjyr sat. Ki sopiti sopjat ki la kad, la iohi sa ia ka kpoh ka snier, hynrei ym don mano mano ruh na kita ki khun ki ban isynei ia u ban pynthied sopiti sopjat. U Tymmen uba pli ula sngew lehraiñ ban iaid ban ieng.

Ha kawei ka sngi ula iakynduh ia u lok uba u iaieit. Uta u lok u tang shu iohi ula kylli, “Balei lih haduh katne katne? La paw sa ka doh sa ka keh, ka snier ka snap? Haba mynno mynno pat uba riam bha riam miat?” Te u tymmen ula iathuh baroh kaba la jia; ba ula ai kloī lan la ka iing ka sem, ka bri ka bsah, ka lyngkha ka risai ha u Khun nyngkong. “Mynta nga la dei ban leit na kawei ka iing sha kawei pat ban pan ja kyntien. Ki khun ki kylla long ki nongwei kiba eh dohnud. Ki bsa khambha ia ki ksew ban ia nga u kpa.” Uta u lok ula iohsngew ia kaei kaba uta u tymmen ula iathuh. “Wat khuslai ngan iarap ia phi. Long uba jai jai bad uba kyntiak kyntak lashai la shisngi bad phin im suk kynjai. Sngap ia kaei kaba ngan ong bad leh ruh. Nga don kawei ka synduk haka kamra jongnga, ngan ai iaka ha phi ” U tymmen ula ong, “Ngan donkam aiu ia kata ka synduk? Ngan shah rkhiē beiñ pynban.” “Ap, ap shi minit, sngap aiu ngan ong. Thaw shabi katba phi don ki khun. Ki shabi kiba kajuh ka dur ka dar, katjuh ka jingheh, ka jingrit. Deng ia ki haka shadem jongphi, leit sha iing ki khun, bad pyni ia kita ki shabi. Haba ki kylli u donkam aiu ia kita ki shabi.

wat nym iathuh hok, ong ia ki ba ki dei ki shabi jong ka spah ka hajar jongphi bala buh ha iingshari, bad pynsgewthuh ia ki ba phi tang shu rap, dei ma ki ki ban ioh kynti ia ka."

U Kpa ula sngap ia ka jingai jingmut uta u lok. Ula shim ia kata ka synduk, bad ula shna san tylli ki shabi. Ula leit shating u khun nyngkong bad ula pyni ha u ia kita ki Shabi ba u kieng ha ka thliew budam ha ka shadem jongu. Uta u khun ula kylli shaphang kita ki Shabi. U Kpa ula jubab ba ki dei ki shabi jong ka spah jong u kaba ynda u rap ma u, un ioh kynti ma u. "Nga lah ban ai ia une u shabi mynta hi. Buh khop ia u. Haba ngan sa dkut mynsiem ngan sa iathuh hangno ka don kata ka synduk tyngka."

Tang shu iohsgew ia kane uta u khun bad kata ka pyrsa kurim ki la sngew ieit bad kata ruh ym tang ba ki shu sngew, hynrei ki da leh ieit. Ki la sumar sukher ia u ha ka rukom kaba dei. Ki la ai ka bam ka dih kaba biang. Ula thiah ula dem ha ka tusok kaba la siang ityanad bha. Mynta u la suk nadong shadong. Haba u tymmen u kwah leit iaid kai, u khun u la sei la ki jaiñ bha jaiñ miat bad u la pynphong ha u. U teh jin ia u kulai bad pynshong ia u. Kum ban shu ong noh, mynta, te la i kum uba heh bahaiñ. Ki para ki la iohi ia kane bad ki la pyrkhat. I pa im dei iba duk kumba i leh baroh shikatta, lym kumta u Bah un nym burom ia I kumba u leh mynta. Un nym ai la ki jaiñ ki nep jong u ba in phong, un nym pynshong halor kulai haba i iaid kai. Kumta ki la khot ia u Kpa ba un wan kai bac ki la ai ia u katba u donkam. U Khaduh u la khot ia u dorji bad ong ia u ba un suh sut da ki jaiñ bha bad jaiñ rem. Uba ar u la leit sha u Mushi bad ong ia u ba un suh shi jur ki juti bha. U Nyngkong ula phah suh ka overcoat kaba itynnad bad kaba remdor. Ki la pynriam ia u kpa kum u wei u riewspah, bad ki la bsa ia u da ki

jingbam kiba bha bad kiba bang. Kum ban shu ong tang shi kyntien, u la im ka jingim kaba suk katta katta.

Ym slem hadien kane, u tymmen u la pang, haba u la sngawthuh ba u la jan rap, u la ong ia k ta ki khun ba kata ka synduk ka don ba iing Kashari, bad ba u wei pa uwei na ki u don u Shabi Haba uta u tymmen u la rap ki khun ki kti kila pyndep ia ka rukom tep ka rukom thang ha ka rukom kaba dei bad ka khawai ka dawai ia ki loc ki jor ki marjan ki marpa Kum la shai baroh shipara li la leit sha iing Kashari. Ki la kyrpad ta ki Nongbishar, ki Nongthoh, Ki Rangboh Slnong, ryngkat bad ki pulit ba kin pynbynta noh ia kata ka spah hapdeng jongki. Haba la plie ia ka synduk ki rohi aiu? Ei, ei, ruh em, tang u diengduh nongkhrong bad ka jingthoh kaba don ha trai ka synduk. Kata ka jingthoh ka la ong kumne : "Ia u tymmen dei ban pduh da une u diengduh, namar um shym pynsan pynrangbah ia ki khun ba kin leng kiba tip briew tip blei, kiba don akor don burom bad kiba im hok ia id hok."

Ki kmie ki Kpa ki dei ban hikai ia la ki khun ki kti kumno ban im ka jingim kaba tip briew tip blei.

Jingkynshew Baphylla

Shisien ha kawei ka por la don uwei u briew uba don lai ngut ki khun shynrang. Une u briew u long uba minot ha ka trei ka ktah, uba kynshew uba kyn-diap, bad u bym ju shong jaipdeh. U trei naduh dang mih ka sngi haduh ban da dum tliw khlem shong thait. Ki khun jong u ruh ki san ki plung bha, ki bha briew ka khmut ka khmat bad ki khlaiñ bha. Hynrei kawei kaba sngewsih kaba paw ha ki ka long ka jing-bymsmat ban trei ban ktah. Kim nang ban batmoh-khiew, wait, sdie bad kiwei kiwei ki tiar trei. Ki

sng-wbha ban pynlut ia ka por tang ha kaba ia lehkai. U kpa u puh hi iaka lyngkha ka risai, ka kper ka phrah, u thiew hi ia ki ñuit ki ñier u rat ia ki jymie ki tyrkhang kiba teh ia ki dieng soh; ki dieng pai; katba ma ki pat hapoh ka jingkah syrngiew jong ki dieng ki ia lehkai ki tarkhie, lane leit khwai sha wah.

Ki marjan ki marpa, ki lok ki jor, haba ki tohi ba ki leh kumne, ki ong, "Balei phim ju tatrei taktah? Balei phim tarap ia u kpa uba la tymmen, Phim isynei?" Kila jubab, "Balei ngin trei? I Pa keiñ i dei bun peit ia ngi, ban bsa ban btiah, ban pynkup ban pynsem bad pynbiang nadong shadong." Kumta ki im na kawei ka snem sha kawei pat khlem salia khlem kheñ iaka jingtrei shitom u kpa. Ki khun ki la san ki la rangbah katba u kpa pat u latymmen bad u la tlot bor. Kumta um lah shuh ban trei kumba u ju trei mynshuwa ba u dang khelaiñ. Ki kpersoh baroh sawdong ka ting kila sañium, la mih da u ñuit u ñier, u shiah u tram. Ki lyngkha kila long sañium sañait. Ki khun ki tohi ia kine baroh hynrei kim kwah bad kim mon ban trei.

Ha kawei ka sngi ula khot lang baroh lai ngut, bad haba kila wan ula ong ha ki, "Balei khun phim tapeit ia ka lyngkha ka risai, ka kper ka phrah? Haba nga dang khelaiñ nga dang shait, nga dang eh nga trei manga, hynrei mynta ba nga la tymmen, ka dei sa ka kylla jongphi."

"Ka por kaba dang bun phi Pa ban trei" la jubab ki khun. U tymmen ula sngewsih iaka jubab jaipdeh jong ki.

U tymmen ula sngewsih bad kthang ka myn-siem, kumta ula loh pang bad shu thiah ha jing-thiah khlem lah khie shuh, kumta kila kylla duk, kylla shitom ka bam ka dih. Ha kawei ka sngi ula khot lang ia ki baroh lai ngut. Ki iateng harud

jingthiah. U la ong, "Ko khun, nga la sngewthuh ba ngan sa iap noh. Kumno phin iai im? Phim tip kumno ban im, bad phim mon ban trei. Kita ki khun baroh lai ngut kila iam bad lyntar. "Ko Pa, ong seh shuwa ba phin iap, atu ngin trei?" la ong u khun rangbah. "To," la ohg u kpa, "ngan iathuh iaphi ia kaba rieh. Phi tip ba I Meijong phi bad manga, ngi la iatrei shitom khlem kheifi ia u slap ia ka lyer, ia ka shit ia ka khriat. Na ka jingtrei shitom jongngi, ngi la kynshew shikhiew ka ksiar naka bynta jong phi. Nga la tep ia uto u khiew hajan ka ting, tang ba nga la klet noh ia ka jaka hamar hangno nga tep. Ko khun ia-wad haduh ban da lap ia kata ka jingkynshew.

U tang shu lah ong ia kine ki ktien u la khu-blei ia ki khun bad u la dkut mynsiem bad iap noh. Kumta kita ki khun ki la tep la thang ia la u kpa katkum ka niam ka rukom.

Te u hymmen rangbah ula ong ia ki para, "Ko hep, ngi duk, ngi thngan, ngim don pisa tyngka ban thied bam ban thied dih, phi kynmaw atu ba I pa I ong shuwa ban iap? To ngin ia wad ia kane ka jingkynshew." Kumta kita baroh shipara ki la shim la ki mohkhiew, ki shalyngka bad ki la ia tih sawdong ia kata ka ting. Hynrei lehnohei kim shem satia ia uta u khiew. U para uba ar u la ong, "Ngin ym shem phi lada ngi tih kumne. To ngin tih bad kper bad phrah." Kumta kila iatih, hynrei kim lap satia hangno hangno ruh. Uwei na ki ula ong, "To ngin ia tih jylliew, lehse i Pa i la tih jylliew bad tep ia uta u khiew." Baroh shipara ki la mynjur, kila tih jylliew, bad pymih la ka umsyep baroh, Ynda ki la iatih iatih, uta u hynmen rangbah u la ia kynduh ia kaba eh. La u tih katno katno ruh ym lah. Hangta ula khot ia ki para. "Ko hep, ko hep ale klo i nga la lap, nga la lap ia ka jingkynshew ba la buhrieh i Pa." Kumta ki la iamareh ki la iatih iatih, ki da kyrmen ban tohi ia uta u khiew.

Hynrei ki shem pynban da u maw uba heh. "Ngin leh atu ia une u maw?" Ki ong, "Rah, rah bret sha riat." Ki tih, pa ki tih pat ia ka khyndew ki da kyrmen ban toh, hynrei kim toh. Kim tip shuh ka bam ka dih, ki trei sa trei hynrei long lehnohei. "Peit shane", ong u hymmen Rangbah, "ngi la puh, ngi la tih, bad ruh jylliew, ngin nym tehnoh ia ka kumne. To ngin ia thung noh da ki dieng soh dumbur." "Kata te kaba dei," ong u para uba ar. Kumta ki la thung, ki la sumar bha ruh ia ki. Hadien katto katne snem kata ka kper ka la kylla long ka briso. Kumta ki la toh kheit soh ban bam talade bad ban die ruh ban toh pisa ban toh tyngka. Kim khuslai shuh ia ka bam ka dih bad ki jingdonkam jongki.

Te u hymmen Rangbah ula ong ia la ki para, "Ngim shym tih lehnohei ia kane ka kper, ngi la shem ia ka jingkyshew ba i Pa jongngi i la buhrieh."

Kumno U Peheda u bamja lang bad U Wahadar

Napdeng ki 47 ngut ki Wahadadar kiba la synshar ia ka Shella Confederacy, la don U Wahadadar uba sarong bad ba hanga-mei haduh katta katta. Um ju shah ia uno uno u kynja riewduk wat tang ban jam ha phyllaw iing jong u ruh. U ri saw tylli ki ksew kiba heh bad ba itieng. Ban pynpaw ia la ka jingriewspah um ju kyntiew hapoh iing ia ka peisa dan peisa khrong kaba u toh na Hat Pdia. U buh ia ki ha ka synduh nar kaba la pyndait tala bha ha Mynshem, namar ba u sngewpoh ba ka peisa dan peisa khrong kan rung hapoh *khuiñ*. U long uba meng bad ba sngewstad haduh katta katta.

La don uwei u Peheda, u Kynja Kushul ne nongthep duma jong ki Wahadadar ha Durbar Hima ha Hat Phali, uba kyrteng u Mukut. U long u brieve

uba sian bad bi shemphang haduh katta katta, ting-
ba u long uba duk. Um lah shah ban iohi ia kanē
ka jingleh heh bad jingsngew ha nga mei jong une u
Wahadadar. Kaba la pynmong jur ia u ka long ba
une u Wahadadar ha ka jingsngewkynthrung jong u,
u la pynbna paitbah ba un ai buskit shi-katha u kba
bad shi byrni dong ka tyngka rupa ia uno uno u
riewduk uba ioh ban ia bam ja ryngkat bad u Bun
bun ki la pyrshang da ki buit baroh, hynrei ym don
uweih ruh uba lah ban jop. Baroh ki la shah kynhied
shah dumok kum ki ksew.

Ha kawei ka sngi Pyrem, U *Kanshoma* bad U
Peheda ki la ia kynduh ha Sohhyngriang bad ki ia
shong bam lyer halor ki maw tharia ha trai ka
dieng Sohlwa. Ynda ki la iakren kui ia kane katai,
U Peheda u la ong. "Kumno Paruit lada ngin
pynkdiah ia ka reng une u Wahadadar," ryngkat ka
rkhie iapler iap-ang. "La biang phi imat khun-ruit
ban kynthah synrem noh; khnan; ba un nang ban
iaid ban pyrkhath kum u briew." Kumta baroh
arngut ki la ia shong shaniah lyanggeit halor ki maw
tharia bad ki dem pyrkhath kumno ban pynkyllon
ia une u Wahadadar uba sarong. Khatduh ki la
ioh kawei ka buit bad ki ngeit ba tang da ka kin
lah ban pynliem ia u. La katta ruh kim bam-ja-
khluid. Ki dem lai pyrkhath bad ap triang ia ka por.
Ki da iakut ba U Peheda un pyrtrei kam ia kane ka
buit.

Une U Peheda, man ba u iohi bad ia kynduh harum
haneng bad khamtam eh ha Durbar Hima; u shu
wiat pher muiñ shi muiñ i kumba don au re au ban
ong, hynrei um man ong satia. Kane ka jingleh jong
u bun bun sien ka la la ktah jur ia ka jingpyrkhath jong
uta u Wahadadar. "I mat," u la ong ha la ka
mysiem, "une u Peheda u don ei ei kaba pher:
hynrei um nud ban ong namar ba ngam sngewtynnad
ia kiba duk." Katba nang slem katta nang pynshitom

jingmut ia u. Hynrei namar ba u bat ia la ka iktiar ka burom u leh mynleh kum bym bna ei ei.

Ha kawei ka step katba u nang'aid kai bam lyer marwei hapoh kper u la kum iohi liak ia uta u Peheda ba u iaid marwei narud ka kper jong u. U la khot jar jar ia u. U Peheda u la wan ryngkat ka khmat kaba wiat rymmuiñ i kumba ka paw ba don ei ei kaba phylla kaba u don ban ong. "Byrdi," la ong u Wahadadar, "Kaei mo kaba la pynlong ia phi ban wiat rymmuiñ phi tang tang shu iohi ia nga?" u la kylli "Nga don ei ei kaba da kyrpang ban kylli jar jar na phi bad nga neit phi lah ban iarap ia nga" la pynbud u Peheda da kaba leh sian, hynrei ngam lah ban kren nangne bad ngam kwah ruh mano mano ban tip ia ka." U Wahadadar u la lyngngoh jur bad u la angnud ban tip ia ka. "To, ale seh rung hapoh," u da kdew artad ia u ban shong halor ka ben. U Peheda u la rung bad jar jar u la kylli ia u, "Wahadadar ba don burom, phi lah ban iathuh ia nga katno ka dor shi mon ka ksiar?" Kane ka jingkylli jong u ka la pynkyndit thret ia u Wahadadar. "Shi mon ka ksiar!" u la khan wei briew, "lehse une u Peheda u la lap ia ka spah jingkynshew ba la buhrieh da ki nongtuh nonglute ne ka spah ba la nguid ka wah Bakra ha u Jumai bah. Kane ka dei ka kabu,"

**Khuiñ*—Ka jaka kaba la shna kyrpang ban buh ia ki tiar ki tar kiba bha barem dor bad ia u kba u khaw. La shna pyllun da ki maw bad la lape rben da ka dew byrtha bad ia ka jingkhang la shna da ka nar. Kum kine la shna ha ri war ban iada na ka jingpluh bad kiwei.

**Paheda ne Kuskul*—U peon ne u nongrah shithi jong ka Kashari.

**Kanshoma*—U nongthep duma ki Syiem.

u la pyrkhāt, “une u Peheda un leit bna atu ia ka dor jong ka ksiar shimon. Ngan loh ei ia ka kha-ma-kha ha ka dor kaba tad da kaba nga shu siew bai-mluh bai-piat ia une u buthwa*,” u la pynkut ha la ka mynsiem. U Peheda uba la pule lypa ia ka jingmut jong u u la ban ktien, “Ngan shu ieng noh phi Wahadadar, nga kham kyrkieh namar mynta ka step ki dolal bad ki barki ki khot bam ja ia nga hangthie ha kato,” u da leh khia thew jylliew artad. U Wahadadar ba u la pyrkhāt eh ia kata ka ksiar shi mon, ryngkat ka tieng de loh ba U Peheda u die tad ia ka ha ki dolal bad ki barki, u la klet noh ia la ka nishan paitbah kaba u la jari notis mynshuwa. “Phi lah ban bam ja hangne bad nga bad ngin nang ia kren artad shaphang kha ka kam.” Mar mar kumta u la khot ia la u kanshoma, “Mukut, pynkhreh kloī ar-thala ka ja. Wan rah kato ka jingtah kha shitol bad kha elisa ; ka dud, ka doi bad ka mithai morsha ryngkat ki sohpieng, ki kait ; me la sngewthuh ?” U Mukut u la pynkhreh bad dhum bad dham bad ha ka shikhyllipinat u la phriang ia ki diar halor u damsohpet. “Bam Byrdi bam, wat leh raiñ,” la ong u Wahadadar, u bym poi pyrkhāt ei ei ba U Byrdi un shet ia u. Ynda ki la dep bam, u Mukut u la wan rah aitylli ki tangdama. Katha ki dang ia dii phum shi phum u Wahadadar u la bteng biang ia ka khana kaba la ia kren mynshuwa. “Byndi, balei phi don kam ban tip ia ka dor shi mon ka ksiar, bad hangno phi lap ia ka ?” u la kylli. U Byrdi u la shu wiat muiñ shi muiñ : bad kane ka la nangpynskuiñ ia u Wahadadar. “Ngan ai ia phi ka buskit kaba hch, kaba phin nym babe shuh lano lano ruh lada phi iathuh ha nga,” la pynkut u Wahadadar. U Byrdi Peheda u la rkhe kak u da ong artad, “Ngam don, lymne ngam shym loh ia kata ka ksiar shi mon: hynrei nga shu kwah ban tip na phi u Wahadadar

**Buthwa*—u riew bieit riewthem ne u riew shida mada ba duna jingpyrkhat.

uba stad bad uba riwspah." Kane ka jubab jong u Byrdi kala pynmeh ding lep ia u Wahadadar bad sa ba un thap da ka kti ba u lap kyndit bynrIEW noh ba U Wahadadar um bit satia ban ktah kti ia u shakri. Kumta kumta u la hukum ia u Mukut ban beh noh ia u Byrdi. Hynrei u Byrdi Peheda u la phai ktien sha u bad u la ong, "Phi la klet noh la ka Seskular kaba phi la nishan paitbah? Nga dawa la ka buskit. Phin burom ne em ia ka?" ula kylli.

Katba ki dang ia kren la lum lynbung u shnong u thaw ban tip ia ka daw. Ynda ki la tip ia ka duh ka dang baroh, ki la iarkhie iapler iapang. Uwei napdeng jong ki u la ong, "Baroh shi katta u sngew bastad; mynta te u la jah kwah, u shah pynkheih reng ha u peheda." U paitbah u la ia risa shaw. Uta u Wahadadar u la sngewjah burom hi soit; hynrei la un leh kumno kumno ruh ym long. U Byrdi u la dawa beit la ka buskit kaba la nishan paitbah. 'Shi katha* u kba bad shi byrni dong ka tyngka rupa.' U Wahadadar u hap sei lor ryngkat ka pynjem niuhmat. U Peheda u pynkit ia u kba sha ting katba ia ka tyngka pliah u bah da lade. Shwa ba un rah ia ka u la kham saw-kham ka tyngka pliah bad kynting sha suih. U paitbah kum ki syiar ia krait khaw pysit ki la ia niom haduh bala ikulmar hi thlim. Shuwa ba un leit sha la ting u la ong ia kine ki ktien, "Ko Wahadadar kyreit hangamei, wat klet ia kane ka wei- U ba duk u don la ka kynti, bad u bieit ruh u don la ka jingstad."

Naduh kata ka sngi une u Wahadadr u kyndit bynrIEW Um ju ibeiñ shuh ia ki khap ki dap bad u pariah paraita u shnong u thaw, u bishar hok ia ki mokotduma bad trei na ka bynta ka jingsuk jingsaiñ u khun u hajar shi tyllup. U da sngewthuh shai ba pleng ka kham suk ia u khwan

**Shi Katha*— 32 pyrha u kba, shi pyrha ka ia ryngkat 8 seer.

spah ban liat jingriam bad ba ka jingstad jingshemphang ka bamhynroh haba ka khwan ka synshar. U sngewthuh ruh ba ka jingsarong bad ka hangamei ka pynkiew skong ia u briew sha ka ban jot.

U Rynniaw bad ka Sohlyngngem

Hyndai ki ong ba ka Sohlyngngem ka dei ka khun tipsngi ki briew ka bym ju pynlah la ki kmie ki kpa. Wat la ki long kiba duk pynban ki im suk im saiñ. Kumjuh ruh u Rynñiaw wat la u long u khun binong bishon, u long u khun dap akor dap burom u bym ju tam sneng ia la ki kmie ki kpa. Kumta baroh arngut kim ju leh kano kano kaba pynmong ne pynsngewsih ia la ki kmie ki kpa. Ki kohnguh ia ki jingsneng jingkraw jong ki wat haduh u pud ba lah ban pynpait ia ka dohnud jong ki. Ki shim ba ka jingkohnguh ia ki kmie ki kpa ka long khamkor ban ia ka jingsngew bad jingkwah jong ki namar ki dei ki blei kiba nyngkong ha ka pyrthei.

La ong ba ka Sohlyngngem bad u Rynñiaw ki ia kem jingieit markylliang. Ki ju ia phylliew mynsiem iwei ia iwei pat mynba ki iakynduh bad iaid kai pyngngad halor ki lum bad ki lawbniap. Kane ka jingiaieit iajan jong ki ka long haduh katta ba ha ka wei ka sngi u Rynñiaw um lah shuh khlem da phla, "Nga ieit ia phi bad nga kwah ban shong ban sah ryngkat," u la pynkut. Hadien ka jingkyngjah bad jingpisa jingmut u la buh khak sa kawei ka jingkylli pynum dohnud kaba dung ngak ia ka dohnud jong ka Sohlyngngem, "Phi ieit ia nga kumba nga ieit ia phi?" Ka Sohlyngngem kum ka khun tipsngi ki briew ka shu peit-liep ha u Rynñiaw, "Lada i mon i mei i pa." U Rynñiaw kum u khun donburom surom u sngewtynnad eh ia kata ka jubab, "Da ia-thuh keiñ ha ki. Ym ju bit ban leh lyndet leh lyndang toh tim na sha lyndet. Ka rai jong ki dei ka rai blei."

Ka Sohlyngngem ruh ka sngewtynnad eh ia kane ka jinglong burom palei pasiang jong u Rynñiaw. Katta ka jingieit jong ka ka nangjur ha u. "U dei shisha u riewdon burom," ka la ong, "bad nga neit i mei i pa kin hun kin suk."

Ha ka por kaba biang ka Sohlyngngem ka la phla wo ha la ki kmie ki kpa. "Ka dur bad ka jinglong ka la biang," la ong u kpa, "hynrei nga tieng khun, u dei u khun binong khun bishon, phi pat ka khun duk ka khun suk. Yn nai khun lah para baduk, toh u lehbeiñ u lehsat la shai la shisngi."

Ka Sohlyngngem khlem da pynlah ia la ki kmie ki kpa, wat la ka pait ka thlieh ka dohnud ka la iathuh lut ha u Rynñiaw. "Oh ! kumta pleng!" u la kren kyndit paiddohnud, "yn nai haba ym suk i mei i pa." U iam paiddohnud bad ka ruh kumjuh ki ia iam lang slem slem. Hynrei kumno shuh un leh ? U peit ieit khatduh liep ia ka khmat jongka bad ka ruh kumjuh ia u. "Khublei lo," u la ong : bad shuwa ba ka Sohlyngngem kan jubab, u siang diar la ki thapniang shapoh raieh raidam, shapoh ka jri ka kya ; jlang u jah khlem paw pyrthei shuh.

Ka Sohlyngngem ka sah marwei hapdeng ka shai-ong bad jingdum tlip ryngkat ki ummat kthang. "Hu-shi-hu" ka iam pangnud ba ka ieit ka kynmaw ch ia u Ryñiaw ba ka thungsyiem.

U Rynñiaw ruh marwei u ngam ia ki lawbah law-sangam bad ka iam jylliew paiddohnud. Tang teng teng u kiew nator ka klong ka spah bad teng teng hapoh ka lapohyiat u da iam tmang iam sngewsih syiang katba lah haba u kynmaw ia ki sngi bathiang bad ka Sohlyngngem.



U Simtyngwieng

U long u sim uba rit uba im ha ki phudnur phudwah. U pah pynkhih tdong kynthnik sharanik ryngkat ka siaw khroiñ da kaba pynkhih artat ka khlieh Kane kh jingleh jong u ka paw kumba u long uba meng sarong kynthrung. Hlor ka khlieh u don u kynja ñiuhtrong ba thohlieh lyngkot kum ka jaiñspong.

Hyndai ki ong ba u Simtyngwieng u dei u khun marwei jong kawei ka kup shiliang sem shiliang, kaba im kyndoi jakpoh tang da kaba leit bylla nongsngi ha ting ki briew. Ka ieit ia u haduh katta katta bad ka trei dukhi trei shitom tang kumno ban pyndap ban pynbiang ia u. Katba u Simtyngwieng pat um sngewthuh ia kata ka lanot ka raitoi kaba ka kmie jong u ka shah. Kum ka jynreiñ u kjit tang na ka umsyep jongka. Um mon ban pynkhih la ka kti ka kjat ne iarap lem ia la ka jong ka kmie. Ki briew baroh ha shnong ha thaw ki roh-khana ki roh-khadeh bad ki kren maitang maitait satang ia u. Katba ma u pat li-li pen-pen kumba theh um ha ka sla wang khlem sam ei ei ruh em. Slap ne rang ka kmie bapli ka hap ban leit bylla katba ma u pat de skui skui u shong ha ting.

Ha kata ka por la don ka Shadsngewbha ha lypung ri lum jong u laiphew jingthaw baroh. La tuid u bynriew u bynnoi bad kynthei bad shynrang bad tymmen bad kro haduh ba la khapngiah li mam ka Lypung ri lum. Ka riw ka ksing ka dhah, ka besli bad ka tangmuri ryngkat ki nongshad nongkmen ha la ki khor ki khriam haduh ba ym don thylliej ba lah ban batai. Tang u Simtyngwieng marwei u shong syaid ding harud dpei namar ba um don spong um don khor ban iamih para bynriew. Ki sur ka bom, ka besli bad ka tangmuri ki ktik pynkyndeh ia ka dohnud jong u hynrei un leh kumno, "Nangno ngan

ioh ka spong ka khor?" u la kren wei briew wei briew. "La ngan iapan ruh ym don ba ai. La ngan thied ruh ym don peisa." Kum u wieh thadsngi u ksaid marwei marwei.

Khatduh u la ong ha lade; "Sa tang ngan byndi ia i mei ha u mahajon." Tang shu wan ka kmie mynmiet u la iathuh ha ka ia ka jingkwah leitpeit kai shad jong u bad kumno un ioh kylliang ia ka khor ka khriam na u Mahajon. Ka kmie ba ka ieit than ia u ka la kohnguh ban leit shongmraw shipor ha iing u mahajon.

U Simtyngwieng tang shu ioh ia kata ka khor ka khriam, kynthrung u mih ban leit sha Lypungshad. Hynrei namar ba u la sngewkynthrung than ia kata ka khor ka khriam, u la klet noh ia la ka kmie ba ka shongmraw ha iing U Mahajon. Ka kmie bapli ka ap bad khmih lynti ha ki ummat lano shi lano ba u khun jongka un wan law noh ia kata ka bynda. Ah! sangsot ka bapli, u Simtyngwieng ula klet noh iaka. Kumta shi jingim ka sah mraw ha iing u Mahajon ryngkat ki ummat kthang syaia la bad sngi.

U Shaikdar

Ha ki sngi jong u Thukunok, la syoshur u syiem damksang ha Dumarang, uba kyrteng u Khalek. U pylut la ki sngi ki por tang ha ki kam sngewbha bad um suitiew ban peit ia ka synshar ka khadar ne ka duk ka thngan jong u khun u hajar. Namar ba u don shibun ka spah u la kwah ban tei kawei ka iing syiem kaba itynnad. Hynrei bun snem ka la shu sah khongreng khlem pyndep. Wei ba um imon ihun ka khmat ia ka jingtrei jong uno uno u nongtrei, ym tang ba u pynsangeh ia ka jingtrei hynrei u pynhap ia uwei pa uwei u nongtrei ha u lymban u tangon.

Dei kane kaba la pynher syrngiew ia ki nongtei baroh wat la u tyrwa ka buskit kaba heh ruh.

Ha ki sngi ka jingsynshar jong u la im ha Kyntursniang uwei u nongtei uba nang haduh katta katta uba kyrteng U Shaikdar. U don ka tnga ka ba bhabriew haduh katta katta bad ia ka jingbha briew jong ka la bna nam kylleng.

Na ki hamsata, U Shaikdar u la iohsngew ia ka nam jong U syiem Khalek. Namar, ka nam bad ka bitnam ki taid ha shuwa jong u briew kumba ong ki riewtymmen. La bna nam ia kata ka iing syiem jong u kaba ym don satia balah ban pyndep. U kut jingmut triang ban leit paw ha khmat jong une u syiem bad ban tyrwa ia lade ban tei pyndep ia ka.

Hadien bun sngi u la poi ha nongbah Dumarang bad kumta kumta hi u leit tyrwa ia lade ban tei pyndep ia kata ka iing syiem. "Nga ngeit phi iohi ia katei ka iing syiem jongnga kaba la shu sah khong-reng khlem lah pyndep," u la ong, "phi lah ban pyndep ia ka? Ngan ai ia phi ka buskit kaba heh, lada phi lah ban pyndep ia ka," la pynkut u syiem. "Paim kynrad," la phai ktien u Shaikdar, "to ai un im slem u syiem. Nga kular ban pyndep ia ka halor kawei ka kyndon. Kata ka long ba phin pynbiang ia ki jingdonkam baroh, ki tiar ki tar bad ki misteri bad ruh phin kular ba phin nym wan peit ne jngoh katba kam put dep." U Syiem u la kohnguh bad mardor u Shaikdar u sdang ia ka jingtrei.

Hynrei, tang mar shu sdang trei une u syiem ryngkat ki myntri korbari ki la da ia sdang ban wan jngoh ia ka jingtrei. U Shaikdar uba la peilyngba ia ki jingthmu baroh jong u syiem, u la hukum pyr-khing ia ki nongtrei baroh ba ki dei ban leh khlem da kyrtiang sha kadiang ne kamon. U syiem katba u nangjurip ia ka jingtrei u da kren iaroh shikatdei eh ia ka jingtrei U Shaikdar bad u da bret artad

shi iarong ka tyngka ksiar ha khmat U Shaikdar, U Shaikdar u leh kum bym suidñiew ei ei, u shim ia kata ka iarong bad u thep mawsap hapoh ka kynioh bad u ai sorki lang hangta. "Ai sorki, ai mawset, ai mawdong," u la hukum ia ki nongtrei. U Syiem ynda u iohi ba U Shaikdar um leh patiaw ne salia ei ei u la shu peitseh sha ki myntri bad ki myntri sha u syiem myrkylliang khlem kren shikyntien ruh. U Syiem u la dum jingmut bad um sngewthuh ia kane ka jingmut jong u Shaikdar.

U Myntri Shrieh, uba ju kwah ban pynpaw ia lade u la pyrkhat noh da kawei ka buit kumno ban pynsting iaka jingkhia jong ka jingmut jingpyrkhat jong u syiem. "Paim," u ong, "nga la iohsngew ba u Shaikdar hana u don ka tnga kaba bhabriew haduh katta katta." Kane ka jingpasiaw jong u Myntri Shrieh kala ktik iaka dohnud phiang-piang jong u syiem. "Khie," la ong u syiem ia u Myntri Shrieh, "kylli da kaba sian ia u Shaikdar, hangno ka shnong jong u bad kumno lah ban lap ia ka iing jong u." U Shaikdar uba la sngewthuh ia ki khnong ki khriang ka dohnud jong u Syiem u la jubab da kaba phuh samrkhie bad da kaba sian. "Ha Kyntursniang, phi lah ban kylli hano hano ia ka iing jong nga. Baroh ki tip bad ithuh ia nga." U Myntri Shrieh ula sngewhun jrut ia kata ka jubab bad bran bran u la wan iathuh ha u syiem. "Shim kine ar iarong ki tyngka ksiar; leit sha Kyntursniang bad wan iathuh ia nga ia ka jingshisha baroh kaba phi shem," u la hukum ia u Myntri Shrieh. U Shaikdar pat uba la sngewthuh ia kapher kaphar ula phah briew mar mar sha la shnong ban iathuh ia ka tnga jong u ban pynkhreh ia kiei kiei baroh bad leh thik haduh ba un da wan phai.

Hadien artaiew ne u Myntri Shrieh ula wan poi ha Kyntursniang ha ka por iongreñ ka sngi. Mar shu rung ha phyllaw shnong u la ia kynduh ia kawei ka tymmen bad u la kylli la ka tip ne em ia ka iing u Shaikdar. "Wa, ym tip balei," la jubab ka tymmen,

“baroh ki tip bad ithuh ia ka iing jong u.” Kumta ka la ialam bad pynithuh ia u ia ka iing bad nangta ka la leit noh. Ka tnga u Shaikdar kaba la suba lypa kala iohi ia u ba u iakren bad kata ka tymmen. Ka la mih sha phalor ban pdiang ia u. Ka la ai dak ba un bud ia ka sha ka kamra kaba halor. “Waw! ka dei shisha kumba ki ong. Ngam pat ju iohi kynthei kaba bhabriew kat kane.” Hamar ba u dangshong hangta, u la pad hi ngai lngu bad u la hap arsut sha ka kamra kaba nyngkong. Ki mih arngut ki palwan kiba bat la ki diengtangon ha ki kti bad ki la sdang ban khyrwit ia u. “Map ia ka mynsiem jong ng,” u la ong. “Kaei ka kam ba me nang ban trei,” ki la kylli da kaba dumok, “Shuwa ba ngan long myntri, nga trei kum u nongshoh eit,” u la jubab pynstet. “Shim une u dieng-shoh-eit bad trei smat. Lym kumta ngin pynphret ia ki shyieng jong me,” ki la byrthen. U Myntri Shrieh um banse ban kohnguh. U la shongkhop bad u sdang ban shoh-eit kumba u la ju leh mynshwa.

Ynda U Myntri Shrieh u la jah bun bnai, U Syiem Khalek u la khot ia u myntri Batsaipan. “Nga sngewsahnud,” u ong, “balei ba u myntri Shrieh u shu jah kumne, leh la jia ei ei kaba sniew ia u. Khreh mynta ban leit wad ia u. Shim kine saw-iarong ki tyngka ksiar bad wan bak bak ban iathuh ha nga atu ba la jia.” U Myntri Batsaipan buk bak u tatar la ka jingleit. Hadien artaiew ne u wan poi ha Kyntursniang ha ka por janmiet. U iakynduh hi ia kata ka juh ka tymmen bad u kylli na ka hangno ka iing U Shaikdar. Ka ruh ka pynithuh kumba ka la leh mynshwa ia u myntri Shrieh. Ka tnga U Shaikdar ruh ka pdiang burom ia u kumba ka la leh ia u myntri Shrieh bad ka la aidak ia u ban bud bad ka sha ka kamra kaba hajrong. Katba u dangap hangta u la kren ha la wei briew, “Ka long kaba shisha.....ym put don kynthei kaba bhabriew kat katne.” Hynrei katba un da kut ka jinghren u la da hap ngai lngai na jrong sha poh bad

kine ki palwan arngut uwei sha kadiang bad uwei sha kamon ki bat la ki dieng tangon bad ki sdang ban pduh ia u khlem jingisynei." "Map ia ka mynsien jongnga," u la kyrpad da kaba nguh arti arjat. "Kaei ka jingtrei jong me," ki la kynhied. "Shuwa ba ngan long U Myntri Batsaipan u syiem nga la trei kum u thlieh-dieng." Mar kumta hi ki la wan rah ha u ia ka waitlyngngun, u 'nembah bad ki snar. "Trei smat," ki la byrngam, "ne ngin pynpra ia ki shyieng jong me." Da ka jinglyngngoh kaba khraw u la iohi ia u Myntri Shrieh ba u don hajan hangta bad u bunkam ka shoh-eit. "Wa! phi ruh hangne!" u la kylli. Hynrei u Myntri Shrieh um jubab u shu pyni da ka dak ba um dei ban kren hynrei ba un trei smat la ka kam, ioh kaba kham sniew ka hap halor jong u.

U Syiem Khalek, ynda u la ap bun bun bnai u la pisa u la lynga balei baroh arngut ki shu jah kumne. Kumta, u la kut jingmut ban leit wat hi da lade bad shem ia ka jingshisha baroh. U la rah bun ka tyngka bad hadien artaiew ne u la poi ha Kyntursniang ha ka por janmiet kumba poi ki myntri. Nyngkong eh u la ia kynduh ia kawei ka tymmen bad u la kylli na ka ia ka iing U Shaikdar kumba la leh ki myntri jong u mynshuwa. Ka ruh ka pyni thik thik ia ka iing bad ka leit noh la ka lynti. Ka tnga U Shaikdar ruh ka pdiang ia u ha iing kumba ka la leh ia kita ki arngut ki Myntri, ka da pynidak ba un bud ia ka sha ka kamra kaba halor. Katba u dangap hangta, u ruh u la lapbieit ia ka jingbhabriew ka tnga U Shaikdar, hynrei hamar kata ka por, u ruh u la hap ngai lngai shapoh bad u iohi ha kadiang bad kamon ieng ki palwan kiba bat la u diengtangon bad ki la sdang ban pduh ia u khlem jingisynei. Ynda um sngewlah shah shuh u la pyrta jam, "Map kynrad ia ka mynsiem jong nga ngan leh kat ia kaba phi ong." Ki palwan ki sahnggeh ka pduh bad ki kylli ia u da kaba dumok, "Me nang ban trei aiu?" U Syiem ha ka jingtieng

bym don pyrthei u la ong, "Shuwa ba ngan long Syiem, nga la rakhar masi." "Kata me nangbha ban khateit masi bad ban khem dud," ki la pynbud. Ki ai ha u ki tiar kitar baroh bad ka maham artad, "Ngin pynkheĩn ia u budlum jong me lada mem trei hok."

U Shaikdar ynda um shym la iohi shuh ia u Syiem lymne ia ki myntri, u la sngewthuh ha lade aĩu kaba la jia ia ki. Buk bak u pyndep ia ka jingtei bad bran u la leit phai kyrkieh sha la shnong. Tang shu rung ha ting, u khublei la ka tnga bad beit beit u rung sha ka jaka trei. U lap ba u Myntri Shrieh u bun kam ka Shoh-eit, U Myntri Batsaipan u bun kam ka thlieh dieng bad u syiem pat u bun kam ka khateit masi. "Shabas", u la ong, "nga ngeit phi la trei bha la ka kam," u la pynkut da kaba phuhsamrkhe. "Nga ruh syiem kynrad rga la pynpep la ka kam, bad na ka bynta kata ngam donkam jingsiew ei ei. Tang ba phi la nang ban ĩiewkor ia ka kam mynba phi don hangne, kata hi ka la siewdep ia ka bainong jong ka jingtrei jongnga. Mynta ka sngi ngan pyllait noh ia phi ba phin leit sha la ka jong ka hima. Da kynmaw ba phin pynmien ban long kiba sule kam ha kiwei pat, ym ki jynreiĩn."

U Syiem Khalek, U Myntri Shrieh bad U Myntri Batsaipan ki mih na ting U Shaikdar da kaba pyndem ĩiuhmat. Ki jinghikai baroh kiba ki la ioh ki la pynstad shibun eh ia ki.

U Tei U Blei ! U Tei U Blei !

Slem bah mynshuwa la im ha kawei ka shnong, uwei u briew uba ia ka jingstad tuh jong u la bna kylleng. Hynrei ym lah pat ban pynsabut ia kata ka jingtuh jong u. Nalor ba u long uba pariah ktien, u long ruh uba pnah bad ba shemphang haduh katta katta. Ki 'tien-pnah 'tien-stad jong u ki la pynthame bad shoh bieit ia baroh u lok u jor bad u shnong u thaw. Lehse un jin da la lah ban long ha khmat ha ki kam shnong kam thaw baroh lynda ki briew ki suba ia ka jinglong basniew jong u; kata ka long ka jingtuh. Wat la ki suba ia u katno katno ruh hynrei kim lap sabut sitia ban kem bad pynshitom ia u. U long uba juituh bad uba thiah sngi. Um ju leit thung leit tep lymne leit bylla leit kit nong kumba ju leh lem ki para shnong para thaw. Hynrei, u im bha im miat pahuh pahai khlem jingpyrwa bad u riam u beit kynthrong kynthreng kum ki rang palei ki rangkynjai.

Kaba la pynsuba shuh shuh ia u shnong u thaw bad ki marjan marpa ka long-naei u ioh ki soh ki pai, ki tympew ki lakor bad ki shriew ki phan hola hola, haba u bym ju thung ju tep bad um ju prat um ju shyrti. Ki jingtrei jingtah nongtymmen ki la sah khlaw sah shrah baroh bad ki bri ki bsah ki tap da u soh byrthit bad u jyrm i jyrthang. Hynrei man ka teng pat ba u siew khrong siew dan ha shnong ha thaw u iathuh thik thik ba u kheit nangta nangta. U shnong u thaw u ud u nam ba don ka jingtuh jingjan man ka teng na ki bri ki lyngkha jong ki.

Khatduh, katto katne ngut ki rangbah kiba sngewthuh kiba shemphang ki la iasylla ba la kumno kumno dei ban lap ia ka jingshisha. "To ngin ia swait ia syntiat noh ia ka laid ka teng jong une u briew," ki la larai. Hynrei kaba nangpynphylla shuh shuh ia ki ka long ba ki lap ba u don baroh

baroh shisngi ha iing. Kane, ka la shoh ia ka jingmut jong uwei napdeng kita ki rangbah. "Ngambakla," u ong, "une u briew u leit tuh myamiet mynmiet," Kumta, ki la ia husar ia phikir ia ka raid ka teng jong u mynmiet. Ha kawei ka miet shiteng synia, ki lap ia u ba u mih na iing bad ka dongmusa bad u leit beit beit sha lyati bri. Ki bud-dien sor ia u bad ki lap bi u rung ha kawei ka brisoh jong uwei u briew. Nangta u sdang ban kheit sian tang tang ia ki sohkiar soh hola khnang ba u trai bri un nym ithuh.

"Pleng kumne mo shalaki !" ki la ia ong para lok, "mynta ka miet ngi la lap ia ka jingshisha baroh." Ki ap khop hangta harud lynti haduh ba un da dap kit bad wan phai. U nongtuh u bym shym la phohsniew ei ei ruh em u kit la ka kit, u di mut ban wan phai noh namar la sdang kynih u 'iar nyngkong. U tang shu jam katto katne kynjat, kita ki nongap syntiat ki mih bluit bad ker sawdong ia u. "Khun ka bei-man man tuh ngin phler ia me," ki la dumok. "Haduh katne me pynshitom ia ngi ban lap ia ka jingshisha ?" "Map ia nga, maitang maitait ngan nym mlien shuh," u la kyrpad da kaba khyniuh na khlieh ha kjat. "Wat lada me dem me nguh shihajar wat ruh, ngin nym pyllait ia me," ki la byrngem. Kumta, ki kem ia u bad wanrah ha khmat ka jingbishar. Ka jingstad bad jingpnah thylliej jong u baroh ka lip phiaw kum ka sharak bad ka khmat jong u ka lieh kum ka sala. Hylor ka nishan bad ki sakhi satar ba biang, ka durbar ka rai ba dei ban pynsaja ia u da kaba ot ia u khmut.

Hynrei une u nongtuh, tang shu jah ka mynsaw ka mynsuiñ, ka rem ka raiñ ruh irat ka la sdang ban jah. "Ngan paw pyrtnei kumno pat," u la kylli ha la wei briew, "ka pyrtnei kan ong kumno ia nga ?" Hapdeng jong kita ki dew jong ka jingpyrkhat, khatduh u loh ka jingshai : kaba u hi u pyrkhat ba ka long ka buit kaba bha tam.

Ha kawei ka step sngi Iew-Bah, u khreh u khrum bad u leit ban Ieng ha Hynñiew-lad ban pyntrei kam ta kita ka Iinglap jong u shuwa ba ki nongIew kin poi hangta "Mynta, ngan sdang noh la ka kambah," ula byrngem ha lade. Ynda u tohi ba ki nongleit Iew leit hat ki la jan poi, u Iengjot bad khmied la ki khmat sha bneng ryngkat ka shid artad ratad, "U tei U Blei ! U tei U Blei !" Ki briew kiba Iaid nangta ki la Iyngngoh bad ki la sahngoh shipor ban peitkai Katba nangslem katta u nangpynjur ka jingshad bad jingpyrta bad la nanglang bun bah u paitbynriew. Kita ki nongtew ki la pyrshang ban khmied sha bneng hynrei kim tohi ei ei Iait tang ki lyoh kiba king ha sahit "Ngim tohi du, haei uta U Blei ?" ki la ong. "Phin nym tohi, phin nym tohi ta U ; namar ba u khmut jongphi u kah syrngiew ta ki khmat Iongphi. Lada phi kwah shisha ban tohi ta U ot noh la ki khmut." u la jubab. Hangta hangta lei lei u nangjur ka jingshad bad jingpyrta, haduh ba la pynkulmar thlim ta baroh kita ki nongtew. Khatduh uwei napdeng uta u paitbah u la shah ban ot la u khmut. Ka jingsat syllang ka bym don pyrthei ryngkat ka eitmut ka eitmat ka ba ym tip briew tip mrad shuh. Hynrei la katta ruh u hun tang ban tohi ta uta U Blei. Hynrei la u khmied katno katno ruh um man tohi satia ta uta u Blei. Mynta u la sngewthuh ba u la ngat ha ka jingriam jong uta u nongtuh, um banse ban shad sa ma u bad ban pyrta lang—"U tei U Blei ! U tei U Blei !" khnang ba baroh kin ta shah ot khmut lang. Kiwei ruh ynda ki la tohi ta kane ki la Iashah sngewbha ban ot la ki khmut ki khmut haduh ba la lang shi dabor ki khmut. Hynrei uwei ruh na ki um tohi satia ta U Blei. Ban Iada la ka jingbieit bad jingjah burom kim banse ban Iashad lang noh bad ta pyrta jam lang—"U Tei U Blei ! U tei U Blei."

Khatduh eh, la wan poi uwei u riwtymmen uba khamsian khamshemphang ta baroh. Ynda u la tohi

ia kane ka shad lamwir jong kine ki khlem khmut, u la kylli na kita kiba don hangta ia ka duh ka dang baroh. U la leng joit bad u la kren ha ki, "Ko ki Rangbah baroh bad phi kiba la shah ot khmut : to loh maphi ia ka lohi blei baroh ; nga te marwei ngan nai lohi blei ban duh la ka khmut." U paitbah u la sngap kyjah jar shipoi, ki bynthiew ki kyrkhah—"Phuit khun ka mentuh, khun ka thok ka shukor" ki kit la ki khoh ki trap bad ki leit la ka lynti.

Kita ki nongshah ot khmut ynda ki la sngewthuh ia ka jingshah shukor lajong, ki kem ia u bad ki sympat da ki shrong synrem haduh ba un da jem hi jai. Nangta ki wieh ia u ha ka pung bad ki ieh ia u hangta ba un kyrthat nianglong ; kaba ma ki pat ki leit wat thied kya bad tynrai Kait rit ban tah la ki jong ki jong ki khmut. Ki leit wan noh sha la ting ki bried kiba kham stad ban a kaba mynshuwa.

Ka Nohkalikai

Ka Kshaid Nohkalikai ka don mihngi na Maw-sahew bad lah ban lohi kyndiang ia ka na Tyrna, Nongwar bad Laitkynsew. Ka noh rymphai kum u niuhkhlieh bad ka long kawei na ki kshaid ba itynnad tam. Ka don ha ka ka khana kaba sngewngiew sngewphieng ban sngap bad kaba la pynkyndeh ia ki pateng baroh ; kaba la longdoh longsnam ha ki lyngwiar dpei u Khun Khasi Khara.

Hyndai, mynba ka Synrang jyrteh ka dang long ka Shlem-Saiñ-Nar ka ri Khasi bad ka Mawmluh ka dwar shalan nar sha Shilot ; la im hangne kawei ka riewkynthei kaba im kyndoi jakpoh tang da kaba bylla kit nar na Synrangjyrteh sha Mawmluh.

Ka kyrteŋg jong ka ka dei ka Likai, ka rlewshem pap shem lanot kaba u thylliej briew un thlun ban batai. U tnga jongka u la iap noh mynba i khun jong ka i dang dap tang arbnaï. Kumta, ban bsa ia lade bad ia ita i khun, ka bapli ka Likai ka la hap ban leit bylla kit nar sha Mawmluh man ka sngi. Kiba ha ring hasem bad ki kur ki jait ki don jngai bad i poi ha Synrangjyrteh ruh tang namar ba i bud ia u tnga jongka. La katta ruh ka Likai ka suk ka palei namar ba idon ita i khun. Dei tang ma i iba ai jingsuk jingtngen ia ka Likai ha pyrthei ruh-shong-bynda.

Kumne ki sngi ki leit bad ki sngi ki wan bad ym shym jia kano kano kaba pher ha ka jingim jong ka hapoh ki arsnem. Hynrei, jait kumba ju long lem ka pyrthei, katba dangphuh u sy. tiaw u skud ; ym lah hi khlem da ia shyroiñ shyriap haneng harum. Man ka sngi ba ka leit bylla sha Mawmluh, ka ju ia kynduh ia uwei u briew uba imaiñ rangbah bad uba ilup ka khmat. Une u ju leh jan leh juh bad u ju kren bha kren niat man ka sngi. Kumne ka raid da ki bnai brai. Ka jing-nang burom jong u bad ka akor ka la per suki ha ka dohnud ka Likai. Khatduh u pynpaw ba u don jingmut ia ka. Ka dur khmat kaba nabar bad ki kyntien kren ba u kren ki pyrpaw kumba u long u briew uba bha, uba lah ban shaniah. Ka Likai ka la iathuh shem mynsiem ia la ki jingshem pap baroh bad ka ong, "Ngan leh kumno, nga don iwei ikhun iba rit." Hynrei shuwa ba kan pyrkut ula ban ktien, "Ka khia ka shon ngan bah ma nga, ka iap ka im ha khlieh jongnga. Ngan ii ngan sumar, koit wat khuslai ei ei." Shiplang ka Likai ka sngap bad nangta ka bteng, "Phin ieit ia i kumba phi ieit ia nga?" "Phin khuslai lei ia kata," u la ong, "I khun jongphi i long hi i khun jongnga. Phin artatien lei, ngan ieit ia i kumba nga ieit ia phi," u la pyrkut ; namar ba u la i iap mar palat ia ka Likai.

Ka Likai, kaba pli kum ka kynthai shibuit shibor ka liat lor ha ki ktien khroh jali jaum jong u khatarbor. Kumta, hapdeng ka jingtip jong u kur u kha bad u lok u jor sa shisien pat ka Likai ka ia pynhiar synjat da kaba khmih lynti ba kan loh ka lawei kaba suk kaba kmen bad kaba niat phar ia ki sohkyrdot jong ka jingim.

Hynrei une u briew ynda u la loh ba ka Likai ka theh sei la ka jingieit ha la i khun, ka jingbishni bad jingatnud ka la rung hapoh u khu' jong u. "Ka khun ka ksiew jongno kane ba ngan leit bylla rakait ban bsa ia i? Tip la shai in phai ma tang ka lyngkdong ruh?" Kane ka mynsiem ksuid mynsiem runar ka la nang kyrtih bad nangshlei hapoh ka dohnud jong u, katba ka Likai pat ka nangshan- niah ia u khlem don kano kano ka jingtharai sniew.

Ha kawei ka sngi u la ong ia ka Likai ba un shong sngi noh namar ba u la sngewjrem than. Ka Likai ruh khlem da suba ci ei ka la shu ong. "To koit kam lei lei; ngan shu leit noh tang ma nga tang loh bai rneng ei ia i khunlung. Te, to sa nang pynshet pyntiew maphi mo," bad bak ka ia id la ka lynti hadien ba ka la doh la dait la i khun. Kane ka jingkren jeng ka Likai ka la nangtei rnga pynban ha ka dohnud jong u bad um lah shuh ban peit ia ita i khunlung bapli i bym pat tip ei ei.

Mar-mar kumta, u pynsum ia i khunlung bad tang shu dep sum u ot ia i. Nangta u ot dkhot tukra tukra bad u shet jingtah ia i ha ka nar. Ynda la ih u bam ia lade ha ban da pyrkhing triang bad u mih bluit na ting ban leit kai. Hadien katto katne por wan poi ka Likai ryngkat ka thait ka jrem bad ka thngan. Ka khyllie ia u khiewja khiew- jyntah bad ka lap ba don ka jingtah doh i kum ka doh sniang khun. "Imat," ka ong, "la don mano mano ba lapiah "niang khun ha shnong." Ka shin ia ka pliang, ka khat ia ka ja ka jyntah bad ka bam

ha ban da kdang pduk ; ka da mut ban sa khot ia i khunlung ynda kala dep bam kwai. Ani songsot, ynda ka shim ia ka shangkwaia ka lap pynban da ki shympriah kjat jong ka khun la jong bad mynta ka la sngewtbuh ba u la ot ia ka bad ma ka pat ka la bam ia ka doh jong ka. "Waw !" ka la lynñtar kliang, "Ka pap atu kaba kat kane ! Mano ba leh dusron ban ot ia la khun jongnga ?" ka la iam.

Ki marjar marpa ki la iabeh mar mar ban tip atu ba la jia. "Nga la bam doh la ka khun..... nga la bam doh la ka khun. Ngan im leh atu shuh ha pyrthei". Ki lok ki jor ki la pyrshang ban pynngen hynrei ka Likai kam mon shuh ban pynngen. Ka bat ka wait ha kti, ka mareh shaneng shaneng sharum sharum ; bad khadduh ka hiar ar-sut haduh ban da poi ha tmier jong ka riat. Shuwa ba kan pynnoh ka pyiar la u ñiuh-khlieh bad ka iam artad, "Ko khun jong nga, ko khun jong nga."

Naduh kata ka por ki sa sin ia kane ka Kshaid "Ka Kshaid Nohkalikai" ban pynsah pyrto ia kata ka shempap shemlanot jong ka khun U Hynñiew Trep, Ka Likai : ban sneng puramit ia u longdien ba u kpa-nah u dei u kpa-nah.

Ka Sunapani

Don kiba ong ha ka ktien 'Sunapani' ka dei ka ktien dkhar kaba mut 'Ka Um Ksiar'. Hana, la ai kyrteng kumne namar kane ka kshaid ka la khring ia kiba bun ki nongtaid pyrthei bad ka la ktik bad tuh pynkyndeh ia kiba bun ki riewpyrkhat naduh u mihngi haduh u sepugi. Hynrei ba ka pyrthei u Khun Khasi Khara ka don la ki khor ki khriam bad ki khana tym pang kiba sngewphieng ban sngap ka shkor bad na kane ka daw ka thymmei la khot ia kane ka kshaid 'Ka Kshaid Suna', kaba

mut ka Kshaid ha kaba Ka Suna shempap ka noh
iap ia lade.

Ha ki sngi ba dangteng rasong ka hima u Basan
Nongkseh ; shuwa ban seng ia ka Hima Shyllong
bad shuwa ban pawpyrthei ka Pahsyntiew ha Krem-
Marai ; la don uwei u bania uba shong basah ha
Nongbah Nongkseh ; ka shnong jong ki bania bad ki
nongthaw ksiar. Ka shnong trai jong u ka long na
Ummulong bad ka tnga jong u pat na Kyntursniang.
Ki im ka jingim kaba suk basaiñ bad ba pahuh
pahai. Hynrei ia kata ka jingsuk jingkmøn jongki
la bthat noh da ka dusmon ba khatduh jong u
briew—ka jingiap. Ka tnga jong u, hadien ba ka la
kha ia i wei i khun kynthei ka la iap noh. Kumta,
namar ba ka tnga jong u kam don ki kur ki jait ki
ba rñan, u la hap ban ri hi ia ita i khunlung. Ita i
khunlung ruh ila nangsang nangplung ha ka jingbha
briew. Ki lok ki jor bad ki marjan marpa ruh ki
ieit ki sngewtynnad ia i haduh katta katta namar
ba i long iba donakor shibun eh. I pynbiang
ka ja ka jhur, ka shet ka tiew, ka um ka wah, ka
ding ka thei bad i long iba smat basting bad ba
kyntiak kyntak haduh katta katta. U kpa jong ka
u ieit bad thung syiem ia ka bad u hun ban shong
ban sah marwei.

Sa shisien pat ka jingphuh jingphieng bad ka
jingkmøn ba la lip ka wan biang ha ka ting jong
u. Hynrei ki sngi ki por ki taid bad ki khun
ki pynkylla ia ka jingim jong u briew. Kumta ruh
ka long bad ka jingim jong une u bania.

Ynda ka Suna ka la sdang ban puh syntiew puh
skut, u la pyrkhath ba katba ka dang don ka por ka
samoi, un leit ting briew biang. Ki lok ki jor bad
kiba ha ting hasem ki lahap jingmut bad kata ka
jingpyrkhath jong u. "Donkam hi ban don la ka
nongri nongsumar, mane ban thikna ia kane ka
pyrthei !" ki la ia ong. Ka Suna ruh kam don ei ei

ban ong, ka sngewkmen pynban ban toh ka kmie-nah kaba long hi ka kmie; ka ban iakyntu kynpham lem, iasneng iapuramit ha ka eh ha ka kher ha ka kyllaiñ ka kyrjiaw jong ka jingim. Ka khuid ka sngur bad kam pyrkhath sniew ia ki kwar ki shrip jong ka jingim ki ba suh kyllaiñ ha ka dohnud briew.

Kane ka kmie-nah ka long ka briew kaba sianti haduh katta katta. Wat la ka long ka briew kaba kuhiw bad ba bam khñiang ka dohnud pynban ka pynpaw shabar tang da ka khmat kaba phuh sam-rkhie bad tang da ki ktien jali jaum. Ka jingleh-iet jong ka ia ka Suna kaba haduh katta wat haduh ki para marjan marpa ki da pyrto bad iathuh khaña. "Na ei phin toh ka briew kaba kum ma ka," ki la ia ong, "kaba kum ka kmie bakha shisha." Hynrei, katba suki suki pat ka nangpyntrei kam ia kata ka jingbishni kaba ka la pun pyrshah ia ka Suna kaba la dap mam ha u khulpi ka dohnud jong ka. Ka la sdang ban leh beiñ ia ka da kaba pyntrei shitom kum ia ka bordi. Tang shu bakla khyndiat eh ruh ka tim ka tla bad ka shoh ka dat ha ban da suwan hi jrut. Ka Suna la ka iathuh ha u kpa ruh um ngeit. Kumta ka shu pun ha la ka dohnud katba ka dang lah shah. "Lada i pa ruh i la shah shoh jadu ha kane ka briew, ngam don lad shuh da kum wei pat," ka la pynhiar mynsiem jlan ha lade. Ka la shu shah doh miaw doh ksew bad ka shu duwai blei ha la wei briew. Kì jingsngewsih k' thar ki tynrah ia ka dohnud jong kakum ki 'namding, hynrei shano pat kan leit kabapli!

Ha kawei ka sngi katba ka dang kit um ha u khra, ka la kum jynthut bad uta u khra u la pait phiaw. "Khun ka khlem suitñiew, khun ka haramni, nalor ka sah khunswet halor ka leh dukhi," ka la byrthen, "ngan khoh snieh ia pha mynta ka sngi." Ka shim da ka tyrpait bad ka la thalaiñ la khyrwit ia ka haduh ba kan da jem hi jai. Nangta ka sloit ia

ki jaiñ ki nep baroh bad ka ieh sa tang ka jaiñ poh ban da ia ka mynraiñ. Ka Suna ka pait ka dohnud kumba thlieh. "Ban ia ka im jynjar, la suk ka rap," ka la pynkut. "Ko mei bakha, ko mei bapun balei phi ieh beiñ ia nga hangne?" ka iam paid dohnud dohnam. "Ale seh wan shaw noh ia nga," ka la ud.

Ki para marjan marpa mynta ki la sngewthuh ba don kaei kaei kaba pher hangne. Hynrei kim nud ban onge ei ei namar u thylliej jong kane ka kmie-nah la kum ka waitlam arliang syrti. Ki sdang ban khroh ban pyntngen ia ka Suna, hynrei ka Suna kam tngen shuh. "Ngan nai im shuh hi, la suk ka rap," ka la rai kut.

Ha kata hi ka miet, ka Suna ka la miñ na ring khlem don ba tip mano mano ruh. Napoh ka jingdum jong ka miet ka iaideit beit ryngkat ka dohnud kaba khia haduh ban da poi ha tmier jong ka riat. Ka duwai ia U Blei Nongthaw Nongbuh bad shuwa ba kan ryngkoh ka pyrta—"Mei wan shaw noh ia nga."

Ki ong, haduh mynta kane ka jingpyrta "Mei ...Mei....." ka shait sawa ha ka lyer ; bad ki briew ki ngeit ba ka dei ka jingpyrta jong Ka Suna bapli shuwa ba kan nohap ia lade.

Shem pap ka Kong ! Shem pap ka Kong !

Ha Lum Sohran, ha hima U Sande Nongwar; slem bah mynshuwa la don arngut shipara: ki khun tipsngi ki briew kiba iaieit thepmynsiem haduh katta katta. Kim ju iamai kim ju iania ne rapynsngew-sih shipara. Ryngkat ryngkat ki talehkai bad ryngkat ki iatrei ki iakam. Kim ju iathansi shipara.

Kat shaba ki leit ki leit ryngkat bad ki wan ryngkat. Ki kmie ki kpa ki shngaiñ ki shaniah bad ki pyrshang ban pynsuk pynhun katba ki lah.

Ha kawei ka sngi, ka kmie bad u kpa ki la mih dangstep na iing ban leit sha lyngkha krai ban ioh pyndep kloi lan ka ot ka shoh namar ba ula ih bad bala pynjutor than ki sim ki mrad. "Ko khun," ki la ong, "leh Qipsngi bad sumar bha ka iing ka sem, ka sniang ka syiar. Une u krai shiprah ba phin ia shet jasngi ioh ba ngi poi miet ho!" ki da leit artad bran sha la lyngkha.

Ynda la sdang noh phaisngi ka hynmen ka la ong ia ka para, "Ko hep, katba nga nangpyndep ka shut ka khlieng; pyndung noh seh ma phi ia uta u krai ba ngin ioh shet jasngi la syit." Ka para ruh khlem da kyliang ktien ka sei u thlong u synrei ha jyrdom bad ka thep ia uta u krai ha u thlong. Hynrei katba ka nangdung katta u nangkhyndiat namar u lngaid kumba ju long ka rukom. Ynda u la khuid ka la sdang ban peh ban tai bad ban shiaw. Hadian ba la kynther bad peh ia u skop u skum baroh u sah sa tang khyndiat eh. Nangta kala pyrta ia ka hynmen, "Ko kong, la dep ka dung ka pynkhuid baroh." Ka hynmen ka wan hiar ha jyrdom bad ka da lyngngoh lynggaiñ ban iohi ba u sah sa tang khyndiat eh. "Phi la bam ne hep?" ka la kylli. "Em phi kong, ngam shym bam wat tang shi saphit ruh," la jubab ka para. "Te balei ka u sah tang katne?" kala kylli biang. "Ia kata te ngam tip phi kong. Katba nga nangdung katta u nang kham khyndiat bad u sah sa tang katne hi," la iathuh hok ka para. "Ka bym leh long," ka la ong ka hynmen, "lehse phi la bam ne!" ka da kylli artatien. "Em phi kong, ngam shym bam satia," la pynkut ka para, "bad lada phim ngeit ruh phi lah ban puid ia ka kpoh jongna."

Ka hymmen, ba ka la sngewskhem eh ha la kata ka jingsuba jongka ka la shim da ka tari bad ka la puid ia ka kpoh ka para; hynrei kam lap ei ei ruh em ha ki snier jongka. "Kane te la shu jah rngai," kala kren wei briew wei briew. Katba kam tip ba kata ka para jongka ka la rap. Hamar kata ka por ka mynsiem jong ka para jong ka ka kylla sim bad ka her ban dem ha tnum iing bad ka pah artad, "Shem pap ka kong! Shem pap ka kong!" Hangta ka hynmen ka sngewthuh ba ka para jong ka pleng ka la rap. Ka iam paitdohnud dohnam bad ka khroh ka kjor ia ita i para ban wan phai pat, hynrei ka long lehnohei. Kata ka sim ka her na tnum iing sha kliar jong ka Phuiñiaw bad ka iam pangnud artad lynti—"Shem pap ka kong! Shem pap ka Kong!" Ka hynmen ka buddien ia I na uwei u dieng sha uwei u dieng ka da khroh da la ki ummat kthang ba kan wan phai pat, hynrei kata ka sim ka siang diar shapoh raleh raidam ryngkat ka iampangnud lynter lynti—"Shem Pap ka Kong! Shem Pap ka Kong!"

Ka Tiowlalyngngi Pep-Shad

Kumba ju long, ka sngi jingkmén mynsiem dei ka sngi jingpang duhnud, kumta ruh ka long bad ka shad ka kmén jong u laiphew jingthaw ha Lymphung-Ri-Lum.

Ki 'rangpakai bad ki thei samla na sawlyer jong ka pyrthei ki wan sha Lymphung-Ri-Lum da ka dohnud bakmen ban iashim bynta bad takmen lang ba la khyllém u Diengrei bad ba la phngaiñ ka bneng. Ki mrad ki mreng, ki sim ki doh bad ki syntiew ki skud ki la iashim la ki bynta bynta ban pynphuh pynphieng ia kata ka shad jong ki laiphew jingthaw. Ka bom ka nakra, ka ksing ka dhah, ka besli bad

ka tangmuri ki syiang ki padiah bad ki ring mara ia ki jingthaw baroh bad pyndap shoiñ ia ka dohnud jongki da ka jingkmen kaba ym lah ban batai. Ki tymmen ki kro ki sngewkhyaraw sngewkhiah krad, ki klet wat ia u ingdong ba la dor. Ki sngewkhlaiñ sngew lait ksuid bad ki saw ka khmut ka khmat katba ki samla ki samhoi pat ki khih ki kyndeh ki dohnud bad ki smiej ki kjat.

Ka Lalyngngi ruh kam lah shah shuh ban shu sngap ia ka jingud ka besli bad ka tangmuri bad ka jingkynoi jong ka ksing ka nakra bad ka kynshaw. Ka pyndep kloi la ka jingthung shriew ha lyngkha mawsawa bad bran ka beh ban lap ia shim bynta lem ha kata ka shad ka kmen. Ka long ka briew kaba bhabriew, bastem kmur kmur ka snieh doh bad kaba i lubkynthei haduh katta katta, tang ba ka long kaba duk ba iaitoi. Namar ba jaboh ki kti ki kjat ba sop u jympuiñ bad ki eitmut shriew, ka sahnggeh ha shyng-iar ban sum ban sait bad ban khreh ban khrum.

U paidbah u paitsan u tuid hai shi hai sha lypung bad ka Lalyngngi ka peit iap bieit ia uwei pa uwei u nongleit u nongwan. Ka Lalyngngi ka sat ka khyllong bad ka kyrshut khongdong jat ban khuid ki thit sohtait bad ki thit shriew. Ka da pyrkhart artad artad, "Ani! ki samla ki samhoi baroh baroh kin ia peit ia nga." Kumta ka leh korkliak leh shonglad katno katno ruh kam oep shuh. Ynda ki nongleit nongwan ki la kynjah jar, ka Lalyngngi ka mih kynthuit ban leit sha lypung ryngkat ka leh bhabriew khia thew lynter lynti kynthnik shara-niak kum u ñiang kynthah um. Ha kata ka jingleh jylliep lymphuif ka poi tiap ha lypung shad hamar ka por ba riew ka 'singwai bad ba kyoh khatduh ka besli bad ka tangmuri. Te, ki nongshad nongkmen ki iapra la ka pra bad ki nongpeitkai ruh ki khih ban leit phai noh;

Ynda ki tohi ba ka Lalyngngi ka poi khatduh eh, baroh baroh ki la tarkhie takynkok, ryngkat ka sin ka rngop, ka kren phoilia kren thamula haduh ba la sngewrem hi suiñ ka Lalyngngi. Da kaba pait dohnud dohnem ka la iam, "Leh nohei ka riam, leh nohei ka beit. Kat kanc ka kheiñ burom ym pat don ha ka pyrthei. La suk ka rap ban ta ka im." Kumta, da ka jingsngew sih bad jingktang mynsiem ka leit nohiap ta lade ha kawei ka riat hajan kata hi ka lypung. La ong ba kata ka jaka ha kaba ka met rap jong ka ka pyut u mih uwei u syntiew bad ki sin ia u 'U Tiewlalyngngi-pep-shad !

Haduh mynta, ia ka briew kiba leh korkliak jalani haduh ba la thud lut ka leit ka wan ki sin '*Ka Tiewlalyngngi-pep-shad.*'

Donkam ban don Myrsiang

Ha kawei ka shnong ki briew ki im bha im-miat pahuh pahai da kaba ri jingri bad da kaba rep. Nalor ki mar rep ki pynmih ruh shibun ka doh bad u saiwul ia kiba ki shalan sha kiwei pat ki shnong. Kane ka wan rah shibun ka spah ka hajar. Ym don uwei ruh u briew ha kata ka shnong uba duk uba thngan namar baroh ki long ki briew kiba smat bad kiba trei shitom.

Hynrei kaba la kham pynwit ia ki khyndiat ka long namar ba don bun eh ki myrsiang kiba pyntap pynduh ia ki jingri jong ki. Haba ki kheiñ ki lap ba kine ki Myrsiang ki pyntap da ki spah tylli ki khun langbrot shisnem shisnem. Ki rangbah jong kata ka shnong ki la pynlong ia ka Dorbar pyllun ha kaba la khot ia baroh ki nongshong shnong. Baroh kiba la tashim bynta ha ka jingtakren ki pynpaw ba dei ki Myrsiang kiba la pynhiar bad khate ia ka

toh ka kot jong ki. Da kawei ka jingmut ki tarai ba dei ban pynduh dyngkhong ia ki Myrsiang baroh. La win jling ka shong ba ki khreh ban leit tyor Myrsiang. Ki la behthong ia ki bad pyniap lut kat ia kiba toh. "Mynta te," ki ong, "ngi la lah ban pynduh ia une u nongshun uba la pyntroiñ ia ka toh ka kot jonggi."

Shen ki lap ba ki blang ki langbrot ki la nang roi shisha, hynrei ka la don pat ka jingktah kaba jur ta ka rep ka riang. Ka daw ka long ba ki rabbit pat ki la kylla roi haduh katta bad ki la bam ki la pynduh ia ka rep ka sei jong ki baroh haduh ba ki la lynñiar hi kliang.

Sa shisien pat la khot ia ka Durbar pyllun. Baroh baroh ki ong, "Naduh ba la lap lut ki Myrsiang ki rabbit pat ki la man roi haduh katta, bad kine kin bam lut ia ka rep ka riang baroh. Ki myrsiang ki pyniap pynduh tang katto katne ki khun blang khun langbrot, hynrei ki rabbit pat kin pynduh khait ia ka bam ia ka dih bad shen ngin lap thngan."

La kulmar wit u rangbah u rangsan kumno pat yn leh bad kane. Ynda ki la tatai, taduriap, tasani bha ki lap ba lada ki dei ban lait na ka apot jong ka jinglap thngan, la kumno kumno donkam ban don ki Myrsiang. Kumta, da kawei ka jingmut ki la ta rai ba donkam ban don ki Myrsiang.

U Phansyiar

La im slem bah mynshuwa ha kawei ka shnong kaba hajngai, uwei u briew uba jaipdeh jaituh haduh katta katta. Um ju treh ban leit bylla kitnong leit bri leit bsah kumba long lem ki para shnong para thaw. Haba u pyrkhata ka sngi ia ka lyer, ban

hiar ia ki jur bad kiew ia ki thiep u sjer hi rem rem ka met. "Waw ki pyrjong! Waw ki thliem ki ñiangjuli! Waw ki synrem! Waw ki 'niangsaw ki dkhap!" u phuh syep phuh syar bad u shu khishohrih hi kir-kir ka met.

Man ka step, shuwa ban bamja pat u kren sting bad u thu' khana pliah shait shaphang ka tre* ka ktah ka rep ka riang Hynrei taig shu dep bam pat u ud khñium ka met ka phad bad u khynñiuh na khlieh ha kjat kum uba pang khi-shohrih shisha shisha. U kup ka nep bad u klum na khlieh ha kjat ryngkat ka ud artad hu shi hu kum uba pang jur. Shisien ba u la rung hapoh ka nep la eh ban pynkhih ia u wat lada phi da kyndang da u dieng kyndar ruh. Man man ka sngi u leh kumne shi kumne, katba ha ka por bamja pat ma u uba nyngkong ban sei pliang.

U don ka tnga bad arngut ki khun kiba dang rit. Kiba ha ting ha sem jong ka tnga kila shitom jingmut shi katdei eh ia u. La yn pyakhlad ruh ym long, la yn pyniashong ruh ym long. "Tip," ki ong, "kumno kin long ki khun ki kti lashai!" La katta ruh ki shu ap ia ka por.

Ka tnga jong u ka la pyrshang la ka buit ka bor baroh ban khroh bad pynkylla ia u. Hynrei um man kylla. U shu im li-li pen-pen kum u 'lenpula bad u shu ap ja kyntien na ka tnga. Ka tnga ka la shitom jingmut haduh katta katta bad ka la hap ban trei shitom trei dukhi katba kot la ka bor kynthei.

Ynda u la khejñ thik ba ka tnga jong u ka la mih na ting bad kala leit sha la ka jingleit, joit u khie na ba thiah: jah lut kata ka suhjer ka sukhriat bad u shong ban thad sngi lyngkrang ha mynshem ne u shang shnong ban leit ia lorni ia lorhap bad kito ki men lorni men alhia ha shnong.


Naduh uba rit haduh uba heh, naduh ka kynthci haduh ka khynnah, ki sin ia u 'U Phansyiar'.

Ha kawei ba step, tang shu dep bamja step; la bna haw ba ki nongshun ki wan hiar thma ia kata ka shnong. Katba uta u Phansyiar pat ula klum ha ka nep ryngkat ka ud khishoh hur-shi-hur. Baroh ki briew jong kata ka shnong ki la kit la ki tum ki tam, la ki khun ki kti ban pheirieh phettap sha ka jaka kaba shngaiñ. Ka tnga bapli ka la kyrsiew pynklol ia u, hynrei une skui-skui khlem jingsuidñiew. "La wan ki riewthma, la wan ki riewthma," ka la kyrsiew, hynrei u Phansyiar um patiw ei ei. U nangmut pynban ba ka tnga jong u ka leh buit ban kyrsiew ia u khnang ba kan loh pynbor ia u ban leit sha bri. Ka bapli ynda kala iohi ba ym don por shuh ka kit la ki tum ki tam katba lah ryngkat ka bah la ki khun bad soit ka her iap.

Hadien katto katne por wan poi ki riewthma bad kluk ki rung ha iing jong u Phansyiar. Uwei u shipai u la sei la ka talwar bad swup u kawut ia ka nep kaba klum u Phansyiar. U Phansyiar ba u nangmut ba shoh ka tnga u la kynhet pynban jraiñ, "Pha kwah ngan khie, pha da shoh khun ka haramni," u la byrngem. U shipai ula sawlaiñ bad u la kawut kham tynggeh haduh ba la sat salaw laiñ ka ingdong. Da ka jingbitar u Phansyiar u khyllied wak ia ka nep bad mār kumta uta u shipai u la mait sbak ia u ryndang jong u bad thoi u dkut mynsiem.

Haduh mynta, ia uno uno u briew uba ud pang khlem pang, uba lapmiet tang ka thiah bad u bym ju tip kamai kajih, hynrei uba bam tang na kamai bad umsyep kiwei ki sin ia u 'U Phansyiar.'





Kiwei pat ki Kot da u juh u Nongthoh :—

- | | | | |
|----|--|-------|------|
| 1. | Ka Jitlakhai | - - - | 1979 |
| 2. | Ki Siej Khongpong bad Ki Sairupa | - | 1980 |
| 3. | Na Kpep u Sohpetbneng
(State Literary Award Winner) | | 1980 |
| 4. | Ka Mamla
(State Literary Award Winner) | | 1981 |
| 5. | Ka Panjira Ksiar
(State Literary Award Winner) | | 1982 |
| 6. | Tang ka Jingainguh Thang | - | 1984 |